

---

EPISTOLA APOLOGETICA

---

PRO

**ECCLESIA LVTHERANA**

CONTRA

CALVMNIAS ET OBTRACTATIONES

**STEPHANI IAVORSKII**

RESANENSIS ET MVROMIENSIS METROPOLITAE

---

AD

AMICVM MOSCVAE DEGENTEM

SCRIPTA

A

IOANNE FRANCISCO BVDDEO

THEOL. D. ET P. P.



---

IENAE, SVMTV VIDVAE MEYER.

---

M DCC XXIX.

EPHRAIM ABRAHAM

ECCLIA LUTHERANA

CALL MINAS LUTHERAN STATION

STEPHAN LUTHERAN

AMERICAN METHODIST EPISCOPAL CHURCH

JOHN H. HARRIS



LENAE, STATE OF NEW YORK





Q. D. B. V.

**E**X litteris tuis, VIR DOCTISSIME, longe humanissimis intellexi, esse apud vos haud paucos, quibus STEPHANI IAVORSKII, Resanensis & Muromiensis metropolitae, liber, quem *lapis* siue *petra fidei orthodoxis sanctae ecclesiae filius ad confirmationem & spiritualem aedificationem, offendentibus autem ad lapidem offensionis & scandalum, ad resurrectionem & emendationem* inscripsit, quae Moscuae anno proxime elapso MDCCXXVIII. lucem publicam adspexit, vehementer displiceat; eo quod auctor iste, quidquid inuenire aut conuectare conuiciorum, calumniarum, & obrectationum potuit, sine fine & sine modo in protestantes coniiciat. Id porro eundem virum agere, obseruas, ut protestantes inuisos Ruthenis reddat, horumque contra illos excitet odia, nihilque magis efficere adlaboret, quam ut ab omni cum iis abstrahat commercio, & ceu pestem quamdam, fugere doceat; eamque ob causam non tantum externos, sed & inter ipsos Russorum proceres, viros munerum non minus dignitate, quam ingenio & virtute praestantes, quibus res protestantium longe rectius perspectae sint & exploratae, habere in votis, ut innocentiae quis suscepto patrocinio, nebulas hasce discutiat, veritatisque agat causam. Ad-

A

dis



dis denique, esse etiam viros cordatos, veritatisque amantes, qui hocce, quidquid est officii, non nostrae tantum ecclesiae, sed & Ruthenis, a me praestari cupiant; praesertim quum horum plurimis, quae in schediasmate: *de ecclesia Romana cum Ruthenica irreconciliabili*, dicta sunt, haud ingrata fuerint.

Ego quidem non miror, IAVORSKIVM tam alienum a protestantibus hac ratione demonstrasse animum, postquam accepi, eum ab ineunte aetate eiusmodi in Polonia magistris in disciplinam traditum fuisse, qui iam pridem illos, quos haereticos vocant, conuiciis proscindere, calumniisque, pro lubitu confictis, omnium exponere odio, diuini cultus haud postremam existimarunt esse partem. Nec dubito, quin & inter Ruthenos sint, qui de protestantibus talia sibi persuadeant, quae ab omni veritate quam longissime sunt remota; quum multis occasio desit, veriora rectioraque condiscendi, nonnulli quoque eam rerum, quae nostra apud illos contigit aetate, mutationem aegre ferant, & a patria auitaque superstitione inuiti admodum se abduci patiantur. Idque vel inde patet, quod quum Petrus I. siue magnus, Russorum imperator, proferri in lucem hocce opus noluerit, quin potius ad aeternas condemnauerit tenebras, eo deinceps, vt & ipso auctore, mortuo, exstiterint, qui illud, ceu foetum quemdam posthumum, typis committere, omniumque subiicere oculis, suarum duxerunt esse partium; Tweriensi insuper archiepiscopo illud mirum in modum laudante, & vt *librum vtilissimum, summaque rerum diuinarum sapientia compositum*; immo non tantum



*tum utilem ad confirmandos animos in dogmatibus orthodoxae ecclesiae, atque ad retundendas blasphemorum haereticorum blaterationes, sed & valde necessarium, commendante. Quare & haud difficulter illorum accedo sententiae, qui, Ruthenorum non minus, quam nostrae ecclesiae, interesse, existimant, ut calumniae istae ac obrectationes refellantur; illorum quidem, ut ab errore liberentur, viaque ad veritatem cognoscendam iis aperiatur; huius autem, ut innocentia eius vindicetur, incommodaque varia ab illis, qui doctrinam, quam profitetur, sequuntur, removeantur. Immo si dicendum, quod res est, gravius, nisi veritas in apricum producat, ipsis Ruthenis, quam nobis, inde imminet periculum; quum Romanae ecclesiae addictis haud obscure blandiatur IAVORSKIVS, immo ad illorum captandum fauorem, certe ad animum erga illos propensum significandum, tam iniquum erga protestantes ubique se praebat. A nostra autem ecclesia ut nullam sibi, aut libertati suae, metuendi Rutheni habent causam; ita Romanum contra iam dudum hoc egisse pontificem, ut eos sub iugum mitteret, nemini illorum ignotum esse potest. Consulant historiarum monumenta, euoluant ecclesiae annales, perpendant, quid inter Romanos episcopos & patriarchas Constantinopolitanos actum sit, quae inter eos agitata sint certamina, & videbunt, non minori studio his pro libertate pugnandum fuisse, quam illi pro imperio, quod in vniuersam ecclesiam iniquissimo ausu sibi vindicant, dimicarunt. Quum aliter, quod cupiunt Romanae ecclesiae addicti consequi nequeunt, ut in-*

cautos decipiant, emollire verba, crassiores dissimulare errores, crepare consensum, vnionis & pacis prae se ferre studium, protestantes inuisos reddere, & ceu haereticorum pessimos describere. Hae illorum artes sunt, haec strategemata. Vbi iam principes rerumque dominos in partes suas pertraxerunt; mutata scena, aliam prae se ferre faciem, expedire fulmina, vi coërcere dissentientes, in reluctantes igne, gladio, fune, saeuire. Haec si experiri aliquando Ruthenós iuuat, credant IAVORSKIO, detestentur protestantes, colant Romanenses, horumque collum suum tandem submittant iugo.

Vtriusque itaque ecclesiae, & Ruthenicae, & nostrae, quum hic agatur caussa: recte omnino iudicarunt, qui, vt obtrectationibus istis IAVORSKII obuiam iretur, & calumniandi, quae in opere eius regnat, paullisper coërceretur libido, consultum duxerunt. A me autem dum id fieri voluerunt, prout scribis; suo forte erga me plus, quam decebat, tribuerunt amoris; nec rationes quoque desunt, quae me, quo minus istud in me susciperem munus, deterrire possent. Postquam vero, quid ecclesiae, quid veritati debeam, & quod beneficium in alios conferre censeatur merito, qui errorem illorum animis eximit, paullo accuratius ponderaui, mecumque expendi; desiderio & votis viro-  
rum istorum non relinquere locum, nefas duxi. Ea itaque, quae ex opere isto IAVORSKII excerpta mecum communicasti, quae speciminis instar sint, ex quo reliqua cognosci queant, etsi quaedam iam *actis eruditorum Lipsiensibus*, quae cura & studio viri  
illu-



illustris IOANNIS BVRCARDI MENCKENII prod-  
eunt, ex ipsis hisce litteris tuis inserta sint, pri-  
mum referam; vt, quae deinceps circa ea, vt tuae,  
& virorum praestantissimorum, qui id expetiuere,  
voluntati morem geram, monenda fuerint, eo re-  
ctius intelligi queant. Ex praefatione nimirum se-  
quentia refers: *Vobis igitur fidelibus in honorem (positus  
est lapis fidei) sed aduersariis reuera est lapis, quem reie-  
cerunt aedificantes, ille lapis angularis factus est lapis of-  
fensionis & scandali. Atque ad eum offendunt, qui ver-  
bo (Dei) repugnant. Haec de Iudaeis & ethnicis. Sed  
quid dicimus de haereticis veteribus & hodiernis. Nonne  
& his Christus atque diuina eius verba lapides sunt offen-  
sionis? Profecto ita est. Si hac de re vis conuinci, inspi-  
ce catalogum haereticorum sancti Epiphanii, Damasce-  
ni &c. Nonne detestabili Ario verba Dei fuerunt lapides of-  
fensionis &c. Nonne Macedonio, qui spiritum sanctum im-  
pugnauit &c. Anno Christi M D X V I I, nouus aduersus san-  
ctam ecclesiam Gottath insurrexit Martinus Lutherus, con-  
tumeliis laceffens exercitum Dei viui, & varia conuicia  
atque probra aduersus sponsam Christi quasi rugitu suo  
eruētans. Scio aduersarium hunc arcum suum in papam  
& Romanam ecclesiam intendisse, sed tela eius venenata  
& nos attingunt. Verum enim vero prout lapis Davidis  
veteri Goliatho, sic huic nouo lapis offensionis exitii  
caussa fuit. Nam sacra scriptura, quae nobis est aedi-  
ficationis & confirmationis, illi fuit lapis offensionis,  
scandali, & exitii. Considera, quae dico, & perspice ve-  
ritatem. Haec verba Christi: quae intrant in os hominis  
non contaminant eum, sed quae egrediuntur ex ore, huic  
lapis offensionis & scandali fuerunt. Ad haec offendens,*

reiecit sacra ieiunia ex sancta ecclesia. Verba Dei, ne facias tibi imaginem, nec ullam similitudinem, ipsi lapis offensionis fuerunt. Inde reiecit sacras imagines ex sancta ecclesia. Verba Christi: abrogastis siue eleuastis praecepta diuina, per traditiones vestras, huic lapis offensionis fuerunt, hinc reiecit traditiones. Verba Christi, quae in cruce protulit: Deus mi, Deus mi, cur me dereliquisti, lapis offensionis fuerunt Ioanni Caluino. Hinc non erubuit infelix (horreo haec referens) Christo in cruce moribundo desperationem attribuere. Sunt praeterea plurima alia, ad quae offenderunt, de quibus plura in hoc libro reperies &c.

Iungere his liceat, quae ex admonitione eius ad orthodoxos christianos commemoras, quaeue ita se habent: Signa falsorum prophetarum Christus ipse declarat: caute vobis, inquit, a falsis prophetis, qui ouinis pellibus tecti ad vos veniunt, intus autem sunt lupi rapaces, ex fructibus eorum agnosceitis eos. Ecce! signa falsorum prophetarum; primum: veniunt ad vos. Consuetudo haec enim & mos est haereticorum; non misi, sed proprio motu, peruersis cum doctrinis suis veniunt, & noua quaedam auribus insinuant fidelium, praesertim in sacra scriptura haud exercitatorum. Sed sistite gradum parumper, amici, dicite mihi, vnde venitis? a quo misi estis ad hoc negotium peragendum? &c. Clarum est, vos ea ratione, qua Christus, missos non esse, nec de tali excellentia gloriari potestis, dummodo archi-rabios vestros, Martinum Lutherum & Ioannem Caluinum, in memoriam reuocatis; a quibus omnes haereses nostri aevi prouenerunt. Respondete igitur, quis vos misit? quomodo nuntiatis euangelium (siue praedicatis) si misi non estis? Nos Deus misit.



*fit. Vos autem respondete. Audimus responfionem, sed friuolam. Nonne hoc (vestrum) celebratis miraculum, quod tam breui tempore conuertistis, aut, vt rectius dicam, peruertistis ad impiam doctrinam vestram suscipiendam tot regna & prouincias? Sed & Ariani olim tale iactabant miraculum, & nunc de simili gloriantur Mohamedani. Vos latam aperiiistis vitae humanae viam; ieiunia sacra abrogastis; bona opera tamquam ad salutem non necessaria reieicistis; poenitentiam & mortificationem carnis tamquam fabulosa habetis; coelibatum & voluntariam paupertatem deridetis; virginitatem rem existimatis impossibilem. Hac ratione sine vlllo labore tot populos breui in vestras pertraxistis partes, & peruertistis. Num hoc est apostolatus vestri miraculum? O! apostolos, aut potius apostatas & aduersarios sanctae ecclesiae. Tertium signum falsorum prophetarum: veniunt ad vos induti pellibus ouinis, sed intus sunt lupi rapaces &c. <sup>o</sup>vis est ouina, qua se tegunt, si de fide praedicant, fide sola christianum saluari &c. sed lupi sunt rapaces, dum hac pietatis specie omnibus peccatis portas aperiunt. Quid (enim) ex hac impia doctrina sequitur? Hoc sequitur: trucidare, furare, adulterare, falsum dic testimonium, fac, quae lubet; ipsi satanae aequalis fias malitia; nihilominus omittite metum; tantum crede; fides in Christum sola saluat. Ita hi lupi laruati docent. Pellem ouinam prae se ferunt, dum euangelio seu laeto de Christo nuntio gloriantur, & euangelici vocantur. Sed lupi sunt rapaces, dum nouum quoddam euangelium, non autem vetus illud a sanctis patribus, generalibus conciliis & tota orthodoxa catholica ecclesia receptum, adnuntiant. Corporis inclinationem, quae sanctis fit per imagines repraesentatis reiiciunt. Sed hoc*  
*ipsos*

ipſos excitat, & dentes quaſi exacuit ipſorum, quod ſumma cum pietate adſpiciant apud nos diuinas imagines argento, auro, & pretioſis gemmis conuenienter & pie ornatas. Hunc ſanctum theſaurum ſacrilegi deripere cupiunt, (vt variis in regnis iam fecerunt,) ſpecie zeli malitiam ſuam occultant, ad exemplum Iudae (Iſchariotae) qui non de pauperibus ſollicitus, ſed fur erat. Sed ne multis ſim vobis moleſtus, poſtremum a Chriſto propoſitum ſignum horum ouinis pellibus tectorum luporum referam. Ex fructibus ipſorum pernoscetis eos. Sed quales ſunt fructus bodiornorum haereticorum? Cogitatisne aduerſarii, quod ignoremus vitam archi-rabini veſtri, a quo omnes recentiores haereſes prouenerunt, Martini Lutheri? Totus orbis vaſerrima ipſius facta nouit, & veſtram miratur coecitatem, quod talem deceptorem ſequamini, latamque ingreſſi ſitis viam vitae commodorum amore capti. Propter has diabolicas fraudes vos orthodoxae eccleſiae filios rogo &c. Amicitiam cum talibus ineundam, aut ſermones ſerendos quoscumque, prohibet atque interdicit ſanctus Paulus, praefertim iis, qui ſacrarum litterarum parum gnari ſunt, II. Tim. II. 16. III. 5. Tit. III. 9. 10. II. Theſſal. III. 14. Haec monita Pauli ſequere atque obſerua, orthodoxe eccleſiae fili, & euita amicitiam atque ſermones cum peruerſis, memor dicti pſalm. XVI. &c.

Sufficere haec poſſe, rectiſſime, VIR DOCTISSIME, ſcribis, vt inde, ceu ex ſpecimine quodam, cuiusmodi reliqua ſint, cognoscatur. Satis enim ſuperque IAVORSKIVS iis animum ſumma non minus caecitate, quam zelo inconſulto, qui prope a furore abſit, laborantem prodidit. Haud difficulter etiam, quibus olim vſus ſit magiſtris, perſpicere



spicere licet, quos & vt in arte de haereticis, quos sibi finxit, quidlibet comminiscendi, si non superaret, certe aequaret, operam dare voluit. Nec tamen quidquam dixit, quod non centies iam ab aduersariis nostris dictum, sed millies iterum a nostratibus refutatum sit. Id non sine ratione aliquis miretur, quod statim, vbi de beato Martino Luthero loqui incipit, se Ruthenicae ecclesiae addictum esse, eiusque sacra sequi, parum memor esse videatur; si modo serio illi addictus fuit, & non potius inter proditores eius atque transfugas numerandus sit, qui id sibi datum credunt, idque omni conatu agunt, vt Romani pontificis eam submittant iugo. *Nouus*, inquit, *aduersus sanctam ecclesiam Goliath insurrexit, Martinus Lutherus, contumeliis laceffens exercitum Dei viui, & varia conuicia atque probra aduersus sponsam Christi quasi rugitu suo eructans.* Quo iure Lutherum cum Goliatho contendat, deinceps disquiremus. Nunc id solum obseruamus, Romanam ecclesiam ab eo vocari *exercitum Dei viui*, itemque *sponsam Christi*. Cum hac enim Luthero rem fuisse constat, nec ipse ignorat, immo fatetur potius auctor. Itane vero? Num a genuino ecclesiae Graecae ac Ruthenicae hoc expectes filio? Nemo tam hospitem temere ex historicorum monumentis retulit animum, qui ignoret, quanta per multa iam saecula Romanae ecclesiae cum Graeca intercesserint certamina: quas artes, fraudes, machinationes Romani pontifices adhibuerint, vt imperio suo subiicerent Graecos: quanto rursus, quamue immani eos prosequuti sint odio, quum istud ex voto suo non procedere intelligerent.

Qui rursus pro Graecis steterunt, horumque contra iniquissimos Romanorum praefulum ausus egerunt caussam, numquam fere non tyrannidem, & inexplebilem dominandi libidinem iis obiecerunt, simulque errores grauissimos & dogmata falsa, ceu Romanae ecclesiae propria, reiecerunt & condemnarunt. Hosne itaque ecclesiam Romanam pro exercitu Dei viui, aut pro sponsa Christi habuisse existimas? Certe id PETRVS patriarcha Antiochenus, non credit, non MICHAEL CERVLARIVS patriarcha Constantinopolitanus, non LEO Achridiae archiepiscopus, non NICOLAVS Methonensis, non EVSTRATIVS Nicaenus, non GREGORIVS Corcyrensis, non BASILIUS Achridenus, non NICOLAVS Hydruntinus, non THEODORVS LASCARIS, non GREGORIVS ille, qui contra *blasphemias* VECCI, Latinorum defensoris, scripsit, non ANDRONICVS, non BARLAAMVS, eo saltem tempore, quo Graecorum partibus adhaesit, non MAXIMVS PLANVDIS, non NILVS atque NICOLAVS CABASILAE, non GREGORIVS PALAMA, non MACARIUS MACRES, non DEMETRIUS CHRYSOLORAS, non MACARIUS Ancyranus, non MARCVS Ephesius, non GEORGIUS GEMISTVS, siue PLETHO, non MANVEL Peloponnesius, non MELETIVS PEGAS patriarcha Alexandrinus, non NECTARIUS patriarcha Hierosolymitanus, non innumeri alii, qui pro Graecis contra Latinos calamos strinxerunt, suaeque ecclesiae susceperunt defensionem, eiusque adeo veros & genuinos se esse filios demonstrarunt. Hisce si NICEPHORVM BLEMMIDAM, IOAN. VECCVM,  
GEOR-



GEORGIVM Metochitam, CONSTANTINVM Meliteniotam, SIMONEM Cretensem, BESSARIO-NEM cardinalem, GEORGIVM Trapezuntium, & qui omnes, vt eruditione, ita forte & studio erga Romanam ecclesiam superauit, LEONEM ALLATIVM, aliosque eiusdem generis opponere velis, hosce omnes aut pecunia corruptos, aut aliis vitae huius commodis inductos, ecclesiam Graecam deseruisse, & ad Latinorum transiisse castra, vnde & *Ασπύροφες* dici solent, notius est, quam vt a me moneri debeat; vnde & illorum hic in censum non venire testimonia, nulliusque plane esse ponderis, res ipsa docet.

Vt vero eo luculentius pateat, quo iure IAVORSKIVS ecclesiam Romanam, in qua emendanda corrigendaque Lutherus laborauit, *exercitum Dei viui, sponsamque Christi*, adpellitet, operae pretium fuerit, nonnullos ex ipsis Romanae ecclesiae additis producere testes, qui nos condoceant, qualis ecclesiae istius eo tempore, & antea quoque, fuerit facies, cum ad tantum opus suscipiendum, non sine singulari Numinis instinctu, Lutherus excitaretur. Fuerunt equidem ex nostratibus, qui magno numero eiusmodi veritatis testimonia, summo studio collecta, exhibuerunt; sed cum ea plurimis Ruthenorum haud dubie ignota sint, iuuabit pauca quaedam, eaque selectiora, recitare, inde vt condiscant, qualis illa ecclesia fuerit, quam IAVORSKIVS, ceu sponsam Christi, nobis commendat. Saeculo decimo quarto, vt ab eo exordiamur, GVILIELMVS DVRANDVS, siue DVRENTVS, Mimatensis in Gal-

lia episcopus vixit, & anno MCCCXI. *tractatum de modo celebrandi generalis concilii* conscripsit, in quo ecclesiae Romanae genuinam faciem viuis coloribus depingit. Prodiit is Parisiis anno MDXLV. & Lugduni anno MDCXXXV. & iterum Parisiis cum aliis NICOLAI DE CLEMANGIIS & PETRI DE ALLIACO tractatibus. Hic statim, initio a cleri Romani reprehensione ducto, ita loquitur: *Sequenti sunt viam Balaam ex Bosor, qui mercedem iniquitatis amauit, correctionem vero habuit suae vesaniae. Nam subiugale mutum, quod hominis voce loquutum est, prophetae insipientiam probauit. Quod etiam hodie accidit, cum tam stulta & dissoluta perpetrentur in ecclesia Dei a dictis personis ecclesiasticis, quae deberent esse lumen aliorum, & lucernae super candelabrum positae, iuxta id, quod dominus ait, sensus hebetant Iudaeorum, & etiam paganorum. Et etiam illi, qui ratione diuinæ agnitionis omni modo carent, istorum detestantur insaniam, & eorum distorta & Deo contraria itinera sanius sapiendo redarguunt. Idem dum rationem reformandi ecclesiam edidit, curiae Romanae vitia, fastum & luxum episcoporum, flagitia sacerdotum, acriter perstringit, & quod Romana a primitiuae ecclesiae facie quam longissime absit, diserte pronuntiat. Vnde eam emendatione quadam ac correctione opus habere, sponte sua consequitur. Et hinc iterum: Prob! dolor! inquit, quia videtur in ipsa ecclesia verificari dictum Esaiæ (cap. XIII. 20. 21.) in figuram Babylonicae ciuitatis, gloriosae in regnis, & inclytæ in superbia Chaldaeorum, de qua dicitur: Erit cubile draconum & pascua struthionum, occurrent daemonia, onocentaurus, & pilosus clama-*



*clamabit alter ad alterum &c. Vtinam non verificetur verbum in clero Esaiae dicentis: populus hic labiis me honorat, cor autem eorum longe est a me.\* Circa initium eiusdem saeculi decimi quarti DANTES ALIGERIVS floruit, Florentinus, generis non minus nobilitate, quam ingenii praestantia clarus. Is in poemate de paradiso, italica lingua scripto, conqueritur: papam in lupum euasisse, oves Christi a vera via diuertisse, propterea euangelium deserui, patrum scripta negligi, solis decretalibus incumbi; de Nazaretho, ubi Gabriel alas suas expandit, neminem cogitare, Vaticanum tantum & alia selectiora Romae loca a papa & cardinalibus attendi. Et haec, inquit, militiae Christi, cui nomen dederat Petrus, coemiterium fuerunt, cum interim doctrinam Romae vere sepeliuerunt. Olim illatum ecclesiae gladio bellum, inferri iam fame, sublato pane illo, quem Deus ei alendae dederat, nempe verbi diuini praedicatione &c. Scripturam diuinam aut omnino a tergo relinqui, aut violenter torqueri; vnumquemque in suis commentis sibi plaudere; euangelium vero taceri. In cathedra toto anno vanas quaestiones, meras fabulas, personare; ouiculas interim hoc vento pastas tabescere.\*\**

Possem porro commemorare ALVARVM PELAGIVM, poenitentiarium papae, tandemque Syluensem in Lusitania episcopum, magnae auctoritatis ista aetate virum, qui itidem saeculo adhuc decimo

B 3

quar-

\* part. III. tit. XXVIII. add. MATTHIAS FLACIVS, Illyricus, in catalogo testium verit. num. CCXXI. p. m. 610. seqq.

\*\* Recitat haec eius verba IO. HENRICVS HEIDEGGERVS, in historia papatus, period. V. §. CXXVI. p. 155.

quarto floruit, & de quo NICOLAUS ANTONIUS pronuntiat: *Splendidissima quidem fax dissipandae horum temporum caligini, qua excaecatus omnis fere status hominum vitia palam virtutum loco amplectebatur*, (ita enim vir hicce doctus veritati testimonium praebet) *doctrina fuit Aluari Pelagii*.\*\*\* Exstant enim eius de *planctu ecclesiae libri duo*, Ulmae primum anno MCCCCCLXXIV. editi, & non semel deinceps recusati; in quibus licet animum, pontifici satis addictum, demonstret; ipsa tamen veritatis vi impulsus summam ecclesiae corruptionem, in sacri praesertim ordinis viris conspicuam, adeo non dissimulat, ut aperte potius interdum profiteatur. Sic, *lib. II. artic. I. fol. m. 81.* diserte ob nimiam scelerum frequentiam euiluisse clericos docet, & ecclesiam esse plenam filiis clericorum, quos scilicet ex concubinis seu meretricibus susceperant. Porro, quibus vitiis clerici ut plurimum sint obnoxii, *lib. II. artic. XXVIII. fol. 133.* disputat, & inter alia de iis adserit: *intersunt conuiuuiis & nuptiis; tabernae sine necessitate intrant; magicis artibus & auguriis siue incantationibus multi attendunt; arma etiam offendibilia ferunt; in bellis pugnant multi; illicitis lucris & questibus se immiscent; usuras frequenter exercent; male dispensant res ecclesiae; filios & consanguineos de bonis ecclesiae nutriunt; magis in philosophicis & libris saecularibus, quam diuinis student; & quae reliqua sunt eiusdem generis plura, quae longo ordine recenset. Mitto reliqua, quae ex eodem auctore magno adhuc proferri possent numero, &*  
ad

---

\*\*\* *biblioth. hisp. vet. tom. II. lib. IX. cap. IV. §. CCXX. p. 100.*



ad FRANCISCVM PETRARCHAM, gente Florentinum, archidiaconum Parmensem, eundemque inter maxima istius saeculi lumina referendum, me confero. Inter opera eius Basileae anno MDLXXXI. iunctim edita, post *epistolarum ad viros quosdam ex veteribus illustriores librum* sequitur *epistolarum sine titulo liber*,\* in quo epistolae nonnullae exstant, in quibus veram & genuinam curiae Romanae faciem ingenue exhibet atque depingit. Et in *epistola* quidem *vndecima*,\*\* *ut vides*, inquit, *eunt res, immo vero non eunt, sed retrahuntur; nihil est praesidii in virtute. Iustitia periit, libertas abiit, aequitas victa est, libido regnat, saevit avaritia, feruet invidia, omne genus hominum suos patitur tyrannos. Ad laudes ore & animo canendas Deo geniti, totam vitam in contentionibus & aemulationibus agimus. Insignis illa Iesu Christi aula, illa olim arx divini cultus eximia, nunc tandem peccatis nostris id agentibus coelesti auxilio destituta, immanium spelunca latronum facta est. Ex uno quidem fonte descendit origo mali, accedunt fontes alii minores, ex quibus ingens omnimodae miseriae flumen exaestuatur. Quo necesse est propediem percamus, supremisque malorum obruamur fluctibus, ac nisi humanae perfidiae divina pietas occurrerit, triste naufragium patiatur ecclesia. In praecedenti epistola nona\*\*\* ita scribit: Quidni autem id accidat, ubi nemo est, cui verum verbum absque graui conuicio dici possit? Vbi nulla pietas, nulla charitas, nulla fides habitat. Vbi tumor, liuor, luxus, avaritia cum artibus suis regnant; ubi pessimus*

---

\* p. 710. sqq.

\*\* p. 722.

\*\*\* p. 720.

mus quisque prouebitur, & munificus praedo ad coelum tollitur, iustus pauper opprimitur, ubi simplicitas amentiae, malitia sapientiae nomen habet; ubi Deus spernitur, adoratur nummus, calcantur leges, irridentur boni, usque adeo, ut iam fere nullus, qui irrideri possit, adpareat. O! mores hominum, o! saeculum nostrum &c. In epistola autem duodecima \* hunc in modum loquitur: Quis oro non fugiat Babylonem, & vitiorum simul omnium, ac laboris ac totius miseriae moestam domum? De qua quidem aliquid nosse debes. Visa loquor, non audita, fato meo pessimo in eas terras puer eiectus, cui usque ad hanc aetatem &c. magnae illic partes aetatis in gemitibus abierunt. Noui expertus, ut nulla ibi pietas, nulla charitas, nulla fides, nulla Dei reuerentia, nullus timor, nihil sancti, nihil iusti, nihil aequi, nihil pensi, nihil denique vel humani. Amor, pudor, decor, candor inde exulant. De veritate quidem sileo. Nam quis usquam vero locus, ubi omnia mendaciis plena sunt, aer, terra, domus, turres, vici, atria, plateae, porticus, vestibula, aulae, thalami, tectorum laquearia, murorum rimulae, diuersoria aedium, penetralia templorum, iudicum subsellia, pontificum sedes? &c. Si illic fuisti, & nullo tuo maiore negotio distraetus, in nefariam illam scelerum scenam acumen ingenii atque oculos intendisti, alium iudicem non optabo, quam scilicet omnia ibi virtute, veroque sint vacua, plena criminibus, plena fallaciis, plena fucis, plena blanditiis, plena pessimis artibus, ambitionis, auaritiae, superbiae, lioris &c.

Quo maiora saeculo decimo quinto summa ecclesiae, qua doctrinam, qua mores vitaeque rationem,

---

\* p. 723.



nem, tum reliquorum, tum maxime pontificum, episcoporum, aliorumque sacri ordinis virorum, corruptio incrementa sumsit, eo plures exstiterunt, qui, dum emendationem ecclesiae correctionemque optarunt, aut integris hunc in finem compositis scriptis suaserunt, foedam eius simul descripserunt faciem, nihilque minus, quam sponsam Christi, vt IAVORSKIO quidem videtur, esse testati sunt. Haud vltimum inter eos locum tenet IOANNES GERSON, siue IOANNES CHARLIERIVS DE GERSON, academiae Parisiensis cancellarius, cuius quanta in concilio Constantiensi fuerit auctoritas, neminem fugit. Quo quidem in concilio id omni etiam studio egit, vt ecclesiae emendationem promoueret, quorum etiam scripta eius, de *auferibilitate papae ab ecclesia*; item, de *defectibus virorum ecclesiasticorum*; vt & de *mediis vniendi & reformandi ecclesiam in concilio vniuersali*, comparata sunt. Atque vltimum quidem istud, quum paullo ante conciliū Constantiense scripsisset, in ipso concilio normae instar atque regulae sibi esse voluerunt, qui ad consultandum de ecclesiae emendatione constituti sunt; quorum tamen labores & conatus pontificum Romanorum, & eorum qui cum illis faciebant, fraus atque astutia irritos reddidit. Possem GERSONI iungere ex ipso cardinalium numero PETRVM DE ALLIACO, cardinalem Cameracensem, & FRANCISCVM ZABARELLAM, cardinalem, vt eo tempore vocabatur, Florentinum; possem porro iungere THEODORICVM DE NIEM, GOBELINVM PERSONAM, aliosque complures, qui omnes vno ore confessi sunt, corru-

pta ita cuncta ac deprauata esse in ecclesia, vt reformatione quadam ac emendatione indigeat. \* Sed quum omnia adferre longum nimis & a nostro instituto alienum foret, misis reliquis NICOLAVM DE CLEMANGIIS, Catalaunensem, notissimum saeculi decimi quinti scriptorem, tantum audire iuuabit. *Opera eius omnia* cura studioque IOANNIS LYDII, Lugduni Batauorum anno MDCXIII. prodierunt; inter quae primo statim loco conspicitur liber de *corrupto ecclesiae statu*, ex quo pauca quaedam recitare operae fuerit pretium. Statim ab initio causas malorum, quibus tum ecclesia premebatur, indicaturus, *nam*, inquit, *cum ecclesiae ipsius ministros, (quorum dos & possessio Christus esse debet) ab omni contagione terrenae cupiditatis excussos esse oporteat, cum pudicos esse conueniat, & ab omni inquinamento, carnisque petulantia alienos, qui coelestia sacramenta, pretiumque dignissimum redemptionis humanae tractant, conficiunt, aliisque conferunt; cum pii esse debeant, qui piissimum iudicem vicaria sorte repraesentant &c. Sed pro his atque aliis, quibus adornari deberent virtutibus, omnium colluione vitiorum contaminati sunt.* \*\* Quumque porro docuisset, ex tribus hisce vitiis: *luxu, fastu & cupiditate propria*, omnia mala in ecclesia orta esse; ad ipsorum pontificum describenda vitia se confert. *Summi etenim pontifices,*

\* Plures adhuc recenset IACOBVS LENFANT, in *historia concilii Constantiensis*, gallice scripta, lib. VII. §. V. p. 626. add. IO. HENRICVS HEIDEGGERVS, in *historia papatus period. V. §. GXLVII. p. 188.*

\*\* cap. I. p. 4.



ces, inquit, (vt tandem ad eos veniam) qui quantum primatu & auctoritate se videbant ceteris praestare, tantum in huius primatus & supremæ potestatis argumentum, plerumque se super alios libidine dominandi extulerunt, cernentes emolumenta Romani episcopatus, Petrique patrimonium super regna quæque amplissimum (licet eorum ignauia satis iam attenuatum) ad status reuerentiam, quem vltra imperatores & reges omniumque gentium principes in excelsis extolli statuerunt, nullo modo suffectura, in aliena ouilia, lana & lacte copiosa, incurrerunt.\* De ista Romanorum episcoporum auaritia, & insatiabili nummorum cupiditate, artibusque, quibus ad eam explendam utebantur, copiose differit, & hinc de litigiis curiæ Romanæ verba faciens: praeterea, inquit, multa alia me praeterire necesse est, si ex hac velim abyssu emergere, quot in Romana curia sint fraudes, quot doli, quot calumniae, quot per illos litium venatores pecunia corruptos contra innocentum iura insidiae, quot venalia illic iudicia? quantum ibi aurum valeat ad euerendam iustitiam? quam raro pauper optatum finem de lite referat, si modo aduersarium opulentum nactus fuerit? &c.\*\* Ad cardinales tum progreditur, & summam de iis pronuntiat: cardinales omnis nequitiae auctores. Hoc ita explicat: Quis enim nesciat feram, truculentissimam, omnia exterminantem, consumentem, profligantem, sectionis scilicet schismaticæ horrendam pestem, per nequitiam cardinalium in ecclesiae gremium iniectam, fotam, auctam, propagatam, tandiu inueteratam, quæ quanta cum pernicie per tres ferme & viginti

C 2

annos

\* cap. V. p. 7.

\*\* cap. IX. p. 19.

*annos ecclesiam omnibus viribus, omni laude, omni honore nudauerit, quantum eam in profundum omnium miserriarum & malorum demiserit, vix Tullius, si reuiuisceret, satis eloqui posset. Transeo Simoniacas apud papam intercessionem, transeo patrocinia venalia, transeo corruptiones, aut promotiones turpissimas & damnatissimas, quae omnes fere istis auctoribus & suasoribus fiebant &c. Nec enumerare volo eorum adulteria, stupra, fornicationes, quibus Romanam curiam etiam nunc incestant. Nec referre obscenissimam illorum familiae vitam, a dominorum tamen moribus nullatenus absonam. Sed nec illud etiam refero, quod vsuras & commercia publice exercent &c.\**

Atque hinc quum facile intelligi queat, cuiusmodi ea sint, quae de episcopis, ceterisque sacri ordinis viris, itemque de vita & moribus monachorum differit; plura vt ex eo adferamus, necesse non est.

Sufficere equidem haec possunt, inde vt omnes perspiciant, quo iure ecclesia Romana a *IAVORSKIO* exercitus Dei vini & sponsa Christi vocetur; facere tamen nequeo, quin ex tanto testium veritatis numero, quorum eo plures fuerunt, quo magis tempus illud, quo melior quodammodo ecclesiae reddi coepit facies, adpropinquauit, vnicum adhuc addam. Is est auctor libri, qui inscribitur *onus ecclesiae*, quemue *IOANNEM*, episcopum Chemensem esse ferunt. Certe in fronte editionis, quae Coloniae anno *MDXXXI*. prodiit, quae ego vtor, diserte dicitur: *auctor est Ioannes, episcopus Chemensis, reuerendissimi archiepiscopi Saltzburgenensis a suffragiis,*  
*sicut*

\* cap. XII. p. 13.



sicut nobis a fide dignis post huius libri impressionem, relatum est. Sunt, qui eum iam anno MDXIX. immo anno MDXV. lucem adspexisse volunt. Sed qui posterius adserunt, haud dubie falluntur, quum auctor iste iam Lutheri, eiusque contra indulgentias certaminis mentionem faciat. Vnde &, quod circa initium susceptae a beato Luthero ecclesiae emendationis, vixerit, colligere licet. In eo omnes consentiunt, de quo & nullum prorsus est dubium, auctorem Romanae ecclesiae fuisse addictum, virum insuper eruditum & cordatum, cuius adeo hac in re non potest non magni ponderis esse testimonium. Et generatim quidem de hominum istius aetatis, quae ante reformationem, & circa eius initium fuit, caecitate, hunc in modum verba facit: *Audi, quid coelestis aquila praedixit de hominum caecitate in cauda praesentis quinti status inualecente: & quintus angelus effudit phialam suam, id est, plagam ignorantiae, super sedem bestiae, id est, super multitudinem peruersae christianitatis. Nam ista angeli effusio est nostri excaecatio, qua Deus nos continue percutit. Et factum est regnum eiusdem bestiae tenebrosum. Per regnum denotatur ecclesia militans, quae modo est spelunca latronum; & constituitur ex quinque virginibus fatuis, quae, acceptis lampadibus fidei, non sumserunt secum oleum boni operis &c.\** Speciatim deinceps, de indispositione, vt vocat, curiae Romanae verba faciens, nimirum, inquit, ecclesiastica modo sublimitas multifariam est lacerata, hoc in apocalypsi ostenditur in apertione sexti sigilli, id est, moderni nostri

C 3

tempo-

\* cap. XVIII. fol. 32.

temporis. Quando sol, qui est spiritualis potentatus, factus est niger, quia non serenum coelum, sed tetrum infernum aperit, propterea peruersus pontifex nuncupatur angelus abyssi. Et luna, id est, potestas saecularis, est sicut sanguis contra ecclesiam tyrannizando. Et stellae, id est, praelati, qui in ecclesia lucere deberent, de coelo, hoc est, de coelesti conuersatione ceciderunt super terram, sequendo terrenam cupiditatem. Exin, totius ecclesiae causatur occasus. Imprimis sedes bestiae, id est, ecclesiae peruersae, est in curia Romana, cuius regnum est tenebrosus. Nam de Hierosolyma in typo Romanae ecclesiae legitur: quia rex Iuda, id est, princeps ecclesiae, fecit abominationes pessimas: propterea dicit dominus: ecce! ego inducam mala super Hierusalem, & delebo eam, sicut deleri solent tabulae &c.\* Integris deinceps itidem capitibus \*\* agit de excessibus episcoporum; de praelatorum aliorumque curatorum vita vitiosa; de peruersitate religiosorum & capitularium clericorum; de criminibus communis cleri &c. ex quibus si praecipua solum momenta delibare vellem, limites tamen multum transgressura tractatio nostra esset, quibus eam circumscribere mecum constitui.

Quodsi vero haec IAVORSKII amicos, aut qui cum eo faciunt, & haud dubie ex eadem cum illo disciplina prodierunt, nondum inducant, vt, vehementer eum errasse, credant, quando ecclesiam istam, quacum Lutheri pugnandum fuit, pro exercitu Dei vini, immo sponsa Christi venditauit; idem quoque

\* cap. XIX. §. V. & VI. fol. 35.

\*\* XX. seqq.



que integrorum conciliorum, immo ipforum Romanorum pontificum comprobare testimoniis possum. Atque ad concilia quod attinet, statim nobis occurrit Pisanum istud, ad schisma, quod inter pontifices, qui summam istam dignitatem sibi vindicabant, exortum, mirum in modum ecclesiam turbabat, lacerabatque, tollendum, anno MCCCIX. conuocatum. Atque hoc etiam tempore FRANCISCVS ZABARELLA, cardinalis, cuius antea iam facta mentio, librum conscripsit, quo probauit, concilii pariter ac imperatoris esse, vnionem & emendationem ecclesiae instituere. Sed & PILEVS, Genuensis archiepiscopus, longo sermone coram Gallis, ad concilium istud proficiscentibus, habito, foedam ecclesiae faciem ex funesto illo schismate ortam, hinc & summam morum, qua clericos, qua reliquos homines corruptionem acerbè deplorauit, simulque adeo quid in isto concilio agendum esset, significauit.\* Quumque in eo PETRVS DE CANDIA, cardinalis Mediolanensis, qui deinceps ALEXANDRI V. nomen adsumsit, pontifex electus esset, inter alia ecclesiae reformationem, in se suscepit. Quae licet sequuta non sit, manifestum tamen est, patres istius concilii eam, ob summam, quae vbique regnabat, labem, necessariam iudicasse. In concilio deinceps Constantiensi, anno MCCCXIV. conuocato, omnes vno veluti ore ecclesiae emendationem reformationemque vrserunt, constituti-que tandem sunt, quibus hoc negotium datum erat, vt, quo

---

\* conf. IAC. LENFANT *hist. concil. Constant. lib. VII. §. X. p. 630.*

vt, quo pacto ista correctio & emendatio omnium commodissime institui atque obtineri posset, consultarent, deliberarentque. Orta vero deinceps in eodem concilio disceptatio est, num ista emendatio decernenda prius esset, quam nouus pontifex eligeretur, quod cum Sigismundo, imperatore, Germani & Angli cupiebant, an vero, eo electo demum de ea cogitandum, quod alii, illi cumprimis, qui curiae Romanae rebus volebant consulere, contendebant. Quumque ex illorum, quibus posterius placuit, voto res cecidisset; Martino V. qui in isto concilio pontifex electus est, pulcherrima oblata fuit occasio, spem istam, quam de eo multi conceperant, eludendi, veramque ecclesiae emendationem, quam cordati & boni viri omnes tanto desiderio exspectabant, impediendi.\* Idem de concilio Basileensi, quod deinceps sequutum est, obseruandum. Non deerant in illo viri pii & docti, qui *reformationem ecclesiae in capite & membris* optabant, & serio vrgebant; sed nec deerant rursus, qui, vt consilia haecce salutaria irrita redderent, omnes ingenii & animi intendebant vires. Recteque WERNERVS ROLEVVINCKIVS, saeculi istius scriptor, pronuntiat: *In hoc concilio (Basileensi) multa bona instituta fuerunt, pro reformatione ecclesiae in capite & in membris. Habuit principium gloriosum, sed finem humilem & tribulatione plenum, propter schisma &c.*\*\*

Ad

\* conf. IAC. LENFANT l. c. lib. VI. §. XI. p. 553. §. XLVI. p. 597. seqq. alibique.

\*\* in fasciculo temporum, qui exstat in IO. PISTORII scriptoribus rerum german. tom. II. fol. 89.



Ad pontifices autem Romanos quod attinet, primum Clemens v. hic in censum venire poterat, quippe qui ad concilium Viennense, anno MCCCXI. conuocandum, hac, praeter alia, caussa se indutum videri voluit, vt in eo de ecclesiae emendatione consultatio institueretur. Immo GVILIELMO DVRANDO, Mimatenſi episcopo, supra iam a nobis laudato, mandauit, vt rationem, qua id fieri posset, ostenderet. Quod licet vir iste ingenuus optima fide in libro, *de modo celebrandi concilii generalis*, praestitisset; monitorum tamen eius saluberrimorum adeo nulla est habita ratio, vt res omnis ad constitutiones quasdam rediret, in quibus de rebus, ad religionem spectantibus, pro lubitu aliquid decernendi, facultatem pontifex ille sibi tribuit, quae deinceps sub *Clementinarum* nomine sunt editae. Accedunt vero & aliae rationes, quae abunde nos condocent, vt suam potius, quam ecclesiae, causam in hocce concilio ageret, Clementi constitutum fuisse; quamuis simul, summam ecclesiae corruptionem, & quod emendatione indigeret, eum factum esse, luculenter inde pateat. Nec dubium, quin & ex reliquis pontificibus quibusdam id perspectum fuerit, etsi animum, vt hisce malis medellam adferrent, inducere non potuerint. Certe, ferio quemquam ex illis hoc egisse, non constat, si Hadrianum vi. excipias, qui eo tempore, quum emendatio ecclesiae a Luthero inchoata magnum iam strepitum daret, summae rerum in ecclesia Romana admotus est. Virum hunc apertum & simplicem, artiumque alios fallendi prorsus ignarum,

D

magnis-

magnisque virtutibus praeditum fuisse, omnes vno ore fatentur. Ad cuius laudem hoc sufficit, quod ipsemet SFORTIAS PALLAVICINVS fateatur, plurimis, iisque solutioris vitae Italae electionem eius magno fuisse moerori, vel ideo, quod immodicas morum correctiones sibi metuerent, cum virtutem seueriores multitudo quidem veneretur, raro ad imperium extollat.\* Qui itaque ecclesiae consultum cupiebant, praeclara quaeuis atque egregia de hoc pontifice sibi pollicebantur, talemque oportere iudicabant esse, qui perditis ac profligatis orbis christiani rebus ferre auxilium deberet. Singularem quidam ratione id significauit CORNELIVS AVRELIVS, Gaudanus, cuius quippe exstat apocalypsis, siue viso mirabilis, super miserabili statu matris ecclesiae, & de summa spe eius reparandae ex inopinata promotione venerandissimi domini, domini Hadriani &c. Quem librum, dum primus in lucem protraxit CASP. BURMANNVS,\*\* vel hoc nomine ea haud indignum fuisse, pronuntiat,\*\*\* quod liberrime vitia clericorum, & eorum, qui suo tempore ecclesiastica moderabantur negotia, prodiderit. Addit porro: Neque tantum infimi ordinis clericorum vitia redarguit, verum & ipsos cardinales, episcopos, praelatos, aliosque, qui summae rei ecclesiasticae praefecti erant, nullis virtutibus, quibus apostoli, quorum se successores iactant, praediti & conspicui erant, ornatos, sed in

\* in vera concilii Tridentini historia lib. II. cap. III. §. I.

\*\* in Hadriano VI. siue analectis historicis de Hadriano sexto, Traiectino, papa Romano, Traiecti ad Rhenum MDCCXXVII. p. 259. seq.

\*\*\* in praefatione, operi isti praemissa.



sed in omne genus nequitiae, luxuriae & libidinis se immersisse, fateri non erubescit. Tantis vero vitiis ac sceleribus cum contaminati essent praesules, & summi rerum ecclesiasticarum moderatores, miserum profitetur ecclesiae statum, eumque non emendari, neque in melius corrigi posse docet, nisi aliquis praesideat sanctitate morum, doctrina, eruditione, aliisque virtutibus praeditus & conspicuus. Haec eum in finem recitavi, ut eo luculentius inde pateret, qualis eorum, qui inter Romanae ecclesiae addictos melioris notae erant, iudicio ecclesia fuerit, quam ab Hadriano, pontifice, corrigi atque emendari cupiebant. Atque haec omnia pontifici huic nota satis atque perspecta fuisse, vel inde manifestum est, quod anno MDXXII. Franciscum Cheregatum, episcopum Aprutinum, ad comitia Norimbergensia misit cum litteris & mandatis, in quibus magnam ecclesiae corruptionem, depravationemque ingenue fassus est, simulque occasionem imperii ordinibus praebuit, ut huic eius nuntio *centum* illa satis nota *grauamina nationis germanicae* exhiberent, cum grauissima, ut ea emenderentur, obtestatione. Quae iterum documento esse possunt, quam misera eo tempore ecclesiae fuerit facies, & quanto consensu omnes, saltem quos commodorum suorum studium non excaecauerat, eius correctionem, atque tot vulnerum sanationem exoptauerint. Enarrant copiosius, quod dixi, PAVLVS SARPIVS, qui se PETRVM SVAVEM POLANVM dici voluit, \* SFORTIAS PALLAVICINVS,\*\*

D 2

&amp; 10-

\* in *historia concilii Tridentini lib. I. p. 31. seqq.*

\*\* in *vera concilii Tridentini historia lib. II. cap. VII.*

& IOANNES SLEIDANVS, \* quorum nemo hac in re in dubium vocauerit fidem. Candor autem istius pontificis, quem hac in re demonstrauit, atque ingenua confessio illis, qui ecclesiae emendationem rebus suis minime expedire existimabant, vehementer displicuit; vnde non deerant, qui mox prudentiam, mox aliud quid in eo desiderarent, certe ad ecclesiae regimen, cuiusmodi scilicet illi id esse vouerunt, minime aptum esse censuerunt. Congerit talia, qui & ipse eiusdem est sententiae, SFORTIAS PALLAVICINVS, qui & citra ambages pronuntiare non dubitat, *Hadrianum fuisse optimum sacerdotem, sed pontificem re ipsa mediocre;* merito ideo castigatus a viro doctissimo, ecclesiaeque Romanae itidem addicto, IOANNE LAVNOIO, in epistola quadam, cuius summa hisce indicatur verbis: *Hadrianus VI. defenditur aduersus cardinalem Pallauicinum & alios aulae sectatores, qui Hadrianum ad regendam sedem Romanam minus idoneum fuisse calumniantur.* \*\* Et sane serio constitutum Hadriano fuisse, emendare ecclesiam, vel inde constat, quod eius rei initium aliquod in ipsa curia Romana fecerit, frementibus licet & indignantibus, qui sua commoda multum ecclesiae praeferebant saluti, vt pluribus, qui vitam pontificis huius descripsit, GERARDVS MORINGVS exponit. Interim non tantum plurimae maximaeque illi obieiebantur difficultates, quo minus voti sui compos fieri posset, sed & mors praematura ac inopinata spem omnem eius opera a sordibus istis, quibus

\* commentarior. de statu religionis &c. lib. III. p. m. 70. seqq.

\*\* epistolar. part. IV. epist. VII. p. 340. seqq.



quibus inuoluta erat, ecclesiam repurgatum iri, abruptit. Nec animi laetitiam, ob obitum pontificis huius, dissimulare potuerunt, qui nihil magis, quam ecclesiae & curiae Romanae correctionem metuebant, vt a viris fide dignis proditum memoriae est; \* quemadmodum & eum omnino ab eiusdem generis hominibus veneno e medio sublatum, nonnulli tradiderunt. \*\* Quantumuis autem isti Hadriani conatus omni destituebantur fructu, plena quoque qua doctrinam pariter ac mores longe corruptissimos ecclesiae emendatio ab eo exspectari non poterat; luculentissime tamen ex iis, quae de illo commemorauimus, patet, pontificem huncce miseram foedamque ecclesiae faciem perspectam habuisse, correctionisque summam agnouisse necessitatem. Nec eam prorsus negauit aut negare potuit, qui illum in sede Romana excepit Clemens vii. etsi candorem Hadriani ingenuamque confessionem, vtpote cum Romanorum pontificum commodis pugnantem, minime probaret. Partem enim quamdam grauaminum nationis germanicae, quorum antea facta est mentio, se correcturum simulauit, neglectis reliquis, eo quod, vt ipse aiebat, *auctoritati pontificis derogarent, & haeresin saperent.* Concilium porro, quod Carolus v. imperator ad componenda, quae circa religionem exorta erant dissidia, aptissimum iudicauit, quouis modo auersatus est, eaque ratione, quam alienus ab ecclesiae emendatione esset, satis demonstrauit.

D 3

strauit.

\* conf. CASP. BURMANNVS in *notis* ad GER. MORINI *vitam Hadriani* p. 77.

\*\* quos laudat idem BURMANNVS l. c. p. 79.

strauit. Nec mirum, tum huncce, tum alios pontifices, aegre admodum tulisse, si quis concilii mentionem faceret, aut, si se illud conuocatu-  
ros, simularent, inuitos admodum & contra animi fecisse sententiam; quum non sine horrore quodam eorum, quae in Constantiensi & Basileensi concilio gesta erant, recordarentur, euentus etiam deinceps comprobauerit, quanto labore, quot artibus, quot fraudibus opus illis fuerit, vt concilium eiusmodi coiret, quod se totum ad illorum nutum componeret, quale Tridentinum fuisse constat. In ipsa tamen illa pontificum Romanorum, aliorumque, qui cum ecclesia ista faciebant, lucta & concertatione, dum mox concilium declinare volebant, mox illud se adprobare simulabant, interim ne aliud, quam quod pontifici placeret, conuocaretur, omnem mouebant lapidem, clarissima euentissimaque summae corruptionis, qua ecclesia Romana laborauerit, continetur confessio. Omnia enim ista non ad sananda, sed ad tegenda ecclesiae vulnera, immo ad sanationem veram & solidam impediendam comparata erant. Sed vt de reliquis pontificibus, qui ecclesiae emendationem necessariam esse iudicarunt, adhuc aliquid dicam, referri inter illos etiam solet Marcellus II. qui tamen quum dies XXI. tantum summo huic in ecclesia Romana muneri praefuerit, nihil prorsus, quod momentum traheret, efficere potuit; quamquam non desint ex ipsis ecclesiae illi addictis, qui istud viribus eius maius fuisse negotium libere profiteantur. Ad Paulum itaque III. potius me con-  
fero, qui, quo maiori id agebat studio, vt omni-  
bus,



bus, quamuis contra animi sententiam, persuaderet, se ecclesiae serio cupere emendationem, eo luculentius de summa eius corruptione perhibuit testimonium. Non tantum enim concilium aliquod generale conuocandi voluntatem prae se tulit, sed & delectis quibusdam cardinalibus, vt de ratione repurgandi ecclesiam, decusque, quod amiserat, illi restituendi, consultationem instituerent, mandauit; vnde tandem *consilium illud delectorum cardinalium & praesulum aliorum de emendanda ecclesia iussu papae Pauli III. conscriptum, & exhibitum anno MDXXXVIII.* enatum est. In quo quum morbi & vulnera ecclesiae curiaeque Romanae apertius detegerentur, quam ipse volebat pontifex, & grauis insuper super eo inter cardinales oriretur contentio; imposito omnibus sacro de hoc negotio silentio, illud occultare voluit; nec tamen impedire *potuit*, quo minus nihilo secius euulgaretur. Qua quidem ratione factum, vt publicum aliquod atque perenne summae istius, qua ecclesia Romana laborabat, corruptionis exstaret monumentum.

Atque haecce, quae hucusque attulimus, testimonia, ex innumeris, quae adhuc addi potuissent, pauca, fide tamen dignissima, immo omni exceptione maiora, qui paullo accuratius ponderauerit, facile perspiciet, ecclesiam istam Romanam tot erroribus, tot vitiis, omni insuper superstitionis genere pollutam atque contaminatam, quacum Luthero res fuit, adeo *exercitum Dei viui*, prout IAVORSKIO videtur, atque *sponsam Christi* dici non posse, vt potius nemini vitio verti queat, si eodem, quo

IAVORSKIVS, sed longe iustiori zelo abreptus, eam, prout istum in modum corrupta ac deprauata fuit, exercitum draconis, & sponsam diaboli, dicendam contendat. Hinc & infeliciter admodum cum Goliatho Lutherum comparat, quippe in quem longe rectius quadrat, quod de Dauide dicitur, eum, quum Goliathum adgressurus esset, ita loquutum: *tu venis ad me cum gladio, & hasta & clypeo; ego autem venio ad te in nomine domini exercituum, Dei agminum Israel, quae tu probro adfecisti; 1. Sam. XVII. 45.* Solo enim verbo Dei munitus, omnibusque humanis praesidiis destitutus, Lutherus accessit ad pontificem, cardinales, episcopos, immo reges, principesque, qui ab illorum stabant partibus, quibus utique nec gladii, nec hastae, nec clypei deerant, interim impedire non poterant, quantumuis omni conatu id agerent, quo minus longe plurimi, immo integrae vrbes, prouinciae, regna ad veritatis agnitionem perducta, veram euangelii doctrinam amplecterentur. Non aliis itaque armis Lutherus, & qui cum eo in repurganda ab erroribus & superstitione, ecclesia elaborarunt, vsi sunt, quam quae Paulus apostolus commendat *II. Cor. X. 4. 5.* quum contra, quatenus Romanensium sint, neminem, nisi qui ea, quae ab iis in Germania, Gallia, Belgio, Anglia, alibique ad extirpandos haereticos, quos vocant, gesta sint, prorsus ignorat, fugere potest.

Vt autem IAVORSKIVS protestantes Ruthenis inuisos reddat, quae Lutherus ad vitia & errores ecclesiae Romanae detegendos refellendosque gessit, non minus ad Graecos pariter ac Ruthenos spectare, aliis



aliis persuadere cupit. *Scio, inquit, aduersarium hunc arcum suum in papam & Romanam ecclesiam intendisse, sed tela eius venenata & nos attingunt.* Qua in re

ne incautis & rerum imperitis, quod illi haud dubie constitutum fuit, fucum faciat, paucis, quae veritati consentanea sunt, exponere iuuabit. Luthero non cum Graecis aut Ruthenis, sed cum pontifice Romano eiusque adseclis rem fuisse, omnibus notum est. Non minus vero constat, nostrates non semel arctiorem cum ecclesia Graeca coniunctionem quaesuisse. Eum in finem PHILIPPVS MELANCHTHON DEMETRIO, ecclesiae Constantinopolitanae diacono, qui Wittebergam venerat, ibique per semestre commoratus fuerat, domum reuertenti epistolam commisit, graece exaratam, ad IOSEPHVM, patriarcham Constantinopolitanum, vna cum Augustana confessione graece etiam translata, inde vt condisceret, nihil nos docere, quod non cum scriptura sacra, veterisque ecclesiae scitis, consentiret. Deinceps circa annum MDLXXV. commercium aliquod litterarium de capitibus religionis christianae, cognitu ad salutem necessariis, inter IEREMIAM, patriarcham itidem Constantinopolitanum, & IACOBVM ANDRAEAE, aequae ac MARTINVM CRYSIVM, illum theologiae, hunc graecae linguae in academia Tubingensi professorem, institutum fuit, promouente hoc STEPHANO GERLACHIO, qui legati apud Turcas caesarei Davidis Vngnadii a concionibus sacris fuit; idque pariter eo comparatum erat, vt innocentia nostrae ecclesiae doctrinaeque puritas Graecis innotesceret.

sceret, & hoc pacto arctiori coniunctioni occasio praeberetur. Quod quidem licet fructu atque successu exoptato caruerit; ex responso tamen patriarchae patuit, Graecos a Romana non minus, quam a nostra dissentire ecclesia, immo a Romana magis, quam a nostra. Nec tamen, quod in quibusdam dissentiamus, nobis vitio verti potest; quum non ex cupiditate Graecam aut Ruthenicam ecclesiam impugnandi, sed veritatis studio dissensus ille oriatur, qui statim evanesceret, si qui secus sentiunt, illi locum relinquere vellent. Dogmata itaque nostra a Graecorum ac Ruthenorum placitis diuersa, vti perquam inique a *IAVORSKIO* tela vocantur; ita multo minus venenata dici possunt, nisi hoc ita intelligas, quod ad extinguendos errores ac superstitionem enecandam valeant. Quodsi qui inter Graecos pariter ac Ruthenos, ingenio ac eruditione praestant, quales haud paucos inter eos esse nouimus, animo a praeiudicatis opinionibus purgato, studioque partium tantisper remoto, dogmata nostra paullo accuratius considerare, & ad scripturam sacram, ceu vnicam veritatis normam exigere vellent, statim intellecturi essent, nihil in iis venenati deprehendi, nec ad cuiusquam perniciem, sed ad omnium potius hominum salutem ea esse comparata. Saltem non dubito, quin multi inter eos longe mitius de nostris, quam de Romanae ecclesiae dogmatibus existimaturi sint; quum nemini ignotum sit, longe plura maiorisque momenti esse capita, in quibus a Romana ecclesia Ruthenica dissentit, quam in quibus a nostra seiungitur. Nul-  
lum



lum itaque a nostrae ecclesiae telis, si dogmata veritati consentanea ita vocare velis, Ruthenicae imminet periculum, quum longe iustiores grauiioresque non tantum a telis venenatis, sed & a tyrannide & iugo Romanae ecclesiae sibi metuendi habeat causas. Sed haec nota satis sunt, atque in aprico posita.

Considerabimus potius ea, quae IAVORSKIUS speciatim in nostra ecclesia desideret. Horum primum est, quod sacra, vt ipse quidem opinatur, reiciamus ieiunia. *Considera, inquit, quae dico, & perspice veritatem. Haec verba Christi: quae intrant in os hominis non contaminant eum, sed quae egrediuntur ex ore, huic (Luthero) lapis offensionis & scandali fuerunt. Ad haec offendens reiecit sacra ieiunia ex sancta ecclesia.* Lutherum aut nos cum illo omnia prorsus reiicere ieiunia, falsum est, & a veritate quam longissime remotum. Quin potius vt ieiunia, si recte, & vt decet, instituantur, ceu ad vitae sanctitatem custodiendam admodum vtilia & salutaria, vehementer commendamus; ita superstitiosa contra, hypocritica, histrionica, coacta, iure meritoque reiicimus ac detestamur. Superstitiosa autem ea voco, quando homines peccatis grauissimis sceleribusque immerfi, nullaque de re minus, quam de vera vitae morumque emendatione solliciti, ieiuniis placare Deum, sibi que propitium reddere adnituntur; adeoque in iis, vt aliis eiusdem generis actibus externis, omnem diuini Numinis cultum collocant. Quam vehementer eiusmodi ieiunium Deo displiceat, ipsemet testatur, quando Iudaeos, ad talia itidem prouocantes, dicentesque; *cur nos ieiunantes non respicis? & nos*

*ipſos ſubigentes non curas? per Eſaiam vatem hunc in modum adloquitur: en! tum quum ieiunatis, libidini ſatisfacitis, & omnia, quae vobis debentur, exigitis; en! ad lites & iurgia ieiunatis & ad pugnis impie caedendum. Ne iſto pacto ieiunaueritis, vt in alto vox audiatuꝝ veſtra. Hoccine eſt ieiunium, quod ego adprobem? dies, quo ſe ipſum ſubigat homo? ſcilicet vt caput in iunci modum curuet, centone ſtratus & puluere. Hoccine vocandum eſt ieiunium & fauorabilis domini dies? Enim vero hoc eſt, quod ego adprobem ieiunium, impietatis aperire nexus &c. cap. LVIII. 3. 4. ſeq. Hypocritica ieiunia illa adpellito, quando homines oſtentationis cauſſa ea inſtituunt, vt ſingularem quamdam ſanctitatis ac pietatis ſibi concilient opinionem. Talia erant ieiunia Phariſaeorum, quos hoc nomine ipſe ſeruator reprehendit. Quum autem ieiunatis, inquit, ne eſte tetrici, quales hypocritae, qui vultus ſuos deformant, vt aliis adpareat eos ieiunare. Hoc vobis confirmo, eos ſuum abſtuliffe praemium. At tu ieiunans vngito tibi caput, & vultum lauato; ne perſpicuum ſit aliis hominibus ieiunare te, ſed patri tuo, qui occultus eſt &c. Matth. VI. 15. 16. Hiſtrionica mihi audiunt, quando homines a certo equidem ciborum genere ſe abſtinent, interim aliis, non minus prauas cupiditates irritare aptis, ventrem replent. Delectum equidem ciborum non improbo; immo ſi quis caſtitati ac ſanctitati ſtudeat, vt a cibus & potu fouendae alendaeque, aut excitandae libidini inſeruientibus ſibi caueat, prudentia non tantum ſuadet, ſed & temperantiae leges iubent. At qui a certis equidem cibus ſe abſtinent, ſed in illorum locum alios, quorum, ſi non maior,  
certe*



certe eadem ad prauas cupiditates excitandas vis & efficacia est, substituunt, & illud nihilosecius ieiunium vocant, immo partem quamdam cultus diuini in eo constituunt, quod in ecclesia Romana haud infrequens est, nihil aliud mihi agere videntur, quam vt non tantum sibi ipsis, sed & Deo il- ludant. Quare & nihil, quod a veritate alienum sit, aut reprehensionem mereatur, me dixisse arbi- tror, quando eiusmodi ieiunium histrionicum vo- caui. Tandem & coacta improbamus ieiunia. Quum enim cultu spontaneo & libero Deus delectetur; quidquid coacti ac inuiti homines faciunt, illi non displicere nequit. Quae autem ex ecclesiae prae- scripto certo tempore certisque diebus instituenda sunt ieiunia, ita vt in eam miseri mortales simul in- ducantur opinionem, ea sine peccato mortali omit- ti non posse, quis, quaeso, voluntaria ac spontanea dixerit? Quumque nihilo *secius* multi ea non obser- uent, quum tamen *se* ad ea obseruanda obstrictos cre- dant, non possunt non grauissime vulnerare consci- entiam. Ista vero omnia quam parum cum vera re- ligionis christianae indole conueniant, nemo non perspicit.

Ea itaque ieiunia, quae cum sincero vitae fan- ctiae studio sunt coniuncta, aut ad illud promouen- dum comparata, quae libere & sine vlla coactione suscipiuntur, Deoque adeo placere possunt, tantum abest, vt improbemus aut reiiciamus, vt eorum numquam non ostendamus necessitatem. Immo il- lud Pauli, *eos, qui Christi sunt, carnem suam cum libidi- nibus & cupiditatibus crucifigere; Gal. V. 23. carnis ita ge-*

rendam curam, ne cupiditatibus indulgeamus, Rom. XIII. 14. diuinam, quae cunctis hominibus adparuit, gratiam, erudire nos, ut impietati mundanisque cupiditatibus valedicto, frugaliter, & iuste, pieque viuamus in hac saeculo, Tit. II. 11. 12. quotidie nostris inculcamus. Subinde & solemnia apud nos indicuntur ieiunia, diesque tum integros sine potu & cibo, inter preces & verbi diuini meditationem, cum grauissimis ad vitam mentemque serio emendandam adhortationibus transigimus; sine vlla tamen eiusmodi, qua conscientiae vis inferatur, coactione. Atque ita ad exemplum primitiuae, cum primis apostolicae, nos componimus ecclesiae. Ieiunia enim in ea non erant infrequentia, praesertim quum variae, quibuscum apostolis, aliisque conflictandum erat, calamitates haec velut imperabant, ut ad preces eo paratiores essent; quemadmodum & seruator hoc illis praedixerat, fore ut, sponsa ab eis ablato, ieiunarent, Matth. IX. v. 15. Praeterea, quum magni aliquod momenti negotium suscipiendum, Deique ad hoc auxilium impetrandum erat, cum precibus ieiunia coniungebant, act. XIII. 2. 3. Certum autem tempus, certosque dies, ieiuniis destinatos, aut eorum per leges quasdam impositam necessitatem, ciborumque obseruatum discrimen, nullo testimonio, nullo exemplo comprobari potest. Immo secus se rem habuisse, ipsemet Paulus apostolus luculenter nos conducet, quando, quicquid, inquit, in macello venale est, vescimini, nihil sciitantes propter conscientiam; nam domini & terra est, & omnia terrestria, I. Cor. X. 25. Et iterum: Quod si quis infidentium vos inuitat, & vultis ire, quicquid vobis appone-



*apponetur, vescimini, nihil sciscitantes propter conscientiam; hoc est, ne sine causa & necessitate conscientiae scrupulum iniiciatis, vers. 27. Scio sermonem ibi esse de idolothytis; si tamen certo tempore certisque diebus christiani ab hoc aut alio ciborum genere se abstinere debuissent, haud dubie exceptionem quamdam aut restrictionem addidisset apostolus, nec ἀπλῶς dixisset: quicquid in macello venale est, vescimini; item, quicquid vobis apponetur, vescimini. Confirmat hoc idem, quando ad Colossenses scribit: Quare nemo vos damnet ob cibum aut potionem, aut festorum discrimen, aut nouilunia, aut sabbatha; cap. II. 16. Quibus verbis dum discrimen illud ciborum, quod ex lege Mosaica erat, sublatum docet; simul in nouo testamento eiusmodi quid locum non inuenire significat. Nimirum quum non deessent ex haereticis, qui in ciborum discrimine singularis sanctitatis laudem quaererent, istudque obtrudere aliis adniterentur; acriter eos reprehendit apostolus, &, vt ab iis (Cerinthianos, vt admodum est verosimile, innuens) sibi cauerent, Colossenses admonet. Quod si, inquit, vna cum Christo, quod ad mundi elementa attinet, mortui estis, cur, tamquam in mundo viuentes, vtimini placitis? ne tetigeris, neue gustaueris, neue attrectaueris. Luculenter inde constat, existisse eo tempore homines, qui magnam sapientiae ac sanctitatis sibi tribuebant speciem, simulque ab illis, qui ad eundem perfectionis gradum contendere volebant, postulabant, vt & a matrimonio, & certis ciborum generibus se abstinere, immo vt quaedam nec attingerent, ne hac ratione polluerentur.*



tur. Quam parum autem illud hominum istorum institutum adprobet, indicat apostolus, quando addit: *ἀ ἐστὶ πάντα εἰς φθορὰν τῇ ἀποχρήσει*. Quorum verborum sensus est, quod istarum rerum abusus animae hominis perniciem & interitum conciliet; idque eo magis, quod talia nulla lege diuina nitantur; sed, vt porro subiicit, sint *ἐντάλματα καὶ διδασκαλίαι τῶν ἀνθρώπων*, *praecepta & doctrinae hominum*, quae adeo non tantum vt inutiles, sed omnino noxiae fugiendae sint omni studio ac euitandae. Nec praetermittendum, quod in iisdem hominibus praeter *ἐθελοθρησκείαν cultum electitium* & *ταπεινοφροσύνην humilitatem*, quam prae se ferebant, notet *ἀφειδίαν σώματος*, hoc est, quod corpori non parcerent, sed (per ieiunia frequentissima aliaque ratione) durius illud haberent, *ἐκ ἐν τιμῇ τινι*, adeo vt nullum illi statuere pretium viderentur, nec, quae debebant, illi praestarent, eaque in re magnam sapientiae speciem quae- rerent, (*ἀπνὰ ἐστὶ λόγον μὲν ἔχοντα σοφίας*) simulque monet, quod cuncta ista tandem tendant, *πρὸς πλησμονὴν τῆς σαρκὸς* *ad expletionem siue satietatem carnis*, hoc est, vt sub ista sapientiae & sanctitatis singularis specie ambitioni suae vanaeque gloriae studio, ceu cupiditati itidem carnali, indulgerent, aliosque adeo deciperent. Atque haec vt paullo diligentius considerarent, vellem, qui cum IAVORSKIO coacta sua, superstitiosa & hypocritica ieiunia tantopere iactitant, ac dispicerent, an forte suam in hisce, quos Paulus perstringit, haereticis, deprehensuri essent imaginem?

Post apostolorum tempora, & saeculo quidem  
secun.



secundo, varia in ecclesia christiana institui coeperunt ieiunia. Ne quid enim de illorum ieiunio dicam, qui, postquam in graue aliquod peccatum prolapsi, eius se poenitere satis significauerant, recipiendi iterum erant in communionem ecclesiae; nec de illorum, qui mox baptizandi erant; ieiunium aliquod ante-paschale iam tum in vfu fuisse, neutiquam negamus. Nec tamen in hisce omnibus quidquam, quod cum libertate christiana pugnaret, conspiciebatur. Testem huius rei omni exceptione maiorem habemus IRENAEVM, qui Victorem, episcopum Romanum, quod ob diuersum paschatos tempus, diuersaque ieiunia, ab ecclesiae communione omnes Asiae coetus remotos vellet, reprehendens, non vnam eandemque eo tempore ieiuniorum fuisse rationem, diserte docet. οὐδὲ γὰρ, inquit, μόνον περὶ τῆς ἡμέρας ἐστὶν ἡ ἀμφισβήτης, ἀλλὰ καὶ περὶ τῆς εἰδὸς αὐτῆς τῆς νηστείας· οἱ μὲν γὰρ οἰοῦνται μίαν ἡμέραν δεῖν αὐτῆς νηστεύειν· οἱ δὲ δύο, οἱ δὲ καὶ πλείονας. οἱ δὲ τεσσαράκοντα ὥρας ἡμερινὰς τε καὶ νυκτερινὰς συμμετρῶσι τὴν ἡμέραν αὐτῶν· καὶ τοιαύτη μὲν ποικιλία τῶν ἐπιτηδεύων, ἃ νῦν ἐφ' ἡμῶν γεγυῖα, ἀλλὰ καὶ πολὺ πρότερον ἐπὶ τῶν πρὸ ἡμῶν· τῶν παρὰ τὸ ἀκριβὲς ὡς εἰκὸς κρατάντων, τὴν κατ' ἀπλότητα καὶ ἰδιωτισμὸν συνήθειαν εἰς τὸ μετέπειτα πεποιηκότων. Neque enim de die solum controuersia est, sed etiam de forma ipsa ieiunii. Quidam enim existimant unico die sibi esse ieiunandum; alii duobus, alii pluribus; nonnulli etiam quadraginta horis diurnis ac nocturnis computatis diem suum metiuntur. Atque haec in obseruando ieiunio varietas non nostra primum aetate nata est, sed longe ante apud maiores nostros coepit, qui negligentius, vt verosimile est,

*praesidentes, ex simplicitate & imperitia ortam consuetudinem posteris tradiderunt.\** Dum non tantum sua aetate magnam in ieiuniis obseruandis fuisse varietatem, dicit, sed iam antea quoque apud maiores suos eodem modo se rem habuisse, profitetur; nullam in veteri ecclesia primi & secundi saeculi existisse legem, qua ad illa homines adstringebantur, longe inde est manifestissimum. Confirmat idem TERTULLIANVS. Quando enim Montani haeretici eiusque sectatorum causam contra orthodoxos seu catholicos agit, hos introducit talia illis obiicientes, quae sequenti aetate, quum superstitionis & tenebrarum regnum inualesceret, recepta sunt in ecclesia atque legibus sancita. *Arguunt nos, inquit, quod ieiunia propria custodiamus, quod stationes plerumque in vesperum producamus, quod etiam xerophagias obseruemus, siccantes cibum ab omni carne, & omni iurulentia & vuidioribus quibusque pomis; ne quid vinositatis vel edamus vel potemus; lauacri quoque abstinentiam, congruentem arido victui.* Nouitatem igitur obiectant, de cuius illicito praescribunt &c. Certe, ita, quibusdam interiectis, pergit, in euangelio illos dies ieiuniis determinatos putant, in quibus ablatum est sponsus, (antepaschale ieiunium significat, quod iam tum receptum fuisse, ante diximus, quamquam, quod in euangelio, seu a Christo ipso hoc constitutum vel praeceptum sit, perperam adseratur) & hos esse iam solos legitimos ieiuniorum christianorum, abolitis legalibus & prophetis vetustatibus &c. Itaque de cetero differentes

\* apud EUSEBIUM *hist. eccles. lib. V. cap. XXIV. p. 192.*



*tes ieiunandum ex arbitrio, non ex imperio nouae discipli-  
nae, pro temporibus & caussis vniuscuiusque. Sic &  
apostolos obseruasse, nullum aliud imponentes iugum cer-  
torum & in commune omnibus obeundorum ieiuniorum.*  
Nihil luculentius dici poterat. Intelligimus autem  
inde, catholicos seu orthodoxos eodem modo iis-  
demque rationibus Montanistarum reiecisse ieiunia,  
quibus & nos contra illa, quae Romana ecclesia non  
sine tyrannide quadam obtrudere omnibus adniti-  
tur, pugnamus. Namque & illud est, quod & nos  
aeque ac veteres isti, qui Montanistis sese opposue-  
runt, adserimus, *ex arbitrio, seu libere, sine coactio-  
ne, non ex imperio nouae disciplinae, pro temporibus &  
caussis vniuscuiusque ieiunandum esse; hoc est, quod  
contendimus, nullum iugum certorum & in commune  
omnibus obeundorum ieiuniorum hominibus imponendum  
esse; \** & quae reliqua sunt eiusdem generis. Paullo  
accuratius etiam qui ista considerauerit, cognoscet,  
non errare illos, qui seuerae istius disciplinae, quae  
aliis necessitatem ieiunandi imponit, originem a  
Montano haeresiarcha repetunt. Id enim non tan-  
tum ex TERTVLLIANO constat, qui iam Montani  
sectator factus, acriter eam contra catholicos seu  
orthodoxos defendit, sed confirmat id etiam APOL-  
LONIVS apud EVSEBIVM. Αλλὰ τίς ἐστιν, inquit,  
ἐκτός ὁ πρόσφατος διδάσκαλος; τὰ ἔργα αὐτοῦ καὶ ἡ διδασκα-  
λία δεικνύουσιν. Ἐπὶ τίς ἐστιν ὁ διδάξας λύσεις γάμων ὁ νηστείας νο-  
μοθετήσας. Sed quisnam est nouus ille doct̃or? opera eius &  
doctrina satis aperte produnt. Hic est, qui nuptiarum disci-  
dia

F 2

\* lib. de ieiuniis cap. I. & II. p. 701.

*dia docuit, qui ieiuniorum leges imposuit.\* Immo & abstinentiae istius a certis ciborum generibus, in qua nonnulli ieiunii quamdam speciem constituunt, origo non sine ratione a Montano deriuatur. Licet enim & apud Encratitas, Marcionitas, aliosque haereticos simile quid deprehendamus; quum tamen Romanae ecclesiae addicti, & qui cum illis faciunt, regerere queant, se a dogmatibus, ex quibus istorum haereticorum error ille fluxit, alienos esse, rectius cum Montanistis eos comparamus, quibuscum vt plane in hocce capite consentiunt, ita quod reponere queant, nihil illis relinquitur. Nimirum non tantum ciborum discrimen Montanistae obseruabant, vt verba TERTVLLIANI, quae antea iam recitauimus, *xerophagias obseruamus, siccantes cibum ab omni carne &c.* nos condocent; sed id itidem certis duntaxat faciebant diebus, vt deinceps in ecclesia receptum est, adeoque ob longe aliam caussam, alioque modo, quam Encratitae, Marcionitae aliique. Testatur hoc iterum TERTVLLIANVS, dum negat, apud suos perpetuam abstinentiam praecipi ad destruenda & despicienda opera creatoris; quales, inquit, inueniam apud Marcionem, apud Tatianum, apud Iouem hodiernum de Pythagora haereticum; non apud paracletum &c.\*\* Interim Montanistarum non minus, quam Encratitarum aut Marcionitarum istum ciborum delectum, quamuis certo tantum tempore instituendum, reiiciebant & damnabant veteres, adeoque hoc ipso demonstrabant, discrimen illud ciborum, aequae ac ieiuniorum, quod*

\* *hystor. ecclesiast. lib. V. cap. XVIII. p. 184.*

\*\* *lib. de ieiuniis cap. XV. p. 712.*



quod omnibus obtrudere volebant obseruandum, ecclesiae hucusque prorsus ignotum fuisse. Deinceps equidem non vnā ob causam ieiunia sunt instituta; maxima tamen in hisce saeculo adhuc quarto omnium permansit libertas. Dubium equidem aliquod moueri potest ex concilii Laodicensi, anno CCCLXVII, vt viris quibusdam doctis obseruatum, celebrati *canone quinquagesimo*, qui ita se habet: ὅτι ἡ δὲ ἐν τεσσαρακοστῇ τῇ ὑστέρα ἐβδομαδὶ τὴν πέμπτην λύειν, καὶ ὅλην τὴν τεσσαρακοστὴν ἀτιμάζειν. ἀλλὰ δὲ πᾶσιν τὴν πεντηκοστὴν νηστεύειν ξηροφαγῶντας. *Quod non oporteat in quadragesimae postrema septimanae quintae feriae ieiunium soluere, & totam quadragesimam debonestare; sed oportet totam quadragesimam ieiunare aridis vescerentur.* \* Et sane condiscimus inde, eo tempore, hoc est, saeculo quarto iam adulto plurimum hebdomadam quadragesimam in vsu fuisse; immo condiscimus, in vsu fuisse, vt diebus, ieiunio sacris, aridis vescerentur. Quod si etiam concederemus, per istam canonem quadragesimae & xerophagiae obseruationem omnibus ita impositam, vt ad eam, ceu ex lege quadam seu praecepto essent obligati; nobis tamen sufficeret, quod ecclesia christiana per tria ab eius initio saecula & dimidium quarti eiusmodi legem ignorauerit. Nec tamen iam euictum, per canonem hunc eiusmodi legem omnibus impositam. Non enim concilii istius hoc sibi voluisse patres, sed potius constitutum illis fuisse, quorundam, qui a more recepto discedebant, corrigere errorem, & quomodo quadragesima ab iis, qui eam obseruandam suscipiunt, obseruari de-

F 3                      beat,

\* in GVIL. BEVEREGII *pandectis canon. eccl. graec. tom. I. p. 476.*

beat, docere, ex iis, quae THEODORVS BALSAMON ad huncce canonem adnotauit, colligere licet. Idque illorum, qui saeculo adhuc quarto & quinto libertatem in hisce per legem quamdam nondum sublatam, adserunt, testimoniis confirmari potest. Atque hos inter ipse est EPIPHANIVS, qui contra apostolicos, vt haeretici quidam vocabantur, disputans, καὶ ἀπέχονται, inquit, βρωμάτων πολλοί, ἀλλ' ἔφυσιῶνται κατὰ τῶν μὴ ἀπεχομένων· ὁ γὰρ ἐδίων, τὸν μὴ ἐδίωντα μὴ ἐξεδενείτω. καὶ ὁ μὴ ἐδίων, τὸν ἐδίωντα μὴ κρινείτω· χρεῖσθ' γὰρ ἐσθίει καὶ πίνει. *Ad haec a ciborum usu temperant multi, sed non contra eos, qui illis vtuntur, superbe se gerunt. Qui enim manducat (verba sunt apostoli Rom. XIV. 3.) non manducantem non contemnat, & qui non manducat, manducantem non iudicet. Christo enim manducat, & bibit.\** Dum enim dicit multos, non autem omnes, a ciborum usu sibi temperasse, hosque eos, qui id non faciebant, neutiquam ideo contempsisse aut damnassee, idque ipsemet approbat & effato apostoli confirmat, libertatem in hisce omnibus integram fuisse, meritoque relinqui, aperte significat. Pari ratione & THEODORETVS, quem saeculo quinto floruisse, constat, quum de haeticis dixisset, quod a vino esuque carnum, tamquam abominandis, abstinere praecipiant, ἡ δὲ ἐκκλησία, inquit, ἐδὲν περὶ τῶν νενομισμένων· ἔδὲ γὰρ ἀπαγορεύει τὴν τῶν μετὰληψιν τῶν χάρων ἀδεῶς, οἱ μὲν τῶν νενομισμένων ἡδέων ἀπολαύουσιν, οἱ δὲ ἀπέχονται· κτεκεῖναι δὲ ἐδεῖς τῶν εὐφρογνῶντων τὸν ἐδίωντα, καὶ ἡ ἀποχή γὰρ, καὶ ἡ μετὰληψις, ὑπὸ τὴν ἐξουσίαν τελῶσι τῆς γνώμης. *Ecclesia vero de his nihil praecipit. Neque enim horum usum interdicit. Ideo alii quidem permissis*  
*volupta-*

\* haeresi LXI. p. 507.



*voluptatibus securi fruuntur, alii vero abstinent. Et nemo, qui recte sapiat, condemnat eum, qui comedit. Nam & abstinentia & participatio sunt in mentis potestate. \**  
 Cum primis autem hic audiendus est SOCRATES. De variis enim ecclesiarum ritibus ex instituto verba faciens, ieiunia illa, quae ante pascha fiunt, aliter apud alios obseruari, adferit. Nam, qui Romae sunt, tres continuas hebdomadas ante pascha, exceptis sabbatho & dominico die, ieiunare; qui vero in Illyrico, & per vniuersam Achaïam, & qui Alexandriae degunt, sex ante pascha septimanas, idque ieiunium eos quadragesimam vocare; alios rursus diuersum ab illis morem sequutos, septima hebdomade ante pascha ieiunium ordiri, ac tres duntaxat septimanas, quinque dierum singulos per interualla ieiunare, & nihilominus hoc tempus quadragesimam adpellare. Neque vero in dierum numero solum, verum etiam in ciborum abstinentia discrepantiam quamdam reperiri, porro docet. Alios enim ab animatis penitus abstinere; alios ex animantibus pisces solos comedere; nonnullos cum piscibus, etiam auibus vesci, ex aquis, ut est apud Mosem, eas quoque conditas adfirmantes; quosdam ab omni arborum fructu & ab ouis abstinere; quosdam solo vesci pane; alios ne hoc quidem vti. Atque hisce quum & alia quaedam addidisset, tandem concludit: καὶ ἐπειδὴ εἰδὲς περὶ τῶτων ἐγγράφον ἔχει δεῖξαι παρὰ γγελμα, δῆλον ὡς καὶ περὶ τῶτων τῇ ἐκείνῃ γνώμῃ, καὶ περὶ αἰρέσει ἐπέτρεψαν οἱ ἀπόστολοι, ἵνα ἕκαστος μὴ φόβῃ, μὴ δὲ ἐξ ἀνάγκης τὸ ἀγαθὸν κατεργάζοιτο.

Et

\* haeret. fabular. lib. V. cap. XXIX. tom. IV. oper. p. 316.

*Et quoniam nemo scriptum de hac re praeceptum proferre potest, apparet apostolos arbitrio cuiusque ac voluntati id permisisse, ut unusquisque, quod bonum est, sua sponte, non metu ac necessitate perageret. \** Idque prorsus illud est, quod & nostra hac in re profitetur ecclesia; quum apostoli nullas ieiuniorum leges nobis reliquerint, cuiusque arbitrio ad tempus & modum quod attinet, ea esse relinquenda, ut unusquisque, quod bonum est, sua sponte non metu ac necessitate peragat. Similia prorsus habet SOZOMENVS, cuius de variis apud varias prouincias & ecclesias ritibus narrationem \*\* legisse, poenitebit neminem, quum inde luculenter pateat, veterem ecclesiam sua in hisce usam libertate; cuius quum & nos sequamur exemplum, non potest IAVORSKIVS nos reprehendere, ut non simul omnes, quotquot in quatuor prioribus a Christo nato saeculis, quo tempore optimam adhuc felicissimamque ecclesiae fuisse faciem, nemo ignorat, vixerunt, christianos, immo ipsos apostolos, utpote quibus numquam in mentem venit, eiusmodi ieiuniorum leges aliis praescribere, redarguat atque condemnet. Quae autem sequenti aetate, ubi iam corrumpi mirum in modum variisque erroribus coinquinari ecclesia coepit, introducta sunt, in regulam atque normam, quam sequamur, statui atque proponi nequeunt.

A ieiuniis IAVORSKIVS progreditur ad imagines. *Verba Dei, inquit, ne facias tibi imaginem, nec ullam similitudinem ipsi* (Luthero) *lapis offensionis fuerunt.*

\* *hystor. eccles. lib. V. cap. XXII. p. 286.*

\*\* *hystor. eccles. lib. VII. cap. XIX. p. 734.*



*runt. Inde reiecit sacras imagines ex sancta ecclesia. Sed falsissimum est, quod hic IAVORSKIVS adserit, Lutherum, aut qui eius doctrinam sequuntur, imagines sacras prorsus ex ecclesia reiecis-  
se. Immo retineri eas ac tolerari in templis posse, vt illorum, quos exhibent, vitam, fata, virtutes, nobis in memoriam reuocent, profite-  
mur; adorandas autem, aut cultu religioso prosequendas esse, id vero est, quod prorsus negamus. Solum enim Deum adorandum, eumque solum colendum esse, & ipsa ratio omnes condocet, & scriptura quoque testatur, Deut. VI, 13. X, 20. Matth. IV, 10. Vnde & consequitur, ab idololatriae grauissimo crimine eos absolui non posse, qui cultum illum ac honorem, soli Deo debitum, quocumque modo rebus aliis deferunt. Tantumque abest, vt verba, quibus imaginum eiusmodi cultus diserte prohibetur, beato Luthero lapis offensionis, vt IAVORSKIO videtur, fuerint, vt illi potius in superstitionem & idololatriam praecipiti lapsu ruere censeantur merito, qui, relicta scriptura sacra, eiusque testimoniis euidentissimis insuper habitis, traditiones hominum, maiorumque sequuntur consuetudinem. Negandumque non est, Graecam non minus, quam Romanam hic a recto tramite deflexisse ecclesiam, quamuis illius tolerabilior in quibusdam, quam huius sit sententia; nec tamen ideo ab omni superstitione aut idololatria prorsus aliena. Graecos nimirum imagines non sculptas, vtpote quas, tamquam idola, fugiunt, sed pictas tantummodo habere ex METROPHANE CRITOPVLO, \* EVSTRATIO IO-*

G

ANNI-

\* in confessione ecclesiae orientalis cap. XV. p. 128.

ANNIDE ZIALOVVSKIO, \* aliisque constat. Praeterea, licet Christi, & sanctorum, angelorumque, prout in humana forma adparuerunt, imagines in pretio habeant; ipsius tamen Dei apud illos imaginem non reperias, vtpote quem, ceu spiritum infinitum, effigie quadam aut coloribus pingi posse negant, immo id sine crimine fieri non posse, adserunt. Cultum denique, quem *δολείαν* vocant, illis tantum deferendum docent; neutiquam autem eum, qui *λατρεία* adpellitur, quivse soli tantum debeat Deo. Mentem illorum hac de re atque sententiam ex *orthodoxa confessione catholicae atque apostolicae ecclesiae orientalis* intelligere licet, vtpote in qua ad quaestionem: *Quid statuendum de imaginibus, quas adorant ac colit orthodoxa ecclesia?* respondetur: *μεγάλη διαφορά είναι ανάμεσα τῶν εἰδώλων καὶ τῶν εἰκόνων· διὰ τὸ ὅτι τὰ εἰδωλα εἶναι πλάσματα καὶ εὐρέματα τῶν ἀνθρώπων· καθὼς μαρτυρεῖ λέγων ὁ ἀπόστολος· οἶδαμεν ὅτι ἔδεν εἰδωλον ἐν κόσμῳ· μὰ ἡ εἰκὼν εἶναι παρθεσίς ὡς παρέρχεται πρεσβυτέρα ἀληθινόν· ὡς ἔχει τὴν ὑπαρξίν τε εἰς τὸν κόσμον· ὡς ἡ εἰκὼν τῆ σωτῆρος ἡμῶν χριστοῦ, καὶ τῆς ἁγίας παρθένου Μαρίας, καὶ ὁλων τῶν ἁγίων· καὶ ἔξω ἀπὸ τούτου οἱ Ἕλληνες ἐπεσकुνησαν ὡς θεὸν τὰ εἰδωλα, καὶ ἐδίδακον εἰς αὐτὰ θυσίας, λογιάζοντες να εἶναι θεοὶ τὸ χρυσίον καὶ τὸ ἀργύριον, ὡς ὁ Ναβουχοδονόσορ· μὰ ἡμεῖς ὅταν τιμῶμεν τὰς εἰκόνας, καὶ τὰς πεσकुνηθῶμεν, δὲν πεσकुνηθῶμεν τὰ χράματα, ἢ τὰ ξύλα· μὰ τὰς ἁγίας ἐκείνας, τῶν ὁποίων εἶναι αἱ εἰκόνες, δοξάζομεν μὲ πεσकुνησιν δολείας, βάλλοντας μὲ τὸν νῦν μας τὴν ἐκείνων παρουσίαν εἰς τὰ ὁμμάτια μας·* *Ingens inter imagines & simulacra discrimen est. Nam idola seu simulacra sunt figmenta, & mera inuenta hominum; quemadmodum testificatur apostolus: nouimus nullum idolum in mundo esse,* (1. Cor.

\* in breui delineatione eccles. oriental. graecae p. 140.



(1. Cor. VIII, 4.) *Verum imago est repraesentamen exhibens rem veram, reapse in mundo existentem, veluti imago servatoris nostri Christi, & sanctae virginis Mariae & omnium sanctorum. Praeterea pagani idola, Dei instar adorabant, illisque hostias immolabant; existimantes aurum argentumque verum Numen esse; ut Nebucadnezar olim. Quando autem nos imagines veneramur & adoramus; non adoramus illitos tabulis colores, aut ligna ipsa; sed sanctos suis imaginibus repraesentatos, eo adorationis genere, quod dulum adpellitant, colimus; sic eorum videlicet praesentiam animo usurpantes, quasi ipsosmet oculis nostris contueremur. \** At ista, ad speciem quamdam imaginum cultui conciliandam excogitata, fucum quidem imperitioribus ac incautis facere possunt, ad tollendam aut remouendam superstitionem ac idololatriam non sufficiunt. Discrimen inter sculptas & pictas imagines parum ad rem facit. Has enim non minus, quam illas Deus diferte prohibuit: *Non facies tibi sculptile simulacrum, neque imaginem ullam eorum, quae sunt supra in coelis, aut infra in terris, aut in aquis, quae terrae subiectae sunt, neque ea adorabis (aut flexo corpore veneraberis) aut coles &c. exod. XX. 4.* Dum non tantum dicit, *non facies tibi sculptile simulacrum*; sed & addit, *neque imaginem ullam*, significat, nullas cuiuscunque generis imagines, siue sculptae siue pictae fuerint, faciendas esse, ut eas adoremus, aut religioso prosequamur cultu. Praeterea omnes imagines, quibus cultus aliquis religiosus deferretur, recte idola vocantur, siue aliquid, quod reuera existat, exhibeant, siue id quod repraesentant, prorsus non existat;

G 2

quam-

\* p. 327. seqq.

quamquam quo pacto simulacrum aliquod confici queat, quod alterius cuiusdam rei nulla prorsus ratione, neque ex parte quadam imaginem contineat, vix capi possit; quod & de idolis gentilium dici nequit. Omne enim istud, qualecumque demum sit, cui cultum, soli Deo debitum, tribuimus, iure meritoque idolum vocatur. Quare & si vel maxime imago quaedam non ipsam Dei essentiam, sed Christum seruatorem nostrum, aut beatam virginem Mariam, aut sanctos quosdam homines repraesentet; cultus nihilominus, qui illi defertur, superstitione & idololatria non vacat. Christo equidem seruatori ipsi cultus religiosus debetur; non tamen imagini eius. Ad Mariam autem sanctosque homines quod attinet, licet illorum iure meritoque admiremur virtutes, nec umquam nisi cum honoris quadam significatione mentionem faciamus; adorandos tamen colendosque esse, eo magis abnuimus, quo minus eiusmodi quid aut ipsimet desiderarunt, aut probaturi essent, si suam nobis declarare possent sententiam. Quumque, quod rerumstrarum conscii sint, aut preces nostras votaue audiant atque cognoscant, probari nequeat, nonne vanus est omnis ille cultus irritusque? Iam si nec Mariam ipsam, aut homines sanctitatis laude conspicuos cultu religioso prosequi licet, quanto minus fas erit, imagines illorum ea ratione colere & adorare? Esto vero; quod colores & ligna non adorent, sed sanctos, qui per istas imagines repraesentantur; quum nec hos, vti dictum, adorare cultuque religioso, vtpote qui soli Deo debetur, prosequi liceat, remanet semper idololatria quac-



quaedam, indigna prorsus hominibus, qui nomen profitentur christianum. Parumque feliciter per distinctionem inter *δσλείαν* & *λατρείαν*, in Romanae quoque ecclesiae scholis satis frequentatam, hinc se expedire adnituntur. Praeterquam enim, quod voces istae *δσλεία* & *λατρεία* promiscue in scriptura sacra vsurpentur, quum hic non de cultu ciuili sermo sit; de quo si vox *δσλεία* accipiatur, haud difficulter discrimen aliquod inter eam & *λατρείαν* admitti posset, sed de religioso; hunc qui soli Deo deberi negauerit, eum ignarum prorsus, quid cultus diuinus sit, verborumque Christi seruatoris, *Deum dominum tuum adorabis, & illum solum* (solum, inquam, non sanctos, non imagines) *coles*, *Matth. IV, 10.* immemorem esse oportet. Certusque plane sum, rudiores simplicioresque homines, qui vbique maximam ecclesiae partem constituunt, distinctionem istam inter *λατρείαν* & *δσλείαν* prorsus ignorare, certe non capere; immo ipsis illis imaginibus diuinitatem quamdam tribuere, nec aliter, quam Deum ipsum, eas colere et adorare, adeoque grauissimo idololatriae se obstringere crimine. Cuius nec illi apud Graecos pariter ac Latinos immunes sunt, qui meliora equidem sunt edocti; cultum tamen istum imaginum variis ac ineptis distinctionibus defendere conantur, quum id potius agere deberent, vt homines plebei a turpi ista & plus quam ethnica superstitione liberarentur. Adeo nullam itaque *IAVORSKIVS* causam habuit, nobis exprobrandi, quod imagines sacras reiecerimus; aut vt rectius loquar, quod diuinum illis non deferamus cultum, vt, si quid sanae mentis in eo reli-

quum fuisset, optare debuisset, ut tum Graeca tum Romana ecclesia a superstitione ista & idololatrâ imaginum adoratione repurgaretur.

Eo iniquior autem iniustiorque eius hac in re est accusatio, quo certius & euidentius est, quod in reiiciendo isto imaginum cultu veteris iterum ecclesiae exemplum sequamur. Per tria enim priora a Christo nato saecula usque ad finem quarti, nullae prorsus in templis aut locis sacris christianorum conspectae aut toleratae sunt imagines, tantum abest, ut eas adorarint, aut cultu quodam adfecerint. Idque tam diu ratum firmumque et extra omnem dubitationem positum manebit, donec, qui dissentiunt, vel unico exemplo aut testimonio fide digno, secus se rem habere, demonstrauerint. Quantumvis autem omnes ingenii & industriae nervos intendant, ut hoc facere queant; quam vanus tamen irritusque iste labor sit, vel unico specimine ostendere operae fuerit pretium. Nihil solemnius illis est, quam ut ad statuam illam prouocent, quam mulier, sanguinis profluuio laborans, & a seruatore sanitati restituta, Caesareae Philippi, quam urbem Phoenices Paneada nominarunt, in honorem Christi et beneficii summi, ab eo accepti, memoriam posuisse dicitur. Quod tamen, quam parum illorum causam iuuet, statim patebit, si veterum paullo accuratius hac de re consideremus testimonia. Et EUSEBIUS quidem non tam ex sua, quam aliorum sententia, aut fama potius, admodum utique incerta, adserit, mulierem hancce ex ciuitate ista originem traxisse, domumque eius ibidem conspici, et collati in eam a seruatore



tore nostro beneficii, illustria exstare monumenta. Diserte enim dicit, ἔλεγον, *ferunt*, ἐνθ' ἐνδε ὀρμᾶσθαι, & sic porro. Pari ratione ex fama ista, seu aliorum sententia referre pergit, iuxta ianuam domus illius aeneam mulieris effigiem stare, columnae lapideae impositam, genibus flexis protensisque manibus instar supplicantis; ex aduerso autem effigiem viri ex eodem metallo conflata, stantis ac diploide decenter induti, manumque mulieri porrigentis; ad cuius pedes in ipsa basi ignota quaedam nasci dicatur herba, quae ad fimbriam vsque aeneae diploidis adfurgens, depellendis omnis generis morbis praesentissimum remedium sit. τῶτον δὲ τὸν ἀνδραγύνα, inquit porro EVSEBIUS, \* εἰκόνα τῆς Ἰησοῦ φέρειν ἔλεγον, *hanc statuum Iesu Christi speciem referre aiebant*; additque, mansisse eam ad sua vsque tempora, seque urbem illam ingressum ipsam conspexisse; nec vero mirandum esse, gentiles a seruatore nostro beneficiis adfectos haec praestitisse, quum & apostolorum Petri ac Pauli, Christi que ipsius pictas imagines, ad suam vsque memoriam seruatas, in tabulis viderit; priscos namque illos, absque vlllo discrimine cunctos de se bene meritos gentili quadam consuetudine, tamquam seruatores colere huiusmodi honoribus consueuisse. Qua in narratione EVSEBII cum primis obseruandum, quod subinde illud ἔλεγον, *aiebant, ferebant*, repetat. Inde enim vt constat, ex fama aliorumque sermonibus eum accepisse, quae commemorat, ita hoc rem omnem valde suspectam reddit. Adserit equidem, semetipsum urbem illam ingressum statuam istam conspexif-

\* lib. VII. *hister. eccl. cap. XVIII. p. m. 265.*

spexisse; sed quum parum hoc cum prioribus consentiat, non desunt viri docti, qui ista verba non ipsius EVSEBII, sed ab aliena manu inserta esse, contendunt. \* Si tamen vel maxime ipsius sint EVSEBII; nihil aliud inde sequitur, quam statuam quamdam ab eo visam; reliqua autem, seu quod a muliere illa in memoriam beneficii, a Christo servatore in se collati, fuerit posita, nihilo secius ad sermones eorum, a quibus ista accepit, redeunt. Tantum porro abest, ut imaginum defensores causae suae aliquod praesidium in hocce exemplo inueniant, ut illis potius quam maxime noceat, quum a muliere ethnica hoc sit profectum, quae istud fecerit ἑθνικῇ συνήθειᾳ, gentili quadam consuetudine, ut EVSEBIUS loquitur; cunctos bene de se meritos absque ullo discrimine tamquam servatores huiusmodi honoribus colendi. A gentilibus itaque dum hancce consuetudinem deriuat, tam ecclesiae christianae minime probatam haud obscure significat. Praeterea non cultus, aut adorationis causa, sed tantum in memoriam beneficii, a Christo in hanc mulierem collati; nec in templo aut loco quodam sacro, sed πρὸς πύλας τῆς αὐτῆς οἰκῆς, iuxta ianuam domus illius, ut EVSEBIUS quidem auctor est, statua haecce posita dicitur. Quae omnia nihil prorsus cum imaginibus illis commune habent, quae cultus religiosi causa in templis, aut locis huic vsui destinatis collocari solent. PHILOSTORGIVS statuam hancce collocatam

\* vid. DE BEAUSOBRE *dissertat. de statua Pancadenſi dans la bibliotheque germanique tom. XIII. artic. I. pag. 1. seqq.*



tam fuisse, ait, κατὰ τὴν πηγὴν τὴν ἑνὸν τῆς πόλεως, μετὰ καὶ ἑτέρων ἀγαλμάτων, *iuxta fontem, qui est in vrbe, vna cum aliis statuis*; \* quumque deinceps tempore Iuliani apostatae a paganis confracta esset, partes eius a christianis, existimantibus, Christi seruatoris hanc statuam fuisse, repositae sunt ἐν τῇ ἐκκλησίᾳ, *in ecclesia*, vt SOZOMENVS loquitur; \*\* aut potius, vt PHILOSTORGIVS auctor est, ἐν τῷ τῆς ἐκκλησίας διακονικῷ, *in diaconico ecclesiae*, hoc est, loco prope templum, vasis sacris adseruandis similibusque vsibus destinato. Atque hinc vt luculenter patet, statuam in loco, in quo cultus sacer peragebatur, positam non fuisse; ita obseruatu prorsus digna, quae PHILOSTORGIVS, istud, quod diximus, commemorans addit: τὸν δὲ ἀνδριάντα μετασησάμενοι ἐν τῷ τῆς ἐκκλησίας διακονικῷ, τὰ πέποντα ἐθερώπνεον, σέβοντες μὲν ἢ προσκυνοῦντες ἑδαμῶς· ὁ γὰρ ἦν θέμις χαλκὴν ἢ ἀλὺν ὕλην προσκυνοῦν· αὐτὸ γὰρ ἔβλετο, τάσει τε σεμνοτέρα, καὶ τὸ μετ' ἡδονῆς ἐπιφοιτᾶν τῷ τόπῳ τὸ εἶδος θεοσπευσσομένων, τὸν περὶ τὸ ἀρχέτυπον πόθον ἐπιδεικνύμενοι. *statuam vero in diaconico ecclesiae collocarunt, competentem ei curam atque obseruantiam deferentes; nequaquam tamen eam colentes aut adorantes. Neque enim fas erat, aeneam aut aliam quamlibet materiam adorare. Sed hoc vno, quod eam honoratiore in loco collocauerant, & quod spectandi causa ad eum locum cupide aduentarent, amorem ipsius archetypi declarantes.* Diserte PHILOSTORGIVS dicit, christianos ἑδαμῶς, *nequaquam*, statuam hancce coluisse, aut adorasse, addita ratione: ὁ γὰρ ἦν θέμις, *non enim fas*  
H erat,

\* *hisor. eccles. lib. VII. cap. III. p. m. 502.*

\*\* *lib. V. hisor. ecclesiast. cap. XXI. p. 629.*

erat, aeneam aut aliam quamlibet materiam adorare. Quumque auctorem istum saeculo quinto vixisse constet; quatenus eo tempore ecclesiae christianae de cultu & adoratione imaginum fuerit sententia, inde intelligitur. Idque tam luculentum est testimonium, ut viri ex Romanae ecclesiae addictis doctissimi negare nequeant, suae hoc obstare sententiae; et si labefactare id se posse existimant, si dicant, PHILOSTORGIVM ex secta fuisse Eunomianorum. Quod tamen friuolum prorsus atque ieiunum est; quum inter Eunomianos & catholicos seu orthodoxos de cultu ac adoratione imaginum nulla fuerit controuersia, nullaque adeo adsit ratio, cur fides PHILOSTORGI dubia nobis hac in re aut suspecta videri queat. Nec scrupulum alicui mouere debet, quod idem PHILOSTORGIVS de statua ista, in diaconico collocata, dicit, τὰ πρὸς τὸν ναὸν ἐδεσπορεύον, competentem ei curam & obseruantiam deferentes. Praeterquam enim, quod statim subiicit, hoc nequaquam de cultu quodam religioso aut adoratione intelligendum esse; recte ipsemet HENRICVS VALESIVS \* docet, hanc obseruantiam in eo constituisse, ut statua quam maxime niteret, nec puluere aut sordibus, aut rubigine impleretur. Atque ex hisce quidem omnibus abunde patet, statuam istam Paneadensem nihil prorsus praesidii illis adferre, qui pro imaginum cultu & adoratione pugnant; si vel maxime concedatur, mulierem, quam sanguinis profluvio laborantem Christus sanitati restituit, eiusmodi statuam in tanti beneficii, in se collati, memoriam posuisse. Accedit tamen, quod tota ista

\* in adnotationib. ad PHILOSTORGI l. c. p. m. 143.



ista non sine ratione multis suspecta videatur narratio, quemadmodum et iam olim Carolo magno imperatori visa fuit; \* immo non desunt, qui eam inter fabulas & commenta referre non dubitant. Certe fieri potuisse, ut de statua quadam, longe alium in finem posita, nonnulli per errorem eiusmodi quid sibi persuaderent; ab his autem alii in eandem adducerentur opinionem, & ita fama haecce longe lateque propagaretur, multorumque occuparet animos, nemo temere negauerit, nisi cui ingenii humani ad talia credenda pronissimi ignota prorsus fuerit indoles. Confirmatur hoc porro inde, quod EVSEBIUS, ad cuius auctoritatem praecipue res redit, ex aliorum potius, ut antea observatum, quam sua, hac de re loquatur sententia; reliqui autem, qui post eum statuæ huius mentionem fecerunt, & ab illo & inter se mirifice dissentiant; omnes denique in vniuersum de muliere ista, quam profluvio sanguinis laborantem Christus servator sanavit, talia tradant, quæ cum scriptura sacra non conveniunt. Quæ omnia fusius edisserere possem, nisi hoc iam ab aliis factum esset.

Satis quidem hinc patet, quam lubrica, quamve infirma sint, quæ imaginum defensores in medium adferunt, ut earum iam apud veteres christianos receptum fuisse cultum euincant. Iuvat tamen & alterum, quo non minus, ac eo, de quo iam verba fecimus, errorem suum tueri conantur, proferre exemplum; ut nouo specimine, quam omnino nullum in primitiua ecclesia praesidium inueniant,

H 2

pateat.

---

\* lib. IV. de imaginib. cap. XV,

pateat. Calices nimirum producunt, quos pictos fuisse, TERTVLLIANVS commemorat. Is namque, in Montani iam castris militans, dum in eo est, vt catholicos, quod a primitiuae disciplinae rigore descuiissent, reprehendat, dissentientium nomine parabolam euangelicam sibi ipsi obiicit, in qua ouis, quae a grege aberrauerat, summo a pastore studio quaesita, ac in ouile reducta, illorum sententiae fauere videtur, qui peccatorem, quem admissorum serio poenitet, in fidelium communionem recipiendum contendebant; ad quod quidem respondet, ouem aberrantem symbolum esse, non hominis christiani, ex aliquo scelere aut flagitio resipiscens, sed ethnici, agnito errore, doctrinam euangelii primum amplectentis, atque tum procedant, inquit, *ipsae picturae calicum vestrorum, si vel in illis perlucebit interpretatio pecudis illius, utrumne christiano aut ethnico peccatori de restitutione conliniet.\** Et alibi ad eandem parabolam respiciens, *si forte, inquit, patrociniabitur pastor, quem in calice depingis, prostitutorem & ipsum christiani sacramenti, merito & ebrietatis idolum, & moechiae asylum post calicem subsequutur, de quo nihil libentius bibas, quam ouem poenitentiae secundae.\*\** In hisce itaque TERTVLLIANI testimoniis non, quod pueri in faba, se inuenisse imaginum defensores existimant; quum ex iis manifestum esse, contendant, iam TERTVLLIANI aetate vsitatum fuisse, vt imago seu effigies Christi in calicibus eucharisticis pingeretur. Certe parabolam de pastore ouem

\* lib. de pudicitia cap. VII. p. m. 721.

\*\* l. c. cap. X. p. 727.



ouem deperditam quaerente in istis calicibus pictam fuisse exinde constat; hoc autem non perinde est, ac si ipsius Christi seruatoris in iis picta fuisset imago; quod nec TERTVLLIANVS dicit, nec ex verbis eius colligi potest. Esto vero, fuisse seruatoris imaginem, aut saltem eo loco habendam, ac si ipsius fuisset, num inde statim sequitur, eo tempore imagines in templis aut locis, in quibus sacrorum peragendorum caussa christiani conueniebant, positas fuisse, & quidem vt cultus quidam aut ueneratio iis exhiberetur? Id vero est, de quo disceptatur; & hoc si non euicerint dissentientes, nihil prorsus efficient. Res ipsa docet, ad ornatum tantum, simul tamen etiam ad commonefactionem aut recordationem istam imaginem in calicibus veterum pictam fuisse; cuiusmodi picturas emblematicas, parabolicas, historicas, vt nemo vnquam protestantium improbauit; ita inepte prorsus ad cultum & adorationem imaginum probandam in medium adferuntur. Et haec quidem sunt ista exempla, quae in tribus primis a Christo nato saeculis vsque ad finem quarti imaginum patroni inuenire potuerunt, vt iis robur aliquod sententiae suae conciliarent. Plura enim proferre non possunt, certe a quoquam prolata esse mihi non constat. Addere equidem solent testimonia GREGORII Nysseni, HIERONYMI, AMBROSII, AVGVSTINI, PAVLINI, aliorum, qui circa finem quarti, aut initium quinti saeculi vixerunt. Quemadmodum autem ex istis nihil aliud euinci potest, quam eo tempore imaginum vsum recipi hinc inde coepisse; quod non negamus: ita cultus aut

adorationis causa eas in templis collocatas, non dicunt, multo minus hunc morem adprobant; aut si quidam ex iis adprobare videantur, eos hac in re errasse, atque a scripturae sacrae norma pariter ac primitivae ecclesiae exemplo discessisse, libere & citra ambages dicendum esset.

Quum dissidentes, seu qui pro imaginum cultu pugnant, adfirmant, cultum istum imaginum in primitiva ecclesia receptum fuisse; eorum quoque erat, argumentis aut testimoniis fide dignis hoc comprobare; quod tamen quum nec fecerint, nec facere queant, ut ex dictis patet, causa merito cecidisse censetur. Idque adeo quum sufficere queat, si quidem a nobis nihil amplius postulari potest, quam quod praestitimus, demonstrando, nihil prorsus, quod pondus aut momentum trahat, eos in medium adferre posse; ut tamen eo magis illos erroris convincamus, testimoniis luculentissimis probabimus, imaginum cultum & venerationem in tribus prioribus saeculis in usu non fuisse. Omnium autem instar esse potest *canon xxxvi. concilii Eliberitani*, circa initium saeculi quarti anno a Christo nato cccv. congregati, in quo disertè sancitur: *placuit picturas in ecclesiis esse non debere, ne quod colitur aut adoratur in parietibus depingatur.* Ad quem quidem canonem etiam saeculo nono in eadem causa prouocavit AGOBARDVS, Lugdunensis archiepiscopus, qui sub Ludouico pio, imperatore, floruit. Recte, inquit, nimirum ob huiusmodi euacuandam superstitionem ab orthodoxis patribus definitum est, *picturas in ecclesia fieri non debere, nec* (sic enim legisse



legisse videtur) *quod colitur & adoratur, in parietibus depingatur.*\* Hoc ergo quum longe euidentissimum, omnique exceptione maius sit testimonium, quo probatur, patres istius concilii ne quidem permittere voluisse, vt picturae aut imagines in templis exstarent, tantum abest, vt cultum earum ac adorationem licitum esse crediderint: mirum non est, quod dissentientes ad telum hocce declinandum in omnem sese vertant partem. Quidam enim, canonem huncce supposititium & ab imaginum aduersariis confictum esse, clamitant; alii nihil aliud ex eo colligi posse adserunt, quam in provincia Baetica per eum imaginum vsum fuisse sublatum; alii, hoc solum a patribus Eliberitanis prohiberi, ne in parietibus deinceps depingerentur imagines, ob metum scilicet corruptionis aut deformationis; alii, eas tantum imagines improbari, quibus Deus, ipsaque sacrosancta trinitas repraesentetur; nonnulli denique in ipsos concilii Eliberitani patres iram suam atque furorem effundunt, eosque ob reiectum imaginum in templis vsum & cultum impietatis arguere non dubitant. Sed vel ipse iste dissensus indicio est, quantum negotii hicce canon illis facescat, & quod, quo magis in eo remouendo laborant, eo minus aliquid, in quo citra omnem dubitationem pedem figere possint, inueniant. Enimuero, qui canonem istum supposititium aut confictum volunt, nihil aliud agunt, quam vt suam aut imperitiam aut impudentiam prodant; siquidem is non tantum in omnibus Eliberitanae synodi tam manuscriptis, quam

\* *lib. de imaginibus cap. XXXIII.*

quam excusis codicibus reperitur, sed & iam ab AGOBARDO, saeculo nono, vt antea obseruauimus, laudatus fuit. Qui, per eum in prouincia Baetica solum imaginum vsum sublatum fuisse, adfirmant, primum quidem fatentur, quod generatim de imaginibus loquatur. Rectius deinde dixissent, vsum imaginum non tam *sublatum*, quam potius *interdictum* fuisse; quum probare nequeant, earumdem vsum antea obtinuisse. Synodus porro Eliberitana non prouincialis solius Baeticae, sed nationalis fuit totius Hispaniae, vt subscriptiones docent, praesentibus OSIO, Cordubensi, VALERIO, Caesaraugustano, aliisque viris sanctissimis, posteaque maxima semper in ecclesia occidentali eius fuit auctoritas. Qui autem, hoc solum a patribus huius concilii prohiberi, existimant, ne in parietibus imagines depingerentur, ob metum corruptionis aut deprauationis, prorsus mihi ineptire videntur. Nullas enim prorsus picturas siue imagines cuiuscumque generis in ecclesia esse debere, in canone discrete dicitur; tumque ratio additur, quod nefas sit, colere aut adorare id, quod in parietibus depingitur. Atque hinc etiam patet, quid illis respondendum sit, qui eas tantum improbari imagines putant, quibus Deus aut sacrosancta trinitas repraesentetur. Omnes enim indiscriminatim picturas siue imagines intelligi, clarissima canonis verba docent. Dei etiam inuisibilis, vel sacrosanctae trinitatis, nullas non tantum eo tempore, sed & multis post concilium Eliberitanum saeculis apud christianos fuisse imagines, viris doctis obseruatum est; vnde harum  
solum



solum in templis prohibere vsum absonum fuisset. At Christi, Petri, Pauli, & si quae aliae imagines, in tabulis depictae, eo tempore inter priuata *κειμήλια* habebantur, teste EVSEBIO; \* & tales quidem in templis collocari noluisse patres Eliberitanos, non est, quod dubitemus, ne occasio illas colendi aut adorandi hac ratione hominibus praebetur, resque omnis tandem in turpem idololatriam abiret. Qui denique ipsos patres Eliberitanos adgrediuntur, eosque impietatis accusant, arma, quae desperatio suppeditat, mihi arripere videntur, adeoque nihil aliud agunt, quam vt caussae suae imbecillitatem prodant.

Singulorum ecclesiae doctorum varia proferre possem testimonia, sed cum primis EPIPHANII, cuius quanta quarto saeculo fuerit apud catholicos existimatio, neminem fugit, illud, quod in *epistola* eius ad IOANNEM, episcopum Hierosolymitanum, quam HIERONYMVS in linguam latinam transtulit, exstat, dignum est, quod hic legatur. *Quando, inquit, simul pergebamus ad sanctum locum, qui vocatur Bethel, vt ibi collectam tecum ex more ecclesiastico facerem, & venissem ad villam, quae dicitur Anablatba, vidissemque ibi praeteriens lucernam ardentem, & interrogassem, quis locus esset, didicissemque esse ecclesiam, & intrassem, vt orarem; inueni ibi velum pendens in foribus eiusdem ecclesiae tinctum atque depictum, & habens imaginem, quasi Christi, vel sancti cuiusdam; non enim satis memini, cuius imago fuerit. Cum ergo hoc vidissem, in ecclesia Christi contra auctoritatem scripturarum homi-*

---

\* hist. eccles. lib. VII. cap. XVIII. p. 265.

nis pendere imaginem, scidi illud, & magis dedi consilium custodibus eiusdem loci, ut pauperem mortuum eo obuoluerent & efferrent. Illique contra murmurantes dixerunt; si scindere voluerat, iustum erat, ut aliud daret velum, atque mutaret. Quod cum audissem, me daturum esse pollicitus sum, & illico esse missurum. Paululum autem morarum fuit in medio, dum quaero optimum velum pro eo mittere; arbitrabar enim de Cypro mihi esse mittendum. Nunc autem misi, quod potui reperire, & precor, ut iubeas presbyteros eiusdem loci suscipere velum a latore, quod a nobis missum est; & deinceps praecipere, in ecclesia christi eiusmodi vela, quae contra religionem nostram veniunt, non adpendi.\* Non tantum dilerte contra auctoritatem scripturarum esse, hominis in ecclesia Christi pendere imaginem, EPIPHANIVS pronuntiat; sed velum quoque illud scindendo ipso facto sententiam suam comprobavit, nec IOANNE, Hierosolymitano, nec alio quoquam haecenus repugnante, ut dicerent, non esse nefas, eiusmodi imagines in templis tolerare, quod haud dubie facturi fuissent, si credidissent, secus se rem habere, ac EPIPHANIVS dixerat. Immo, quum aliud velum, sed sine imagine, mitteret, monet IOANNEM, Hierosolymitanum, ut iubeat presbyteros deinceps praecipere, in ecclesia Christi vela, quae contra religionem nostram veniant (seu in quibus imagines depictae sint) non adpendi. Vsum ergo imaginum in templis aedibusque sacris contra religionem christianam esse censuit EPIPHANIVS; eaque in re consentientem secum

\* tom. II. operum EPIPHANII, p. 317.



secum habuit HIERONYMV M, quippe qui hancce eius epistolam, vt antea diximus, in linguam latinam transtulit. Quid vero ad haec imaginum defensores? praesertim qui in ecclesia Romana earum caussam agunt? Mirum in modum se torquent, vt hinc se expediant, & aliquid excogitent, quo incautis rerumque imperitis faciant fucum. Turpiter se traducunt, qui hominis vulgaris, non autem sancti cuiusdam imaginem fuisse, fingunt, quae in velo isto depicta fuerit; siquidem verbis clarissimis EPIPHANIVS profitetur, non satis se meminisse, num Christi an sancti cuiusdam fuerit imago. Ergo aut Christi aut sancti cuiusdam fuisse imaginem dubitari prorsus nequit. Alii quum hocce parum feliciter procedere commentum vident, spuriam hancce esse epistolam, falsoque EPIPHANIO suppositam clament; aut ne nullum prorsus impudentiae suae modum statuuisse videantur, eam saltem partem, in qua verba, antea recitata, leguntur, a quodam imaginum hoste eidem adfutam contendunt. Quod dum faciunt, parum pensi habent, nihil facilius esse, quam scriptorum, in quibus, quae nobis displicent, occurrunt, in dubium vocare *γνησιότητα*; sed nihil quoque ineptius, quam si sine iustis praegnantibusque id fiat rationibus. Nihil hoc pacto in omni antiquitate certum fixumque, nihil prorsus erit, cui tuto inniti liceat. Istudque intellexisse videntur, qui breuissimam viam negotium hoc conficiendi esse, existimarunt, si in ipsum EPIPHANIVM arma sua conuerterent, eademque illum imbutum fuisse adsererent haeresi, qua deinceps in transuersum acti sint,

sint, qui imaginum cultum ac adorationem reiecerunt; hoc ipso quam lubrica, quamue desperata causa illa sit, cuius in se susceperunt defensionem, significantes.

Circa finem saeculi quarti nonnullos imagines in templa inferre coepisse: lubentes concedimus, & iam antea quoque indicauimus. Quae licet saeculo quinto & sexto magis inualesceret consuetudo; tantum tamen abest, ut cultus aut adoratio imaginum adprobaretur, ut magno potius consensu, ceu christianae religioni repugnans, reiiceretur damnaretur. Certiorem fideque digniorem huius rei laudare nequeo testem, quam GREGORIVM magnum pontificem Romanum, quem circa finem saeculi sexti ecclesiae praefuisse, constat. Quum enim SERENVS, Massiliensis episcopus, animaduerneret, nonnullos ad cultum & adorationem imaginum pronos esse, ut omnem hisce idololatriae occasionem adimeret, confringere omnino imagines, & ex templis eiicere consultum duxit. Quem quidem eius zelum parum tempestiuum licet GREGORIUS haecenus reprehendat, quod imagines confregerit, atque eiecerit; simul tamen laudat, quod eas coli ac adorari noluerit. *Praeterea indico, inquit, dudum ad nos peruenisse, quod fraternitas vestra, quosdam imaginum adoratores adspiciens, easdem in ecclesiis imagines confregit atque proiecit. Et quidem zelum vos, ne quid manufactum adorari posset, habuisse laudauimus, sed frangere easdem imagines non debuisse indicamus. Idcirco enim pictura in ecclesiis adhibetur, ut hi, qui litteras nesciunt, saltem in parietibus videndo legant, quae legere*  
*in*



*in codicibus non valent. Tua ergo fraternitas & illas seruare, & ab earum adoratu populum prohibere debuit; quatenus & litterarum nescii haberent, unde scientiam historiae colligerent, & populus in picturae adoratione minime peccaret. Quod de vero & genuino imaginum vsu GREGORIUS pronuntiat, recte se habet, quum & nos, tolerari imagines in templis ad vsum historicum posse, adferamus. Non minus tamen & rectissime cultum earum & adorationem improbat. Hinc non tantum laudasse se, ait, zelum SERENI, quem habuerit, ne quid manufactum adorari posset; sed & diserte dicit, quod populum ab earum (imaginum) adoratu prohibere debuerit.\* Similia GREGORIUS in alia ad eundem SERENVM epistola repetit, immo serio inculcat. Et quidem, inquit, quia eas (imagines) adorari vetuisses, omnino laudauimus, fregisse vero reprehendimus, &c. Aliud est enim picturam adorare, aliud per picturae historiam, quid sit adorandum, addiscere. Nam quod legentibus scriptura, hoc idiotis praestat pictura cernentibus; quia in ipsa etiam ignorantes vident, quid sequi debeant, in ipsa legunt, qui litteras nesciunt etc. Frangi ergo non debuit, quod non ad adorandum in ecclesiis, sed ad instruendas solummodo mentes fuit nescientium collocatum. Haec & alia eiusdem generis quum copiosius edisseruisset, tandem concludit: si quis imagines facere voluerit, minime prohibe; adorari vero imagines, modis omnibus veta. Recte dicit pontifex: modis omnibus veta, quum perspectum satis atque exploratum haberet, sine idololatriae crimine*

\* lib. IX. epistolar. indict. II. epist. CV. tom. II. operum pag. 1006. edit. quae Parisiis anno MDCCV. prodiit.

ne hoc fieri non posse; quum solus Deus colendus & adorandus sit; quod & ipsemet statim inculcat serio, quando pergit: *sed hoc sollicitè fraternitas tua admoneat, ut ex visione rei gestae ardorem compunctionis percipiant, & in adoratione solius omnipotentis sanctae trinitatis humiliter prosternantur.* \*

Quantumvis autem GREGORIUS magnus, alii-  
que viri docti & cordati, imaginum cultui & adora-  
tioni se opponerent; postquam tamen semel in tem-  
pla aedesque sacras receptae erant, impedire, qui  
deinceps illorum vestigia premebant, non potue-  
runt, quin tandem superstitio palam erumperet,  
multorumque in transuorsum ageret animos. Hinc  
acerrima illa in ecclesia Graeca sacculo octauo orta  
sunt certamina, quae quum omnibus nota satis sint,  
ut ea hic commemoremus, necesse non est. Oppo-  
suerunt equidem se fortiter illorum, qui pro imagi-  
num cultu pugnabant, conatibus, imperatores, Leo  
Isauricus, & Constantinus, cui iconolatrarum factio,  
ad immane suum erga illum significandum odium,  
copronymi nomen dedit, sub quorum ultimo etiam  
anno DCCCLIV concilium CCCXXXVIII episcoporum  
Constantinopoli conuocatum fuit, qui omnes vna  
voce concordique sententia definiuerunt, imagines  
colere, id vero nihil aliud esse, quam paganorum su-  
perstitutionem & idololatriam postliminio reuocare,  
argumentisue quamplurimis & testimoniis ex scrip-  
tura sacra, immo ex patrum, quarti cum primis sae-  
culi, monumentis petitis sententiam suam confirma-  
runt.

\* *epistolar. lib. XI. indict. IV. epist. XIII. p. 1100.*



runt. Quum autem Irene, mortuo marito Leone IV. & filio impubere, rerum in oriente summam tene-  
ret, sceleraque sua superstitione aut compensare aut  
tegere, nescio num pietatis, an prudentiae opus cen-  
feret, hinc & ad illorum partes, qui imaginum ob-  
trudere cultum omnibus adnitebantur, accessisset,  
quorum causam etiam Romani pontifices tuendam  
in se susceperant; iam tanto praesidio corroborata  
caput tollere coepit superstitio, magnisque augeri  
incrementis. Hinc concilium Nicaenum anno  
DCCLXXXVII conuocatum, in quo, quum cuncta  
ex Irenes libidine gererentur, mirum non est, quod  
abrogata synodo, sub Constantino copronymo ha-  
bita, decretisque eius confutatis, Christi, beatæ  
virginis Mariæ, angelorum, sanctorumque virorum  
imagines, tam de coloribus & tessellis, quam ex a-  
lia quavis materia commode paratas, dedicandas &  
in templis sanctis collocandas, salutationem quoque  
& *honorariam adorationem*, non autem *veram latriam*,  
quæ tantum diuinæ naturæ conueniat, illis exhi-  
bendam esse, sancitum fuit, atque constitutum. Quam  
festinanter, quam inconsiderate a CCC.L illis, qui ad-  
fuerunt, episcopis, non tam animi sui sententiam,  
certe non omnibus, quam Irenes auctoritatem se-  
quentibus, hic omnia gesta sint, quam friuolis &  
ineptis sententiam suam confirmarint rationibus, vt  
exponam, necesse non est, quum nemo temere adeo  
hospitem ex historiarum monumentis retulerit ani-  
mum, vt ista ignoret. Tantum vero abest, vt pseu-  
do-synodi huius Nicaenæ decretis omnes se submi-  
serint, aut ea scripturæ sacrae & primitiuae ecclesiæ  
sen-

sententiae ac consuetudini consentanea crediderint, ut plurimi contra tum in orientali tum in occidentali ecclesia acriter iis repugnauerint. Et in occidentali quidem synodus Francofurdienfis a Carolo magno anno DCCXCIV conuocata fuit, in qua pseudo-synodus (ita enim ab istius temporis scriptoribus vocatur) Nicaena reiecta, eiusque pro adorandis imaginibus decreta improbata atque damnata sunt. Immo in eadem synodo scripti sunt ab ipso Carolo magno *libri isti quatuor de imaginibus*, qui hodie adhuc exstant, & Romam ad Hadrianum i. pontificem misi, in quibus, licet illorum, qui imagines sacras confringebant, & ex templis eiiciebant, intempestium reprehendat zelum; longe tamen acrius eos, qui cultu quodam imagines adficiendas contendebant, castigat & infectatur. Illis *leuitatem* quamdam, his *atrocitatem*; illis *imperitiam*, his *nequitiam* tribuit. Abdicatas imagines quamdam *incautam leuitatem* adferre, ait; adoratas vero *culpam inuare*. Nicaenam pseudo-synodum ita adgreditur, ut quidquid in ea pro cultu imaginum excogitatum aut in medium adlatum est, excutiat, conuellat, profliget. Dumque scripturae testimonia, ad quae synodi istius patres prouocauerant, sub examen reuocat, ea partim incaute & inepte, partim etiam impudenter ab iis ad hanc causam detorta demonstrat; subinde autem testatur, adorationem, quam isti imaginibus tribuebant, neque per patriarchas, neque per prophetas, neque per apostolos, aut apostolicos viros vspiam institutam esse. Pari ratione & quae illi ex patribus, ATHANASIO, AMBROSIO aliisque protule-



tulerant, explodit, eaque nihil prorsus ad rem facere ostendit. Cum primis vero obseruatu dignum, quod non modo adorationem, quae soli Deo debetur, quamue *λατρείαν* vocare solent; sed etiam *cultum*, *obseruationem*, *venerationem*, honoremque eum, qui *collo inflexo*, vel *capite summisso*, itemque *tburis*, & *luminarium oblatione* exhibetur, iis deneget, adeoque, quam parum illi, qui distinctionem inter *δουλείαν* & *λατρείαν* semper in ore habent, hic ad rei summam proficiant, significet. Enimuero perspectum haud dubie sapientissimo imperatori fuit, quam difficulter transitus a cultu *δουλείας*, si hic semel concedatur, ad cultum *λατρείας*, si vel maxime hanc distinctionem admittere velimus, impediri queat; immo quum plerique mortalium, saltem homines plebei, nullam eius habeant rationem, nec sensum capiant, non alium eius vsum esse, quam vt rerum imperitis caligo obfundatur; aut illi, qui imaginum cultum defendunt, habeant, quo vtcumque superstitioni ac idolatriae speciem quamdam conciliare queant. Atque haec tam manifesta sunt, & in aprico posita, vt qui in ecclesia Romana pro imaginum cultu pugnant, nesciant, quo se vertere debeant. Nonnullorum equidem tanta est impudentia, vt in concilio Francofordiensi imaginum cultum damnatum negent; quum tamen non tantum ex *canone II.* istius concilii hoc pateat, sed & ADO, Viennensis episcopus, HINC-MARVS, Rhemenfis, REGINO, AIMOINVS, & deinceps CONRADVS, abbas Vrspergensis, HERMANNVS contractus, aliique fide digni, immo omni exceptione maiores hoc confirment testes; ne quid de  
K ipsius

ipſius Caroli, imperatoris, libris, de quibus iam verba fecimus, dicam, qui omne hic, ſi quod oriri poſſet, dubium tollunt. Hinc & inter ipſos eccleſiae Romanae addiſtos, IOANNES CABASSVTIVS, vt alios nunc taceam, fatetur, in concilio hocce Francofordienſi ſynodum Nicaenam damnatam, omnemque imaginum cultum reiectum eſſe. \* Alii itaque, quum rem ita ex voto non procedere videant, concilium Francofordienſe, vt alia, errare potuiſſe, & adeo non in iuris, ſed facti quaefitione erraſſe, contendunt; alii aliud quid, vt hinc ſe expediant, commiſcuntur; lubricam prorſus atque incertam viam eam, quam ingrediuntur, eſſe, ſignificantes. Pari ratione, vt aliquid, quod ad *libros de imaginibus*, a Carolo magno, imperatore, certe non ſine eius conſenſu & adprobatione, ſcriptos, veramque adeo & genuinam eius ſententiam referentes, reſpondere queant, inueniant, miſerum in modum ſe torquent, conatu tam infelici, tamque irrito labore, vt ne quidem, quae commemorentur, multo minus, quae reſutentur, haecce eorum digna ſint commenta. Confirmata vero non tantum concilii Francofordienſis, & Caroli magni ſententia fuit in ſynodo Pariſienſi, anno DCCCXIV congregata; ſed eandem quoque ſaeculo iſto nono viri in Gallia, eo tempore doctrina & auctoritate conſpicui, IONAS, epiſcopus Aurelianenſis, IEREMIAS, Senonenſis, DVNGALVS, monachus ſancti Dionyſii, AGOBARDVS, archiepiſcopus Lugdunenſis, THEODEMIRVS abbas,

HA-

\* in *notitia eccleſiaſtica hiftoriarum, conciliorum &c. ſec. VII.*  
pag. 320.



HALITGARIUS, Cameracensis & Atrebatensis prae-  
sul, FRECVLPVVS, Lexouienſis episcopus, HINC-  
MARVS Rhemenſis, aliiſque, calculo ſuo adproba-  
runt, quorum longo ordine recitare teſtimonia poſ-  
ſem; niſi ea, quae hucusque attulimus, abunde ſuf-  
ficerent, vt omnes inde intelligant, per ſeptem prio-  
ra a ſeruatore nato ſaecula eccleſiam chriſtianam ab  
adoratione & cultu imaginum prorsus alienam fuiſ-  
ſe; quumque is ſaeculo octauo & nono introducere-  
tur, non deſuiſſe viros doctos & pios, qui eidem for-  
titer ſe opponerent. Atque haec ſi IAVORSKIVS  
conſiderare voluiſſet, animumque ſimul a ſuperſti-  
tione, aut praeiudicatis opinionibus purgaſſet, vitio  
nobis non vertiſſet, quod ad exemplum veteris ec-  
cleſiae cultum imaginum reiiciendo idololatriae lo-  
cum concedere nolimus.

Male vero & hoc IAVORSKIVM habet, quod  
traditiones non admittamus. *Verba Chriſti*, inquit,  
*abrogatiſtis ſiue eleuaſtiſtis praecepta diuina per traditiones*  
*veſtras, huic (Luthero) lapis offenſionis fuerunt, hinc re-*  
*iecit traditiones.* Nec miror, hoc eum nobis obiice-  
re, quum, non minus Graecis, quam Romanae ec-  
cleſiae additiſtis traditiones maximo in pretio eſſe,  
neminem fugiat. In *orthodoxa*, vt vocatur, *confesſio-*  
*ne catholicae atque apoſtolicae eccleſiae orientalis* diſerte  
dicitur: ἡ γὰρ πῶς δύο λογίων εἶναι τὰ δόγματα· ἀλλὰ πα-  
ραδίδει ἡ γε φη, τὰ ὅποια περιέχονται εἰς τὰ θεολογικά βι-  
βλία, τῆς ἀγίας γε φης. καὶ ἄλλα εἶναι δόγματα παραδεδομένα  
ἐκ στόματος ἀπὸ τῆς ἀποστόλης, καὶ ταῦτα ἐξημνεύθησαν ἀπὸ τῶν  
ſυνόδων καὶ τῶν ἀγίων πατέρων· καὶ εἰς τὰ δύο τοῦτα, ἡ πίστις  
εἶναι τεθεμελιωμένη. Scilicet quod gemina ac duplicia ec-  
cleſiae

*clesiae dogmata sunt; alia litteris mandata, quae diuinis sacrae scripturae libris comprehensa habentur; alia viua voce ab apostolis tradita; atque haec ipsa sunt, quae postmodum a conciliis, sanctisque patribus, plenius declarata fuerunt; binisque hisce fundamentis fides superstructa exstat.\** Similia & apud alios, qui ecclesiae Graecae dogmata exposuerunt, occurrunt. Verum maximopere hac in re vtrique, & Graeci, & Romanae ecclesiae addicti, falluntur. Vnicum namque fidei nostrae est fundamentum, scilicet dogmaticum, verbum Dei, seu doctrina prophetarum & apostolorum, *Ephes. II. 20.* prout ea in scriptura sacra, quam viri sancti, diuini spiritus adflatu perculsi, litteris consignarunt, exstat; hinc traditionibus, quae ore olim propagatae sunt, nobis opus non est. Ad scripturam sacram, non ad traditiones, ipsemet seruator eos ablegat, qui viam ad vitam aeternam quaerunt: *scrutamini scripturas, quandoquidem in eis vos aeternam habere vitam putatis, & eae sunt, quae de me testantur; Ioan. V. 39.* Et iterum: *habent Moysen & prophetas; eos audiant; Luc. XVI. 29.* Quae quum de libris sacris veteris testamenti dicta sint, multo magis res ita se habebit, postquam scripta euangelistarum & apostolorum in nouo accesserunt. Quumque ea, quae a prophetis & apostolis ex spiritus sancti impulsu litteris consignata sunt, ita sint comparata, vt nos ad fidem in Christum, & hac ratione ad salutem aeternam perducere queant, *Ioan. XX. 31. II. Tim. III. 15.* cur traditiones illis addere debeamus, nulla praesto est ratio. Praeterea quum de traditionibus, quae aliud quid, quam

---

\* *part. I. quaeft. IV. p. 18. 19.*



quam quod in scriptura sacra exstat, continent, dici nequeat, quod ex instinctu ac impulsu seu inspiratione spiritus sancti fuerint prosectae; non alio loco, quam praecepta aut instituta humana, haberi queunt; recteque illis, qui eas scripturae sacrae, si non praeferunt, certe, ceu alterum fidei fundamentum, adiungunt, opponitur, quod Christus de Phariseis dixit: *bene prophetauit Esaias de vobis hypocritis; sicut scriptum est: populus hic labiis me honorat; cor autem eorum longe abest a me. In vanum autem me colunt, docentes doctrinas, praecepta hominum. Relinquentes enim mandatum Dei, tenetis traditiones hominum, baptismata vrceorum & calicum, & alia similia his facitis multa. Bene irritum facitis praeceptum Dei, ut traditionem vestram seruetis, Marc. VIII. 6. seqq.* Tantum hinc etiam abest, ut haecce verba LV THERO fuerint lapis offensionis, ut IAVORSKIVS sibi persuadet, ut potius instar lapidis Lydii fuerint, & nobis adhuc sint, ad quae Romanae Graecaeque ecclesiae placita exigentes traditiones illas, quas eodem, quo scripturam sacram, loco habent, reiiciendas eliminandasque esse deprehendimus. Qua ratione equidem IAVORSKIVS probauerit, aut probare voluerit, quod ea, quae de Phariseorum traditionibus seruator dixit, ad Graecae pariter & Romanae ecclesiae traditiones trahi nequeant, mihi non constat; verosimile tamen admodum, non aliam cum hic elegisse, aut electurum fuisse viam, quam qua incedere solent, qui in Romanae ecclesiae castris militant; quiue istas Phariseorum traditiones, quae scripturae sacrae e diametro aduersen-

tur, a Christo damuari contendunt; cuiusmodi suas esse negant. Sed quam infeliciter hoc pacto causae suae consulant, facile intelliget, qui totum seruatoris nostri sermonem paullo accuratius considerauerit. Non enim vnus generis erant traditiones Pharisaeorum, quas reprehendit. Quaedam e diametro legi diuinae oppositae erant, vt illa, qua quarti praecepti de honorandis parentibus prorsus abolebant obligationem, de qua Christus loquitur *Marc. VII, 10. 11.* Aliae in se spectatae legi Mosaicae non repugnabant, vt ablutiones vrceorum & calicum, & quae his sunt similes; nihilominus autem a Christo reprehendebantur, non alio vtique nomine, quam quod Pharisei eodem, quo scripturam, eas haberent loco, aut omnino illi praeferrent. Quemadmodum itaque isti traditionum defensores, quibuscum nobis res est, non negant, traditiones non minus, quam scripturam sacram ex sua sententia, fundamentum illud esse, cui fides innitatur; ita si mores apud eos receptos spectes, dubitari nequit, quin interdum traditiones scripturae praeferant, quod & quidam ex illorum numero adeo non dissimulant, vt ingenue potius fateantur,

Vt autem omnibus, quae hic moueri possunt, dubiis eo rectius occurrere queat, omnisque ab hac disputatione remoueatur caligo; de iis hic praecipue nobis sermonem esse traditionibus, obseruandum est, quae aliquid ad fidem, aut vitam recte instituendam, continent. Si enim de factis tantum quibusdam quaestio sit, quae siue negentur, siue admittan-



mittantur; salua tamen integraque manet vnica illa, quam scriptura sacra exhibet, fidei vitaeque regula, ex quibus nihil etiam, quod quacumque ratione ecclesiae noxium sit, aut cum libertatis, quam merito sibi vindicat, iactura illi obtrudi queat, consequitur; nobis quidem perinde esse potest, si quis in iis per traditiones longe incertissimas decipi velit. Rursus tamen & illud monendum, traditionis vocem interdum ita accipi, vt ipsa doctrina, quam apostoli equidem viua voce adnuntiarunt, sed quae in sacra quoque scriptura litteris consignata exstat, ea denotetur. Haecce enim in censum non venit significatio, quum potius de eo quaestio sit, an traditiones quaedam a scriptura sacra diuersae, doctrinaeque, quae in ea non exstat, continentes, ceu regula quaedam & norma doctrinae ac vitae admitrendae sint? Quod qui adfirmant, ostendere initio debent, quaenam istae traditiones sint? vnde nobis constet, eas ab ipsis apostolis esse profectas? quatione continua successione in ecclesia aut propagatae sint, aut propagari potuerint? quumque facile fieri queat, vt spuriae traditiones iis, quae pro genuinis venditantur, admisceantur, quae ratio sit, has ab illis discernendi? Quae omnia quum ita comparata sint, vt nihil solidi ad ea responderi queat, simulque euincant, traditiones non posse non longe esse incertissimas; vehementer se decipere manifestum est, qui illas, ceu regulam quamdam fidei & vitae, scripturae adiungunt. Sunt equidem ex Romanae ecclesiae addictis, qui se rem acu tetigisse existimant, quando dicunt, eam traditionem apostoli-

stolicam esse, cuius certa assignari origo nequeat. Quod plane ludicrum est. Multa enim mendacia, multi circumferuntur errores, quorum nos plane origo latet. Quodsi adseras, quae viua voce ab apostolis tradita sunt, ea ipsa esse, quae postmodum a conciliis sanctisque patribus plenius declarata fuerunt, prout in *orthodoxa confessione catholicae & apostolicae ecclesiae orientalis*, ex qua verba huc spectantia antea recitauimus, dicitur: tum quidem sciendum, ea, quae a conciliis sancita, aut a patribus exposita sunt, aut conuenire cum doctrina, quae in scriptura sacra exstat, aut ab ea diuersa esse. Si conueniunt, quod ea ex traditione habuerint, dici nequit. Si non conueniunt, quaestio rursus eo redit, qua ratione, an traditio quaedam apostolica fuerit? cognoscere, & quo pacto spurias a genuinis discernere patres isti potuerint? Decipi enim eos, aequae ac nos hodie, hac in re potuisse, & interdum deceptos esse, nulum plane est dubium. Ceterum explicare potuerunt scripturam, & in locis quibusdam obscurioribus sensum eius inuestigare, & hac ratione dogmata quaedam declarare, vt ideo nullis iis opus esset traditionibus.

Quemadmodum itaque eiusmodi traditiones, quae doctrinam ab ea, quam scriptura sacra proponit, diuersam continent, & de quibus, quod ab apostolis profectae sint, certi esse queamus, non exstant; ita & nullo modo admitti possunt, nisi in scripturam sacram iniurii esse velimus. Quantum enim dissentientes traditionibus tribuunt, tantum detrahunt auctoritati scripturae sacrae. Immo dum Ro-  
manae



manae ecclesiae addicti id omni conatu agunt, vt scripturam sacram mox imperfectionis, mox obscuritatis arguant; traditionum autem longe rectius in dubium vocetur fides: hoc demum obtinent, vt, quod non sine ratione viris doctis obseruatum est, viam ad Pyrrhonismum aperiant, & ipsam religionem christianam profanorum hominum exponant ludibrio. Quum in scriptura sacra ad ipsam scripturam, ceu vnicam fidei ac vitae regulam ablegemur, vt antea ostendimus; vix sine impietate dici potest, Deum normam seu regulam dedisse, cui aliquid desit, cuius adeo alia adhuc sit adiungenda. Et quid quaeso est, quod ad recte credendum, pieque viuendum, aeternamque adeo salutem consequendam requiratur, quod non inueniamus in scriptura sacra? Quumque ea utilis sit *ad doctrinam, ad reprehensionem, ad correctionem, ad iustitiae disciplinam, vt aptus sit homo Dei, ad omne recte factum bene comparatus, II. Tim. III. 16. 17.* non puto quidquam cogitari aut optari in iis, quibus hominum promoueri queat salus, posse, ad quod non sufficiat. Nullum praeter ea proferri aut nominari dogma potest, eiusmodi quidem, sine quo christianae religionis ratio sibi non constet, quod non in scriptura sacra inueniatur, aut rite ex ea deriuari queat. Quae enim a secus sententibus produci solent, ita comparata sunt, vt nostram potius confirment sententiam, tantum abest, vt eandem euertant, destruuntque. In ipsa equidem scriptura sacra traditionum interdum mentio iniicitur, vt quum Paulus *II. Thessal. II. 15.* dicit: *fratres, state, & tenete traditiones, quas didicistis, siue*

L per

*per sermonem, siue per epistolam; itemque: laudo vos, fratres, quod per omnia memores mei estis, & sicuti tradidi vobis, praecepta mea tenetis, I. Cor. XI. 2. & iterum: ego accepi a domino, quod & tradidi vobis, quoniam dominus Iesus, in qua nocte tradebatur etc. ibidem vers. 23.* Atque haec & alia quaedam eiusdem generis semper in ore habent, nobisque obiicere solent, qui pro traditionibus pugnant. Verum si vel vltimum, quem recitauimus, locum, consideremus, longe erit manifestissimum, eiusmodi traditiones intelligi, quae non diuersam, sed eandem prorsus doctrinam, quam & scriptores Θεόπνευστοι litterarum consignauerant monumentis, continebant. Quae enim de sacrae coenae institutione Corinthiis apostolus tradidit, ea ipsa sunt, quae in hacce eius epistola legimus, quaeue ab euangelistis Matthaeo, Marco & Luca referuntur. Quumque ea, quae viua voce docebant & inculcabant, etiam interdum litteris complectebantur; recte ad Thessalonicenses idem apostolus scribere poterat: *quas didicistis siue per sermonem, siue per epistolam; vt neutiquam inde sequatur, dogmata, quae per sermonem didicerant, ab illis diuersa fuisse, quae in epistolis proponebantur.*

Nec tantum autem scriptores sacri, sed veteris quoque ecclesiae doctores, quos patres vocamus, voce traditionis ita vsi sunt, vt non aliam, quam quae in scriptura sacra exstat, doctrinam denoter. Luculenta sunt haecce IRENAEI verba: *Non enim per alios dispositionem salutis nostrae cognouimus, quam per eos, per quos euangelium peruenit ad nos; quod qui-*  
dema



dem tunc praeconiauērunt; postea vero Dei voluntatem in scripturis nobis tradiderunt, fundamentum & columnam fidei nostrae futurum.\* Dum apostolos idem euangelium, quod adnuntiarunt, in scripturis nobis tradidisse, docet; traditionem quidem laudat, sed non aliam, quam quae in scriptura quoque litteris consignata exstat. Et hancce scripturam dum fundamentum & columnam fidei nostrae vocat, eam solam, non autem traditiones, a scriptura diuersas, vnicam fidei & vitae normam ac regulam esse significat. Eodem modo & vocem traditionis sumit, quando quibusdam interiectis, post vero horum, inquit, excessum Marcus & discipulus & interpres Petri, & ipse, quae a Petro adnuntiata erant, per scripta nobis tradidit.\*\* Pari ratione LACTANTIUS de apostolis verba faciens, illorum, inquit, traditio, quia vera est, quadrat vndique, ac sibi tota consentit; & ideo persuadet, quia constanti ratione suffulta est.\*\*\* Plura vt addamus, necesse non est, testimonia; quod facile fieri potuisset. Haud perfunctorie tamen id obseruandum, quum inde pateat, quam infeliciter secus sentientes ad patrum quorundam prouocent effata, iis vt euincant, eandem, quam ipsi, de traditionibus illos fouisse sententiam. Subinde equidem patres quosdam, speciatim IRENAEVM atque TERTVLLIANVM, traditionum mentionem fecisse, lubens fateor. Sed res iis erat cum eiusmodi haereticis, qui quum ex scriptura valide refutarentur,

L 2

\* lib. III. cap. I. p. m. 198.

\*\* l. c. p. 199.

\*\*\* lib. V. cap. III. p. m. 539.

rentur, scripturam ipsam impugnabant, immo non omnes eius partes, easdemque nec integras recipientes, ex sola scriptura veritatem doceri posse negabant, nisi traditiones simul, viua voce ab apostolis propagatae, adhiberentur. Istorum ergo hominum petulantiam vt compescerent, ad traditiones prouocabant, ab apostolis profectas, sed eas, quibus idem confirmabatur, quod in scriptura sacra exstabat. Idque eo rectius facere poterant, quod eo tempore, ab apostolorum aetate non multum remoto, doctrinae veritas, fideique puritas, adhuc in ecclesia florebat. Neutiquam itaque per traditiones eiusmodi quid, quod a doctrina scripturae diuersum, aut ei omnino repugnat, intelligebant; sed vnam eandemque doctrinam, quae & in scriptura continebatur, & viua simul voce ab apostolis propagata erat. Hinc & IRENAEVS in *epistola ad Florinum*, apud EVSEBIUM, quum sermones POLYCARPI, & ea, quae is ab apostolis acceperat, commemorasset, *πάντα σύμφωνα τῆς γεγραμμένης*, omnia sacris scripturis consona fuisse, profitetur.\*

Atque hinc perspicere licet, traditionum defensores non magis in primitivae ecclesiae patribus, quam in scriptura sacra, causae suae aliquod inuenire praesidium. Qua de re tamen aliquid adhuc addere iuuabit, quum, quanta patrum apud secus sentientes sit auctoritas, neminem fugiat. De iis autem hoc intelligo, qui quatuor prioribus post Christum naturam saeculis vixerunt. Sequenti enim aetate

\* *histor. ecclesiast. lib. V. cap. XX. p. m. 188.*



te cum aliis erroribus hunc quoque, quo traditionibus plus quam decebat, tribuerunt, irrepsisse, lubentes concedimus. PAPIAM, virum apostolicum, & Ioannis apostoli discipulum, traditionum studiosissimum fuisse, constat. Idque quum consilio minime malo, vir cetera optimus, fecerit; suo tamen exemplo docuit, quam facile in hisce labi mortales queant, quamque parum tutum sit, traditionibus adhibere fidem. Quod quum EVSEBIO quoque perspectum esset, adeo hoc non dissimulat, ut aperte indicet, suam hoc ipso simul de traditionibus prodens sententiam. Postquam enim varia de eo commemorauerat, καὶ ἄλλα δὲ, inquit, ὁ αὐτὸς συγγραφεὺς ὡς ἐν παραδόσεως ἀγραφῶν εἰς αὐτὸν ἥκοντα παρατέθειται, ζήνας τέ τινες παραβολὰς τῶ σωτήρι καὶ διδασκαλίᾳ αὐτῶ, καὶ τινὰ ἄλλα μυθικώτερων. Idem praeterea scriptor alia nonnulla nuda vocis traditione ad se peruenisse testatur, novas quasdam scilicet servatoris parabolas ac praedicationes, aliaque fabulis propiora. \* Atque huc quum etiam sententiam eius de regno Christi millenario retulisset, eum ex male intellectis apostolorum narrationibus in illam peruenisse, adserit. Praeterea & CLEMENTIS Alexandrini exemplo comprobare possem, quam facile in errores grauissimos prolabantur, qui traditionibus plus, quam decet, tribuunt; quod & ab aliis ecclesiae Graecae doctoribus illi exprobratum fuit; sed BASILIVM potius audiamus, cuius summa apud Graecos auctoritas est & veneratio, sententiam suam verbis luculentissimis de traditionibus prodentem:

L 3

Διόπτει

\* hist. ecclesiast. lib. III. cap. XXXIX. p. m. 112.

Διότι περ πάντων, inquit, ὁμᾶ καθαρῆσαι ἀναγκαῖον, τῶν τε τῆ διαβολῆς ἐπιθυμιῶν, καὶ τῶν τῆ κόσμου μεταωριμῶν, καὶ τῶν ἀνθρωπίνων παραδόσεων κ. τ. λ. *Quapropter necessarium est, ut pariter ab omnibus repurgemur & liberemur, siue diabolicis concupiscentiis, siue mundanis fastigiis, siue traditionibus humanis &c.\** Vbi quidem quod de eiusmodi traditionibus, de quibus hic nobis sermo est, quasue recte *humanas* dici, eo quod eas a Deo ipso profectas esse, probari nequeat, ex antea dictis intelligitur, loquatur, certe eas non excludat, ex iis, quae praecedunt, haud difficulter, si opus esset, probari posset. Ab his autem non minus, ac a *concupiscentiis diabolicis & mundanis fastigiis* nos repurgari vult ac liberari. Alibi autem idem vir sanctissimus hancce regulam ponit: ὅτι ὁ δὲ παρὰ δόσεων ἀνθρώπων ἀκαλαθῆν ἐπ' ἀδετήσει ἐντολῆς θεῆς. *Quod nullo modo humanas traditiones sequi debemus, ita ut pro illis defendendis praecepta diuina violemus.* Quod cum verbis seruatoris, traditiones Phariseorum & scribarum reprehendentis, *Marc. VII. 6. seqq.* quibus & nos antea vsi sumus, comprobasset, statim, alteram regulam subiungit; ὅτι δὲ πάντα ἀπαρλαίπῳς φυλάττειν, ὅτι διὰ τῆ εὐαγγελίας καὶ τῶν ἀποστόλων ὑπὸ τῆ κυρίας παραδομένης. *Quod ad unum omnia seruanda sunt, quae a domino per euangelium & apostolos tradita sunt, neque eorum quidquam praetermitti debet.\*\** Dum dicit, quae per euangelium & apostolos tradita sunt, dubium non est, quin  
ea,

\* lib. I. de baptismo cap. II. tom. I. operum p. m. 572.

\*\* in moralibus reg. XII. cap. II. & III. tom. II. operum pag. 423.



ea, quae ab euangelistis & apostolis litteris consignata sunt, intelligat; vnde &, quod non alias traditiones, quam quae in scriptura sacra quoque exstant, nec aliam fidei ac vitae normam, quam ipsam scripturam sacram, admittat, consequitur. Inter scripturae autem sacrae, quibus hanc regulam confirmat, testimonia etiam illud Pauli, *itaque, fratres, state, & tenete traditiones, quas didicistis siue per sermonem, siue per epistolam, II. Thessal. II. 15.* adfert, simulque adeo significat, quod & ipsimet supra inuimus, de eiusmodi traditionibus, quae nihil aliud, quam quod a scriptoribus Θεοπνεύστοις litteris mandatum fuit, continent, hoc intelligendum esse. Sed plura vt addamus, necesse non est, cum ex traditionibus ipsis, quam lubricum & infirmum sit, quod praebent fidei fundamentum, euidentissime pateat. Nimirum cum vtrique & Graeci & Latini, siue Romanae ecclesiae addicti, in eo conueniant, traditiones scripturae sacrae adiungendas esse, in ipsis tamen dogmatibus mirum in modum a se inuicem dissentiunt. Quumque nihilofecius vtrique ad traditiones prouocent, nec tamen vtrorumque simul vera esse dogmata queant; in ipsis traditionibus nihil certi, nihilque firmi, cui tuto aliquis inniti queat, deprehendi, nemo non perspicit. Graeci in sacra eucharistia panem enzymum adhibent, & adhibendum acriter contendunt, Latini, panem azymum; illi sub vtraque specie, vt loqui solent, sacram coenam, intuitu etiam laicorum, administrant, hi, sub vna; illi imagines pictas tantum colunt, hi etiam sculptas; illi infantes ad sacrae coenae usum admittunt,

tunt, quod hi vehementer improbant; interim vtri-  
que in hisce omnibus, vt & reliquis, in quibus in-  
ter se non conueniunt, ad traditiones prouocant.  
Num ergo Latinorum, an Graecorum hic fallant  
traditiones, ipsimet dispiciant; nobis autem vitio  
vertere nequeunt, si inde concludamus, lubricam  
admodum multisque erroribus obnoxiam eos ingre-  
di viam, qui traditiones sequuntur.

Quod IAVORSKIVS de IO. CALVINO refert,  
verba Christi, quae in cruce protulit: *Deus mi, Deus  
mi, cur me dereliquisti*, illi lapidem offensionis fuisse,  
siquidem iis inductus seruatori desperationem attri-  
buerit, ad nos non spectat. Habet CALVINVS se-  
ctatores quamplurimos, interque eos viros ingenio  
& eruditione praestantissimos, qui, si iis ita visum  
fuerit, caussam eius agere possunt. Missis itaque  
istis, ad signa falsorum prophetarum progredimur,  
quae in protestantibus IAVORSKIVS sibi deprehen-  
disse visus est. Inter haec primum est, quod LVTHE-  
RVS, & qui cum eo ecclesiae emendationem susce-  
perunt, diuina ad tantum opus destituti fuerint vo-  
catione. *Consuetudo haec enim, inquit, & mos est haec-  
reticorum; non missi; sed proprio motu, peruersis doctri-  
nis suis veniunt, noua quaedam auribus insnuant fide-  
lium, praesertim in scriptura sacra haud exercitatorum.  
Sed sistite gradum parumper amici, dicite mihi, vnde ve-  
nistis; a quo missi estis, ad hoc negotium peragendum etc.  
Clarum est, vos ea ratione, qua Christus, missos non esse,  
nec de tali excellentia gloriari potestis, dum modo archi-  
rabbinos vestros Martinum Lutherum, & Ioannem Calui-  
num in memoriam reuocatis; a quibus omnes haereses no-  
stri*



*fri acui prouenerunt. Respondete igitur, quis vos misit? Quomodo nuntiatis euangelium (sive praedicatis) si missi non estis? Nos Deus misit. Vos autem respondete. Quod si aliunde non constaret, ex quorum disciplina IAVORSKIVS prodierit; haec ipsa tamen, quae recitauimus, satis illud proderent verba. Id enim uero iam dudum egerunt Romanae ecclesiae addicti, interque eos cum primis, qui ab ipso seruatoris nostri nomine societati suae splendorem conciliare uoluerunt, & hodie adhuc agunt, ut, quum ex scriptura sacra dogmata nostra refutare nequeant, in ipso LVThERO, eiusque in corrigenda ecclesia sociis aliquid conquirant, quod nobis obiiciant, speciatim vocationem eius sollicitent. Quae licet iam centies, immo millies repulsa sint a nostratibus & profligata, repetere tamen non desinunt. Praeter alios, quos lubens silentio praetermitto, id etiam nostra aetate fecit vir cetera non indoctus LAMINDVS PRITANIVS, (quo nomine LVDOVICVM ANTONIVM MVRATORIVM tegi nonnulli perhibent) qui eadem fere, qua IAVORSKIVS, ratione hac de re differit. Mirum est, inquit, quam anxios efficiat, & verbis rationibusque exarmet hic locus sinceris veritatis amantes, quorum non pauci adhuc sunt inter nostri temporis nouatores. Et ipsi intelligunt huius legis aequitatem; norunt hac de re apostoli praecepta; statuerunt & ipsi, nemini licere sine praeuia legitima vocatione atque missione verbi Dei praekonem fieri. Primi autem praetensae, quemadmodum vocant, reformationis auctores, Lutherus, Zvinglius, Calvinus, Socinus, & alii, quo titulo, quaeso, quo nomine christianorum orbem docendum sibi sumse-*

re, & antiquissimas catholicae religionis cum sententias, tum consuetudines immutandas, ridendasque susceperet? Nulla ipsis extraordinaria, ut aiunt, & immediata a Deo vocatio fuit. Si fuisset, signis & prodigiis, quae veraces ac veros Dei prophetas perpetuo comitantur, diuinitus acceptam docendi auctoritatem confirmassent. Defuit & ordinaria vocatio. Non ipsis sacrum docendae plebis munus, & scripturas interpretandi, & ritus veteres proscribendi facultatem demandarant aut Romani pontifices, aut episcopi legitimi, aut concilia orthodoxa &c.\* Sed haec ita comparata sunt, ut non tam nobis, quam sibi, dissentientes iis noceant. Si enim nos in errore versari ex scriptura sacra probare possent, quid, quaeso, operosa ista de LUTHERO eiusque vitiis aut virtutibus, itemque vocatione, opus esset disputatione? Nonne ita breuiori via nos redigere ad silentium possent? Nec etiam, si vel maxime caussa cademus, (quod tamen frustra sibi pollicentur) quidquam, ad summam rei quod attinet, contra nos obtinerent. Maximum praepotentis, benignissimique Numinis munus esse agnoscimus, quod MARTINI LUTHERI, viri summi, egregiisque virtutibus ornati, quarumne umbram quidem omnes eius censores adsequuntur, opera ad veritatem, plus quam Cimmeriis tenebris circumseptam & tantum non consepultam, in lucem iterum producendam uti voluerit. Fides tamen nostra non auctoritate LUTHERI, sed clavis, perspicuis, euentibus scripturae sacrae nititur testimoniis. Dogmata, quae profiteamur, vera esse cre-

---

\* de ingeniorum moderatione in religionis negotio, lib. II. cap. I. pag. 237.



credimus, non quia LVTHERVS, aut MELANCHTHON, aut alius quispiam dixit, sed quoniam spiritus sanctus, cuius impulsu scriptores sacri sua literis consignarunt, ea nos condocuit. Hocce praesidium quamdiu secus sentientes nobis non eripiunt, firmi & immoti persistimus, quidquid etiam de LVTHERO eiusque vocatione garriant.

Nec tamen haec eum in finem differuntur, ac si credamus, momentum aliquod has eorum trahere obiectiones. Nihil facilius, quam istas dispellere nebulas, quibus veritati caliginem quamdam obfundere adnituntur. *Respondete igitur*, inquit IAVORSKIVS, *quis vos misit?* Respondeo: Deus Lutherum misit. At, *clarum est*, inquit porro, *vos ea ratione, qua Christus, missos non esse, nec de tali excellentia gloriari potestis.* Ineptit IAVORSKIVS. Non enim nouam LVTHERVS religionem condidit, aut nouam foederis gratiae oeconomiam instituit; sed corruptam tantum ecclesiam emendauit; hinc & tali missione, qua Christus hominum redemptor missus est, opus non fuit. Quodsi porro quaeras, an igitur ad eiusmodi ecclesiae emendationem LVTHERVUS fuerit vocatus? mihi iterum te interrogare licet, an quis sanae mentis homo ea de re dubitet, aut dubitare queat? Nonne LVTHERVS membrum istius ecclesiae erat, in qua natus & educatus fuit? quumque summam eius, qua doctrinam, qua vitae rationem, non tam videret, quam manibus palparet corruptionem; immo quum non sine singulari Numinis directione per disputationem cum Tezelio contigisset, vt eam non videre & palpare

non posset: nonne ipsa naturae lege obstrictus erat, ut naeuos atque errores, quibus scatebat, indicaret, iisque, quantum in ipso erat, medelam adferret? praesertim quum se dotibus ad eiusmodi opus necessariis a Deo instructum intelligeret, omnesque illorum, qui eiusmodi quid adgressi erant, conatus irriti fuissent; plurimi vero id optarent, & anxie desiderarent. Id enim vero quum omnium, quocumque nomine veniant, societatum indoles postulet, ut iis, qui in quamdam earum recepti sunt, non tantum liceat, sed officii quoque sui partem esse existiment, commoda eius ea, qua possunt, ratione promouere; pericula autem quaeuis atque damna ab ea auertere: num ecclesiae christianae non eandem, aut omnino deteriorem esse conditionem, credere par est? Nonne itaque ipsa charitas, quae, ut omni conatu aliorum saluti consulamus, exigit, hoc requirebat? Vocatio autem ecquid demum aliud est, quam voluntatis diuinæ declaratio? quam quum ex re ipsa, quae se nobis offert, luculenter intelligimus, nihil aliud, quam ut eidem serio morem geramus, superest. Idque quum faceret LUTHERVS, & facere quoque deberet, eo quod ex ista rerum, quae illo tempore erat, facie Numinis non posset non cognoscere voluntatem; quis, quae so, dubitauerit, quin rite vocatus ad tantum opus accesserit? Aut num alia vocatione, ut faciamus, quae charitatis ratio, studiumque aliorum commoda promouendi postulat, indigemus? Quid vero dicemus de Samaritano illo, a Christo seruatore laudato, aliisque in exemplum, quod imitarentur, proposito, qui hominem a latronibus, in quos Hie-  
roso-



rosolyma ad Hierichuntem descendens, inciderat, dispoliatum & vulneribus fere confectum mortis periculo subtraxit, idque omni cura ac diligentia egit, ut sanitati restitueretur? Num alia is vocatione opus habuit, quam ea, quam charitatis suppeditauit ratio? aut, num peccauit forte, quod aliam non expectauit? Hoc si ita est, sacerdos ille atque Leuita, qui, miserum videntes, praeterierunt neglexeruntque, procul dubio recte & sapienter egerunt. Inrerrogati enim, cur nulla istius hominis eos tetigerit cura, respondere potuerunt, se nulla, vteiusmodi quid facerent, gauisos fuisse vocatione. Quod quam ineptum stolidumque sit, quum omnes intelligant; statim etiam patet, quam parum, quid dicant, faciantue, pensi habeant, qui; LVThERVm vocatione ad ecclesiae emendationem destitutum fuisse, clamitant; quam tamen ipsa necessitas, miseraque ecclesiae facies omnibus, qui dotibus ad istud opus necessariis instructi erant, imperauit. Nec est, quod regeras, a pontifice, a cardinalibus, ab episcopis istam emendationem suscipiendam fuisse. Illorum utique praecipue hoc erat officium, fateor. Sed quum eodem non fungerentur, & fungi aut non possent, aut non vellent; num ideo aliis hoc facere non licebat? Num pereundum potius ecclesiae fuit, quam facultas eam emendandi LVThERO concedenda, quam tamen ipsa charitatis ratio omnibus christianis, si modò ad eiusmodi opus idonei sint, iniungit? Saepe hucusque de ecclesiae emendatione deliberatum fuerat, in concilio Pisano, Constantiensi, Basileensi, alibique. Sed nihil effectum, euentus

docuit; quum pontifices ipsi, & haud pauci ex cardinalibus & episcopis, omni conatu id agerent, vt emendationem istam impedirent, tantum abest, vt eandem promouerent. Ab hisce itaque quum nihil amplius, quam maior ecclesiae deuastatio, errorumque & superstitionis confirmatio, sperandum esset; LUTHERVS autem omnino is esset, qui rebus desperatis medelam adferre posset, isque etiam impulsu quodam diuino ad hoc excitaretur: num dubitare amplius licet, quin recte fecerit, aut a Deo ipso fuerit vocatus?

Atque generalis haecce, de qua hucusque verba fecimus, sufficere vocatio poterat, vt, recte eum emendationem ecclesiae suscepisse, inde concludatur. Nec tamen & specialis ei defuit, si recte intelligatur, atque cum generali illa coniungatur. LUTHERVM publicum fuisse in ecclesia & academia Wittebergenfi doctorem constitutum, atque ad vtrumque munus rite vocatum, constat inter omnes. Iam vero, licet omnium christianorum sit, ecclesiae grauissimis incommodis laboranti succurrere; praecipua tamen ratione hoc ab illis, qui publico quodam munere funguntur, atque doctores ecclesiae sunt, requiri, non temere quis negabit. Cura enim certae cuiusdam aut scholae, aut ecclesiae non tollit officium erga ecclesiam vniuersam; immo si scholae, aut ecclesiae, cui quis praefectus est, aliter recte consulere nequeat, quam si vitia totius ecclesiae reprehendat, corrigatque, ad hoc eum lege diuina, atque vi vocationis suae specialis obstrictum esse, palam est. Cautione



ne equidem quadam hic opus esse, lubens fateor, ne eorum adprobare videamur institutum, qui de ecclesia aut schola, curae suae speciatim concredita, parum solliciti, omnium eorum, quae in vniuersa ecclesia geruntur, censuram atque diiudicationem ad se pertinere, sibi persuadent, & hinc litibus, contentionibusque cuncta complent; interrogatique, quo iure istam sibi potestatem vindicent, statim respondent, se in publico docendi munere esse constitutos, adeoque ius fasque sibi esse, omnia ista, quae in tota ecclesia contingunt, sub examen reuocandi. Qui quidem homines, vt ambitionem litigandique pruritum interdum aperte produnt; ita magni nostri LVTHERI neutiquam se tueri possunt exemplo. Illis equidem, qui in publico docendi munere constituti sunt, vitio verti non posse, si interdum generatim eorum, quae ad vniuersam ecclesiam spectant, habeant rationem; immo hoc eis specialiori quadam ratione conuenire, fateor, & antea iam fassus sum; sed tum demum, si incommoda aut naeui ecclesiae manifesti sint; aut si verum, non autem fictum aliquod eidem immineat periculum; si etiam illi, ad quos potiori iure ista correctio spectat, prorsus officio suo desint; praeterea si donis ad istud opus necessariis fuerint instructi, & denique si ea, quae istius ecclesiae aut scholae, cui speciatim praefecti sunt, salus postulat, non negligant. Quae omnia quum in LVTHERO conspirauerint, eum omnino egisse, quae vocationis ad publicum docendi munus postulabat ratio, inde colligimus; quod tamen de illis neutiquam adserimus, qui in hisce cum eo com-  
parari

parari nequeunt, quibusque aut quaedam ex iis aut omnia defunt. MARTINVS BECANVS, Iesuita, ex cuius fontibus IAVORSKIUM sua irrigasse arua nouimus, inter alia speciali Lutheri vocationi hoc obiicit, quod equidem rite vocatus sit; sed ad ea, quae menti sententiaeque ecclesiae Romanae consentanea sunt; non autem ad ea, quae illi repugnant, quod postea fecerit, docenda. Parum itaque istam eius vocationem praesidii causae nostrae adferre.\* At expendere illum oportebat, eos, qui LVTHERVVM vocarunt, ideo voluisse, vt ex mente sententiaeque ecclesiae Romanae doceret, quod existimarent, ecclesiae istius doctrinam veram esse, & cum scriptura sacra consentire. Hinc si ab adplicatione ista discedas, mens illorum atque voluntas fuit, quod ea, quae veritati consentanea sunt, docere, & ita aliis viam salutis monstrare debuerit. Atque hoc quum deinceps LVTHERVS, agnitis & detectis Romanae ecclesiae erroribus, fecerit, ipsa quoque, cui praefectus fuit, ecclesia, penes quam reuera ius vocandi est, hoc consensu suo comprobauerit; adeo facultate ista, quam per vocationem adeptus est, non excidit, vt potius tum demum maximum robur acceperit, quum iam, caligine dispulsa, verum a falso, rectum a prauo, discernere didicisset. Maiorem enim actionis, quae ex certa cognitione proficiscitur, quam quae caecitati & ignorantiae originem debet, efficaciam esse, apud omnes in confesso est. Recte itaque si ista specialis vocatio LVTHERI se habuit; ea quoque, quae intuitu totius ecclesiae inde deriuari possunt,

\* in *manuali controuersiar. lib. I. cap. XII. p. 355.*



possunt, admittenda esse, firmoque consistere talo, iure contendimus. Extraordinariam, quam vocant, seu immediate a Deo profectam vocationem viro summo non tribuimus, quam & ipsemet sibi tribui noluit; qua etiam opus non habuit, quum, vt antea monuimus, non de noua ecclesia constituenda, sed corrupta solum emendanda, corrigendaque ageretur. Interim qui felicem operis ab eo suscepti successum, fructusque vberimos, qui inde in ipsam quoque ecclesiam Romanam, quamuis hostili animo erga LV THERVM furentem, quamue in quibusdam meliorem, in plurimis cautiorem factam ipsa experientia testatur, redundarunt, considerauerit, singularem quamdam Numinis, maxima hac ratione in plurimos mortalium beneficia conferentis, suamque simul voluntatem significantis, & hoc pacto vocationem LV THERI comprobantis, intercessisse directionem, negare non poterit. Dum vocationem LV THERI IAVORSKIVS impugnat, simul ab eo, pariter ac IO. CALVINO *omnes haereses nostri aevi prouenisse*, pronuntiat. Demonstrare nimirum voluit, quanta fide eos sequatur, ex quorum disciplina prodiit; adeo vt nullam, quam ab iis didicit, calumniam praetermittat. Idem enim iam pridem a Romanae ecclesiae addictis nobis obiectum fuit, iis cum primis, qui nec conscientiae, nec pudoris habita ratione, parumque idcirco, num vera an falsa sint, quae narrant, curantes, id vnice agunt, vt ecclesiam nostram inuisam reddant. Varias post ecclesiae emendationem exortas haereses constat, idque tantum abest, vt negemus, vt lubentes potius fateamur.

mur. Exstiterunt enim ex eo tempore anti-trinitarii, quorum alii Photini, alii Aarii, alii etiam impia Sabel-  
lii resuscitarunt deliria; exstiterunt anabaptistae, & fanatici, in varias iterum familias atque cohortes distinguendi. Istorum autem hominum commenta atque errores LV THERVS, aut qui eius doctrinam sequuntur, adeo non adprobarunt, vt potius in iis confutandis profligandisque nulli maiorem diligentiam, maiusque collocauerint studium. Quam strenue LV THERVS anabaptistis se opposuerit, neminem fugit, nisi qui illorum omnium, quae eo tempore gesta sunt, ignarus est. MICHAELEM SERVERTVM, quem primum fuisse constat, qui damnatos dudum in veteri ecclesia de mysterio trinitatis errores postliminio ex orco reuocauit, PHILIPPVS MELANCHTHON refutauit, idemque omnino Geneuae consentiente IOAN. CALVINO combustus est. Si labores, quos deinceps ecclesiae nostrae theologi in omnis generis haereticorum erroribus confutandis susceperunt, recensere, aut libros eum in finem ab iis compositos editosue commemorare vellem, ingens hac de re mihi conscribendum esset volumen. Quodsi dicas, habuisse istos haereticos quaedam, quae nobis cum illis communia sint, dogmata; id quidem de illis, quae veritati consentanea sunt; non autem de falsis & erroneis, concedo. Ineptus vero prorsus esset, & rationis expers, qui ex consensu, in quibusdam nobis cum aliis intercedente, statim, quod in reliquis omnibus consentiamus, colligere velit. Graeci primatum papae reiciunt; idem & faciunt Sociniani; Graeci sacram  
eu-



eucharistiam sub vtraque, vt loquuntur, specie administrant; idem & faciunt Sociniani. Inde ergo si quis colligeret, Graecos in reliquis cum Socinianis consentire, num illi huncce ratiocinandi modum adprobaturi essent? num laudaturus IAVORSKIVS? Pergunt equidem, atque clamitant, ecclesiae reformationem occasionem prae buisse eiusmodi hominibus, vt in lucem prodirent, suaque proferrent somnia. At, vt perperam illud dicitur, atque probari nequit, ecclesiae emendationem ea ratione haeresibus istis occasionem dedisse, vt quocumque modo impietatis istius causa dici queat; ita quod eo circiter tempore, quo ecclesia emendari coepit, etiam existerint, qui errores aut haereses spargere instituerunt, id non magis nobis fraudi esse potest, quam apostolis, virisque apostolicis, quod eodem, quo ipsi euangelii doctrinam propagarunt, tempore, Simoniani, Cerinthiani, Gnostici, alique enati sint haeretici, quorum numquam audita fuissent nomina, nisi fuissent, qui veritatis diuinae lucem per vniuersum diffundere orbem suarum duxerunt esse partium. Regerunt rursus, qui haeresium eiusmodi recentiori aetate exortarum culpam in ecclesiae transferre emendationem cupiunt, quum illi, qui ecclesiae emendationem susceperunt, non alium quaestionum theologicarum admiserint iudicem, quam solam scripturam sacram, & non alios ad verum eius & genuinum sensum inuestigandum interpretes, quam suum ingenium, fieri aliter non potuisse, quam vt tandem existerent, qui libertati suae sentiendi eousque indulgerent, vt non aliam sequi voluerint

luerint religionem, quam qualem quisque secundum suum genium ex nuda scripturae lectione sibi efformauerit, nec quidquam aliud credere, quam quod clare, aperte, & sine exceptione in scriptura sacra inueniatur. Quod licet speciem quamdam habeat; vanum tamen atque inane esse, facile intelliget, qui cuncta paullo accuratius considerauerit. Non alium vtique quaestionum ac controuersiarum iudicem admittimus, aut admittere possumus, quam scripturam sacram, ceu vnicam fidei atque vitae normam, aut spiritum sanctum per scripturam sacram ad nos loquentem. Firmissimis nos id facere indutos rationibus, vel ea, quae antea contra traditiones disputauimus, quemlibet condocerunt. Ad interpretationem autem scripturae sacrae quod attinet, tantum abest, vt omnibus ingenio suo pro lubitu indulgendi potestatem faciamus, vt potius secundum regulas certissimas euidentissimasque, quarum praecipuas ipsa scriptura sacra suppeditat, eam explicandam contendamus. Et hancce qui recte ingreditur viam, eam quoque inueniet religionem, non quam quisque genio suo conuenire putat; sed quam veram esse scriptura sacra luculenter ostendit. Nec errat, qui ea tantum credit, quae aperte & sine exceptione in scriptura sacra exstant, aut ex ea rite deriuari possunt, quum in ea omnia, quae scitu credituque ad salutem sunt necessaria, inueniantur; si quis modo eam, vt decet, intelligat, ac interpretetur.

Ad *IAVORSKIVM* vt reuertamur, is probe se intelligere existimat, qua ratione diuinam *LVTHERI* ad emendandam ecclesiam probemus vocationem;

vt.



vtque isto nos deiiciat praesidio, omnes animi colligit vires, atque ita porro verba facit: *Audimus respon- sionem, sed friuolam.* Veram respon- sionem nostram, mi IAVORSKI, aut non audiui- sti, aut dissimula- sti; sed perge: *Nonne hoc (vestrum) celebratis miraculum, quod tam breui tempore conuertistis, aut, vt rectius dicam, per- uertistis ad impiam doctrinam vestram suscipiendam tot regna & prouincias? Sed & Ariani olim tale iactabant mira- culum, & nunc de simili gloriantur Mohammedani.* An & quousque ex felici emendationis seu reformationis suc- cessu diuinam LV THERI probemus vocationem, ex iis, quae antea disputauimus, patet. Si doctri- nae veritas in aprico posita fuerit, sique adeo per eius propagationem maximum in plurimos mortali- um conferatur beneficium, dum hoc pacto a tene- bris ad lucem transferuntur, ac aeternae illorum sa- luti consulitur; tum quidem felicem atque mirabi- lem suscepti operis successum, conspirantibus & re- liquis, quae adesse debent, rationibus, singularem quamdam Numinis arguere directionem, & haec- tenus diuinam quoque inde recte colligi vocationem, si quis aut dubitet, aut abnuat, eum aut rerum omni- um ignarum, aut mortalium impudentissimum esse oportet. Vnde & exemplum Arianorum & Moham- medanorum, quo IAVORSKIVS simul animi sui ma- lignitatem demonstrare voluit, nihil prorsus ad rem facit. Si Ariani doctrinae suae veritatem demon- strassent, aut demonstrare potuissent, si illorum stu- dio & opera ab insigni errore liberatus fuisset orbis christianus, & ad reliqua felix successus, instituto il- lorum respondens, accessisset; iure meritoque non

sine singulari Numinis, res mortalium sapienter dispensantis, cura hoc contigisse, dicere potuissent. Haec omnia autem quum apud eos longe aliter se habuerint, quam apud LVTHERVUM, & illos, qui eius doctrinam sequuntur; ratio patet, cur hi ad felicem rerum suarum successum recte prouocare potuerint; illorum autem nullum inde capiat caussa praesidium. Accedit vero etiam, quod longe plura maioraque LVTHERO, ecclesiae emendationem adgredienti, se offerebant obstacula, quam Arianis, id agentibus, vt dogma aliquod, rationi corruptae & mysteria aegre admittenti blandiens, aliis persuaderent. Cum pontificibus enim Romanis, quorum maxima eo tempore in ecclesia occidentali potentia erat & auctoritas, & a quorum nutu imperatores regesque per vniuersam Europam pendebant, quique nihil molestius, quam ecclesiae emendationem ferebant, illi certamen subeundum fuit. Hisce autem licet indignantibus, furentibus, omnem mouentibus lapidem, vt LVTHERVUM opprimerent, veritatemque, ab eo in lucem protractam, ceu haeresin pessimam foedissimamque proscriberent, quod nihilo fecius eius doctrina longe lateque fuerit propagata, plurimis in locis triumphauerit, ab integris regnis ac prouinciis recepta fuerit, id vero eiusmodi est, vt sine auxilio & ope diuina fieri non potuerit; quum contra in Arianæ impietatis disseminatione nihil omnino, quod non ex rationibus humanis, accedente iustissima Numinis permissione, contingere potuerit, conspiciatur. Atque haec quidem ad diuinam LVTHERI vocationem comprobendam nobis sufficere queunt,



queunt, vt aliis nobis opus non sit miraculis. Non enim, quod supra iam monuimus, & nunc iterum monendum est, de noua ecclesia constituenda; sed de corrupta tantum corrigenda & emendanda agebatur. Quae emendatio, quum ad ductum scripturae sacrae instituenda esset, res omnis eo redibat, an ex ea euidenter probari posset, in Romana ecclesia dogmata irrepsisse, quae falsa sint & erronea; ea contra, quae LVTHERVS iis opponebat, esse vera? Hoc caput causae erat; hinc vero & vocationem LVTHERI diuinam esse constare poterat, quam tamen praeter alia mirabilis illa doctrinae eius propagatio confirmabat. Cur ergo opus fuisset miraculis? quibus adeo & non indigemus, inde vt euincamus, eam, quae istam LVTHERI doctrinam sequitur, veram esse ecclesiam. Romanenses equidem secus sentiunt, & miracula iactitare non desinunt. Hinc IOSEPHVS SONNENBERGIVS, ex Iesuitarum societate, inter praesumptiones, quas vocat, quibus ecclesiam Romanam veram esse ecclesiam probare voluit, hanc primo loco collocat: *cum sola Romana ecclesia continua fulgeat miraculorum gloria, praesumitur ecclesia vera.* Sed bene est, quod idem ingenue fateatur: *Equidem id negare non possumus, quosdam de prodigiorum certitudine parum sollicitos bene olim viuere, quam scribere maluisse.* Hos etiamnum hodie, frustra indignantibus nobis, rudior sequitur inter catholicos populus: *deliris aniculis miracula interdum (vt sic loquar) non plus constant, quam ipsi Deo.* \* Recte omnino. Quod vero quaedam dentur,

---

\* in nemesi Romano-catholica &c. part. II. praesunt. I. p. 88.

dentur, quae tam certa & explorata sint, vt in dubium vocari nequeant, vt idem contendit; id quidem eiusmodi est, vt non omnibus hoc sit persuasurus. Ecclesiae hic non sufficit auctoritas; quum ea falli possit: adeoque parum nos mouet, quod addit, *eum, qui miracula, quae tota ecclesia recepit, in dubium reuocare ausit, cum ratio domare non possit, ferarum ritu tractandum esse*; siquidem ineptum hoc prorsus atque absonum est, si vel maxime non tantum BARTOLVS, ad quem auctor prouocat; sed & BALDVS istud adserat. Nec exempla, quae subiicit, hoc euincunt, quum non desint, quae ad ea responderi queant; quod ostendi haud difficulter posset, si id nunc agerem.

Non tantum Arianorum, sed & Mohammedanorum exemplum IAVORSKIVS nobis opponit, eo vt probet, ex felici successu aut doctrinae propagatione diuinam LVTHERI vocationem probari non posse. Haud dubie eum etiam in finem id fecit, vt maiorem nobis conflaret inuidiam, atque indicaret, nos Mohammedanis non esse meliores, sed eodem cum ipsis habendos loco. Nec insolens hoc apud eos est, quos, ceu magistros suos atque duces, IAVORSKIVS sequitur, vt nos cum Mohammedanis conferant atque contendant. FLORIMVNDVS RAEMVNDVS, cuius inter mendaciorum & calumniarum architectos longe notissimum nomen est, id sibi quoque datum credidit, vt *comparationem nouae euangelicae doctrinae cum Mohammedana institueret, atque ostenderet, complures noui euangelii*  
arti-



*articulas alcorano esse conformes.* \* Adferrem quaedam, quae speciminis loco esse possent, nisi me nugurum istarum taederet. Quo ineptior autem est nostrae & Mohammedicae religionis comparatio, eo turpior est calumnia. Et ad felicem quidem huius progressum ac propagationem, quam IAVORSKIVS nobis obiicit, quod attinet, si quis causas, quae eam promouerunt, considerare velit, nullam earum in emendatione ecclesiae locum inuenisse, intelliget, adeoque haec quam maxime inter se dissimilia esse, perspiciet. Ea, quam Mohammed excogitavit, religio ut omnis mysterii est experta; ita rationi ad ea omnia, quae capere nequit, reiicienda, quae innata omnibus est ambitio, seque efferendi libido, pronissimae, vehementer se non probare non poterat. Eadem dum polygamiam admittebat, prauis mortalium egregie blandiebatur cupiditatibus; & genio cumprimis populorum orientalium valde erat accommodata. Talem vero religionem, quae nullum rationi iugum imponat, facultatemque ea, in quae plerique mortalium magno impetu ruunt, impune designandi, iis concedit, facili negotio recipi, & plurimos nancisci sectatores, quis miretur? Accedebat, quod fraudibus & astutiae arma victricia iungeret, quibus quum imperium sibi pararet, peropportuna haec erat occasio, religionem quoque propagandi. Ex eiusmodi autem causis mirabilem istam doctrinae euangelicae, quam puritati suae LV THERVS restituit, propagationem deriuandam esse, quis quaeso dixerit? nisi aut rerum omnium fuerit ignarus,

O

rus,

\* *de origine haeresium lib. IV. cap. IX. pag. 550. seqq.*



rus, aut animum ad impudenter obrectandum obfirmauerit. Rationi adeo nullum in christianae religionis mysteria imperium concedimus, vt nihil diligentius frequentiusque in scholis nostris inculcemus, quam eam coercendam, suisque circumscribendam limitibus; eaque omnia, quae Deus in sacris litteris reuelauit, summa animi adfensione recipienda esse, licet vel maxime vim intellectus nostri multis modis superent. Prauis autem cupiditatibus, ad quas omnes natura proni sunt, tantum abest, vt frena laxemus, quidquid etiam **IAVORSKIVS**, aut alii calumnientur, vt potius diserte cum apostolo profiteamur, neminem, quod Christi sit, adserere posse, *qui non carnem cum libidinibus & cupiditatibus crucifixerit; Galat. V. 23.* Sed hac de re statim plura dicemus. Per arma autem vt doctrina nostrae ecclesiae eo tempore propagari non potuit; ita & vt eam hac ratione propagaremus, nemini nostratum in mentem venit, vtpote quibus satis superque perspectum est, quam hoc alienum sit ab indole religionis christianae. Omnem haec prorsus respuit coactionem, nihilque minus, quam fides, sine qua religio sibi non constat, est, quam vis aut metus progignit. Non coacto aut violento, sed spontaneo cultu Deus delectatur. Nostrum itaque facere possumus, quod Paulus dicit: *arma militiae nostrae non carnalia sunt, sed diuinipotentia ad munitionum demolitionem; quibus armis cogitationes deturbamus, & omnem sublimitatem elatam contra Dei cognitionem, omnemque mentem ad obediendum Christo cogimus, etc. II. Cor. X. 4. 5.*

Quod



Quod diximus, per ecclesiae nostrae doctrinam prauis cupiditatibus neutiquam frena laxari, ita comparatum est, vt a nemine, nisi manifestae calumniae reus esse velit, negari queat. Negat tamen, qua est impudentia, IAVORSKIVS, & ita de nobis pronuntiat: *vos latam aperuistis vitae humanae* (eam haud dubie intelligit, quae est hominum huius mundi) *viam. Ieiunia sacra abrogastis. Bona opera tamquam ad salutem non necessaria reiecastis. Poenitentiam & mortificationem carnis tamquam fabulosa habetis. Coelibatum & voluntariam paupertatem deridetis. Virginitatem rem existimatis impossibilem. Hac ratione sine vlllo labore tot populos breui in vestras pertraxistis partes, & peruertistis. Num hoc est apostolatus vestri miraculum? o! apostolos, aut potius apostatas, & aduersarios sanctae ecclesiae! Tot calumnias vnico fasce complexus est IAVORSKIVS. Calumnia est, quod *latam*, vt loquitur, *vitae humanae aperiamus viam.* Non aliam enim ad salutem viam nouimus, quam veram in Christum fidem, qua qui praediti sunt, vitiis quibusuis atque prauis cupiditatibus bellum perpetuum indicunt, & per salutem istam, quae omnibus adparuit, Numinis gratiam se erudiri patiuntur, vt impietati mundanisque cupiditatibus valedicto, frugaliter & iuste, pieque viuamus in hoc saeculo, Tit. II. 12. Eos, qui ex Deo nati sunt, vincere mundum (adeoque & quidquid in mundo est, videlicet carnis & oculorum cupiditatem, & vitae arrogantiam) docemus, fidemque nostram victoriam esse, quae mundum vicit, 1. Ioan. V. 4. Omnes eos, qui non tantum dici, sed & esse christiani volunt, sic existimare contendimus: *se mortuos quidem esse peccato,**



*sed viuos Deo, per Christum Iesum, dominum nostrum, adeoque id omni studio operam dare, ne peccatum in mortali illorum corpore regnet, ita vt peccato in corporis cupiditatibus pareant; neue membra sua iniustitiae arma peccato praebeant, sed vt se Deo, tamquam ex mortuis viui, & membra sua iustitiae arma praebeant; Rom. VI. 11. 12.* Haec similiaque, praeunte scriptura sacra, docemus, profitemur, quotidie nostris hominibus inculcamus, serio adseuerantes, atque testantes, non aliam ad salutem aeternamque vitam viam esse, quam illam, de qua Christus seruator loquitur: *Intrate per angustam portam: nam lata est porta, & ampla via, quae ducit ad interitum, multique sunt, qui per eam ingrediuntur; sed angusta porta, & arcta via est, quae ducit ad vitam, paucique sunt, qui eam inueniant; Matth. VII. 13. 14.* Calumnia est, quod IAVORSKIVS dicit, nos sacra ieiunia abrogasse. Hypocritica, superstitiosa, histrionica ieiunia reiicimus; sed vera ieiunia, quae libere ad praescriptum verbi diuini suscipiuntur, tantum abest, vt improbemus, aut abrogata cupiamus, vt laudemus potius quam maxime atque commendemus. De bonis operibus idem docemus, quod apostolus Paulus, aut per apostolum huncce ipse spiritus sanctus docuit: *quod per opera legis mortalium nemo iustificetur apud Deum; Rom. III. 20.* Idem docemus, quod & Petrus apostolus, adprobante vniuerso concilio Hierosolymitano, docuit; *sed nos per domini nostri Iesu Christi gratiam seruari credimus, quemadmodum & illi (patres veteris testamenti;) act. xv. 11.* Enimvero, si per gratiam domini nostri Iesu Christi seruamur; quod per bona opera seruemur, dici nequit. Ita



Ita namque Paulus apostolus nos rationes subducere docuit: *Quodsi ex gratia, ergo non per opera; alioqui gratia non iam esset gratia. Sin per opera, non iam ex gratia: alioquin opus non iam esset opus; Rom. XI. 6.* Et haecenus omnino adserimus, bona opera non esse necessaria, vt per eam iustitiam, quae Deo placeat, aeternamque salutem consequamur, quum hic fides, quae meritum Christi apprehendit, vtramque faciat paginam. Hinc autem si quis colligat, ac si bona opera prorsus reiiciamus, quod IAVORSKIUS innuit, & deinde aperte profitetur, is maximam nobis inferet iniuriam. Tametsi enim non sint necessaria ad salutem consequendam; sunt tamen prorsus necessaria, vt fructus & documenta fidei; sunt necessaria, vt hac ratione animus gratum & promptum obsequium erga Deum demonstremus; sunt necessaria, vt supremi Numinis, ista a nobis exigentis, voluntati morem geramus; sunt necessaria, vt demonstremus, nos esse λαόν istum περιεσσιον, *populum peculiarem Christi, quem sibi purgavit ζηλωτήν καλῶν ἔργων, magno zelo bona opera consecretantem, Tit. II. 14.* Interim non noua est haec calumnia, quod bona opera reiiciamus, vtpote cui iam maiores nostri, qui confessionem Augustanam Carolo v. imperatori exhibuerunt, obuiam eundum esse, consultum duxerunt. *Falso, inquiunt, accusantur nostri, quod bona opera probibeant. Nam scripta eorum, quae extant de decem praeceptis, & alia simili argumento, testantur, quod vtiliter docuerint de omnibus vitae generibus & officiis, quae genera vitae, quae opera in qualibet vocatione Deo placeant. De quibus rebus olim*



parum docebant concionatores, tantum puerilia, & non necessaria opera vrgebant, vt certas ferias, certa ieiunia, fraternitates, peregrinationes, cultus sanctorum, rosaria, monachatum & similia. \* Quumque copiosius mentem suam sententiamque de fide & bonis operibus exposuissent, tandem concludunt: *Hinc facile adparet, banc doctrinam non esse accusandam, quod bona opera prohibeat; sed multo magis laudandam, quod ostendit, quomodo bona opera facere possimus. Nam sine fide nullo modo potest humana natura primi aut secundi praecepti opera facere etc.* \*\* Calumnia porro est, quando IAVORSKIVS dicit, nos poenitentiam & mortificationem carnis tamquam fabulosa habere. Equidem dum poenitentiam & mortificationem coniungit, haud obscure significat, se non intelligere, quatenam verae poenitentiae secundum scripturam sacram sit indoles; quod tamen cum multis aliis, illis cum primis, quorum institutione est usus, illi commune est. Veram poenitentiam, quae in peccatorum agnitione, eorumque detestatione, seu ob admissa contritione, itemque vera in Christum, hominum redemptorem, fide consistit, quaeue idcirco sine singulari mentis mutatione esse nequit, adeo inter fabulas & commenta non referimus, vt praecipuum fere nostrae doctrinae caput constituat, de qua & quotidie verba ad populum facimus. Hoc si ignoravit IAVORSKIVS, damnare prius non debuisset, quam accurate, quid doceamus, inuestigasset; sin sciuit, & nihilo secius eiusmodi quid aliis persuadere voluit, ea egit, quae calumniatori sunt propria. Haud nescio equidem,

Grae-

\* artic. XX. p. 15. 16.

\*\* l.c. p. 18.



Graecos aliter de poenitentia sentire, quam nos, dum veram fidem, qua meritum Christi adprehendimus, ceu partem poenitentiae praecipuam omitunt; peccatorum contra enumerationem, & satisfactionem quamdam, a confessionario imponendam, ad eam requirunt, & quae alia sunt eiusdem generis; quemadmodum & poenitentiam inter sacramenta referunt. Verum istam, quam nos poenitentiae tribuimus, notionem veram & genuinam esse, scripturae sacrae pariter ac doctorum primitivae ecclesiae testimoniis comprobare possem, si nobis nunc copiosioribus esse liceret. Quod si IAVORSKIVS sincere nobiscum agere voluisset, discrimen, quod inter nostram & ecclesiae Graecae sententiam intercedit, indicare, & nostram refutare debuisset. Id vero dum non fecit, sed potius, quod poenitentiam, tamquam *fabulosum quid*, ut illi loqui placuit, *babeamus*, (quod tamen ex isto, quod inter nostrae & Graecae ecclesiae sententiam intercedit, discrimine neutiquam sequitur) nobis imputavit, ab officio hominis, cui vlla veritatis aut honestatis cura est, quam longissime recessit. Ad *mortificationem carnis* quod attinet, ea omnia, quae pravis cupiditatibus coercendis, edomandis, supprimendis inseruiunt, homini christiano agenda; euitanda autem fugiendaque sedulo, quae illas irritare, alere, fouere possunt, numquam non docemus, & serio inculcamus. Quod quum neminem, nisi qui res nostras plane ignorat, fugere queat; non possumus non IAVORSKII illam imputationem in eandem cum priori referre classem. Sed nondum calumniarum & obrectationum finis est.

est. *Coelibatum*, inquit, & *voluntariam paupertatem deridetis*. Eiusmodi scilicet coelibatum, qualis plurimorum monachorum est, qui a matrimoniis abstinentes clandestinis libidinibus indulgent, in rerum omnium affluentia vitam desidem agunt, & ob ignauiam sibi aliisque molesti sunt, iure meritoque deridemus. Insanum enim esse oporteret, qui eiusmodi vitae genus Deo placere, aut ex eo commodum aliquod ad ecclesiam aut rempublicam redundare posse, sibi persuaderet. Eos, qui dono continentiae praediti sunt, & coelibatum eligunt, ut munere suo, si quod illis in ecclesia demandatum est, eo rectius fungi queant, commendandos maximopere atque laudandos censemus; sed quum illi, qui isto continentiae dono, quod non omnibus concessum esse, seruator optimus diserte pronuntiat, *Matth. XIX. 11.* destituuntur, aliquid, quod naturae vires superat, suscipiunt, mirum non est, si in peccata grauiora ruant; sui que interitus ipsimet caussa existant. Qui in diuitiarum, siue bonorum huius saeculi administratione recte versatur, ut iis ad necessitatem non ad libidinem aut ostentationem utatur, nec animum iis adiungat, sed eundem potius per veram sui ipsius abnegationem ab eorum vinculis liberum atque immunem conferuet; pauperum autem cumprimis diligenter rationem habeat, cur ipsa illorum possessione se abdicare debeat, nulla adest ratio, nullumque mandatum diuinum exstat. Meliusque de eorum salute sperandum, quam illorum, qui voluntariae paupertatis specie superstitionem, ambitionem, liuorem, ignauiam, & si quae



quae his sunt grauiora vitia, tegunt. Quod si IAVORSKIO perpendere placuisset, nihil hic quoque, quod nobis obiiceret, inuenisset. Et hinc facile intelligitur, quid de vltimo accusationis capite censendum sit: *virginitatem rem existimatis impossibilem.* Falsissimum enim hoc est; interim semper moneamus, probe obseruanda, quae hac de re Paulus docet *1. Cor. VII. 25. seq.*

Istum ergo calumniarum exercitum quum IAVORSKIVS contra nos in aciem produxisset, iustissimam triumphandi, nobisque insultandi se habere existimauit causam. *Hac ratione, inquit, sine vlllo labore tot populos breui in vestras pertraxistis partes, & peruertistis. Num hoc est apostolatus vestri miraculum? O! apostolos, aut potius apostatas, & aduersarios sanctae ecclesiae!* Sed triumphum canit ante victoriam. Tum enim demum, quod hic dicit, hominibus non omni rationis vsu destitutis persuadebit, quum ex mendaciis veritatem, ex tenebris lucem elici posse probauerit. Quum ea, quae per calumniam longe atrocissimam nobis adfingit, non doceamus; causa quoque, cur lux doctrinae euangelicae tam cito tot regna & prouincias peruaserit, hinc deriuari nequit. Longe aliam autem esse, antea iam demonstrauimus. Apostolatus nostri nullo indigemus miraculo, quum scripturae nitamur testimonio. Ab hac qui discedunt, & pro doctrina apostolica vanas, & ad errorem pariter ac superstitionem ducentes nobis obtrudunt traditiones, longe rectius in apostatarum referendi erunt numerum. Quum autem omnia, quae IAVORSKIVS hucusque disseruit, eo tendant, vt inuisam

P

reddat

reddat ecclesiam nostram, ac si *latam*, vt loquitur, *aperiamus vitae humanae viam*, suumque simul erga Romanam ecclesiam, illosque, qui praecipuam eius partem constituunt, Iesuitarum societati adscriptos, studium demonstret; non abs re fuerit, horum quaedam circa mores formandos, vitamque recte instituendam commemorare placita, inde vt, qui cum IAVORSKIO faciunt, intelligere queant, num nobis an his rectius doctrina, quae prauis cupiditatibus frena laxet, immo peccatis quibusuis & vitiis grauissimis patrocinetur, tribuatur. Nec desunt inter ipsos Romanae ecclesiae addictos viri docti & egregii, qui eiusmodi Iesuitarum dogmata, omnem vitae christianae rationem prorsus euertentia, collegerunt, & indicarunt, & quod per ea morum disciplina, quae apud christianos purissima & sanctissima esse debebat, eneruetur, prosteratur, conculcetur, omniumque ludibrio exponatur, grauiter conquesti sunt. Cum primis hoc egit auctor ille, qui comparisonem doctrinae gentilium & doctrinae Iesuitarum, simulque constitutionis a Clemente XI. pontifice editae, quae incipit: *unigenitus Dei filius*, & in qua haec confirmatur, instituit; \* qui etsi ex illorum numero sit, qui Iansenii partes sequuntur; cuncta tamen testimoniis tam luculentis confirmauit, vt ea in dubium vocare non liceat. Perspiciet, qui ista legerit, & rite considerauerit, ethnicorum in plurimis capitibus longe meliora sanioraque fuisse dogmata,

\* Liber iste, qui inscribitur: *parallele de la doctrine de payens, avec celle de Iesuites, & de la constitution du Pape Clement XI. etc.* prodiit Amstelodami MDCCXXVI. 8.



mata, quam Iesuitarum. Quis quaeso dubitet, inter prima praecipuaque hominis christiani officia esse, vt animum eorum omnium, quae scitu ad salutem sunt necessaria, cumprimis quae Deus ab hominibus fieri voluit, cognitione imbuat? Quis contra eiusmodi effata: *raro aut nunquam tenetur homo se praeparare ad gratiam, vt tollat ignorantiam; item: non dari potest peccatum sine aliqua Dei notitia; porro: Deum ignorare, id quoque magna beneficii & gratiae pars fuit; cum enim peccatum sit essentialiter offensio ex ira Dei, sublata Dei cognitione, necessario sequitur, nec iniuriam, nec peccatum, nec aeternam poenam esse, toto non detestetur pectore?* Et talia tamen aperte docent & profitentur, qui primum in ecclesia Romana locum tenent, quique prae reliquis ingenii & eruditionis laude eminent, morumque praestantissimi magistri esse censentur. Impune ergo omnia scelera, omnia crimina, omnia flagitia committi possunt, ea ratione, vt ne quidem peccata sint, si modo quis persuasus sit, nullum esse Deum. Quis non felicem atque beatam istam adpellitet ignorantiam, quae facultatem quiduis impune perpetrandi concedit? Immo non tantum facultatem concedit, sed & potentiam secus agendi adimit, vt tum ne peccare quidem possit. Ita enim alius ex eodem grege: *facta igitur hypothese, quod Deus sub nullo conceptu cognoscatur, impossibile erit peccare.* Et ne quid impietati desit, ne tum quidem eiusmodi homo peccabit, si vel maxime sciatur, se non recte agere. RODERICI DE ARRIAGA, magni inter Iesuitas nominis viri haec est sententia: *ergo talis homo ignorans Deum non peccabit mortaliter, etiam si*  
P 2 *alium*

*alium occidat & putet se male facere.* Legem diuinam omnium cordibus inscriptam, & sua quemlibet docet conscientia, & Paulus testatur *Rom. II. 15.* Vnde & sponte sua consequitur, quoad principia, quibus vita hominum dirigitur, nullam dari ignorantiam, vt loqui solent, inuincibilem. Hanc autem qui defendunt, nihil aliud iterum agunt, quam vt ad scelera quaeuis committenda aditum miseris mortalibus muniant. Quis vero eos, qui totius orbis christiani magistri esse volunt, hoc facere credat? Audi, lector, & obstupesce! Est enim ex illorum numero, qui diserte adserit: *Principia aliqua uniuersalia legis naturae, vt sunt haec, non esse furandum, occidendum, adulterandum, parentes honorandos, & similia, etsi non possunt ignorari inuincibiliter toto humanae vitae tempore, possunt tamen aliquo breui, immo etiam satis longo.* Ergo isto aliquo breui, immo satis longo vitae humanae tempore, quo ista inuincibiliter ignorantur, potest aliquis furari, occidere, adulterari, parentes non honorare. Nonne egregia haec est morum apud christianos disciplina? Quid itaque mirum, alium ex eodem ordine docuisse, inuincibiliter aliquem ignorare posse, quod fornicatio cum prostibulo publico peccatum sit: *si autem loquamur de fornicatione, quae est concubitus vagus cum meretrice omnibus exposita, & in republica permissa; tunc aliquando in hominem rudem & rusticum potest cadere ignorantia inuincibilis.* Haecce inter christianos audiri, immo palam doceri fas erat? Fidem hoc superaret, nisi aperta istorum hominum id testarentur verba. Sed nondum hic impietatis suae statuerunt



tuerunt modum. Eousque enim alius ex ista societate progressus est, vt adfirmare non erubesceret, ab eo, qui, etiamsi inuincibiliter non ignoret, non tamen aduertat, Deum esse, aut eum peccatis offendi, peccatum mortale non committi; immo peccata ab eo commissa cum charitate perfecta & amicitia diuina consistere posse: *peccatum, quantumuis grauius rationi repugnans, commissum ab inuincibiliter ignorante, aut non aduertente, Deum esse, aut peccatis offendi, non est mortale.* Stare potest cum charitate perfecta & amicitia diuina. Quodnam itaque demum peccatum erit, quod non salua charitate perfecta & amicitia diuina committi queat? Num addi aliquid huic impietati potest? Nonne ad summum perducta est fastigium? Immo nondum perducta est. Sunt enim rursus, qui contendunt, etiamsi aliquis atrocissimum scelus committat, nec atrocitatem eius ignoret, ad eam etiam, sed tantum leuiter attendat, eum nequiquam graue aliquod, sed leue admodum peccatum committere: *si quis committat adulterium, aut homicidium, aduertens quidem malitiam & granitatem eorum, sed imperfectissime tamen & leuissime; ille, quantumuis grauissima sit materia, non peccat tamen, nisi leuiter.* Ratio est, quia sicut ad peccatum requiritur cognitio malitiae, sic ad graue peccatum requiritur plena & clara cognitio & consideratio illius. Haec si non sufficerent, longe plura adhuc addi possent, quae & auctor, quem antea laudauimus, larga manu suppeditabit. Aequi itaque nunc lectores, immo ipsi **IAVORSKII** amici iudicent, velim, quinam prauis cupiditatibus frena laxent, aut latam quibusuis vitijs viam ape-



riant, num nos an vero illi, qui talia docent, quibus omnis vitae humanae honestas labefactatur, tollitur, euertitur, quaeue ipsimet ethnici vehementer detestati sunt? Quumque nullus dubitem, inter Ruthenos esse viros probos, & doctos quamplurimos, quibus talia magnopere displiceant; haud difficulter etiam intelligent, a quibus quam maxime sibi cauere debeant, ne res christiana apud eos detrimentum aliquod capiat, ne de aliis, iisque grauissimis, quae ab istis hominibus illis imminet, periculis dicam.

Sed audire porro *IAVORSKIVM* iuuabit. *Tertium*, inquit, *signum falsorum prophetarum: veniunt ad nos induti pellibus ouinis, sed intus sunt lupi rapaces etc. Pellis est ouina, qua se tegunt, si de fide praedicant, fide sola christianum saluari etc. Sed lupi sunt rapaces, dum hac pietatis specie omnibus peccatis portas aperiunt. Quid enim ex hac impia doctrina sequitur? Hoc sequitur: trucidare, furare, adulterare, falsum dic testimonium, fac, quae lubet, ipsi satanae aequalis fias malitia; nihilominus mitte metum; tantum crede; fides in Christum sola saluat. Ita hi lupi laruati docent. Si lupi laruati sunt, qui sola fide, sed vera, minimeque fucata, cuiusque fructus in bonis operibus post iustificationem conspiciuntur, hominem saluari docent, tales etiam erunt Paulus, Petrus, ceterique apostoli, veteresque ecclesiae doctores longe praestantissimi. Nihil luculentius de hac re dici potest, quam quod Paulus pronuntiauit: *existimamus itaque, fide iustificari hominem, absque operibus legis, Rom. III. 28.* Quum enim duo tantum sint, quae intuitu hominis, quando*



quando coram tribunali diuino sistitur, in censum venire queant, *opera & fides*; sequitur, quando opera remouentur, fidei tantum locum concedi, adeoque perinde hoc esse, ac si dixisset, *sola fide* hominem iustificari. Si sola fide iustificamur, ergo & ea sola saluamur. Atque hoc est, quod alibi idem apostolus docet: *scientes, non iustificari hominem ex operibus legis, sed per fidem in Iesum Christum, Galat. 11. 16.* Dum ibi dicit *ἐὰν μὴ*, eiusmodi oppositionem indicat, qua soli fidei iustificatio tribuitur. Confirmat idem Petrus, quando adserit, *nos per domini nostri Iesu Christi gratiam seruari, quemadmodum & illi* (patres veteris testamenti seruati sint.) Gratiam nimirum Iesu Christi, qua fides hominum nititur, opponit operibus legis, de quibus in concilio isto Hierosolymitano disceptabatur. Dum ergo itidem opera legis hinc excludit; ad solam Iesu Christi gratiam, & intuitu adeo hominis ad solam fidem, rem omnem redire, ostendit. Quae Petri sententia quum in concilio isto Hierosolymitano fuerit adprobata; communem eam totius ecclesiae apostolicae fuisse, recte inde colligimus. Sed & iam alibi idem apostolus hocce effatum protulerat: *Huic* (Christo) *omnes prophetae testimonium perhibent, eum esse, per cuius nomen remissionem peccatorum consequuntur, qui in nomen eius credunt, act. X. 43.* Perinde enim hoc est, ac si dixisset, per solam fidem in Christum homines remissionem peccatorum aeternamque consequi salutem. Atque eandem reliquis apostolis omnibus iure meritoque tribui sententiam, tum ex eo constat, quod ea totius scripturae sacrae

con-



consensu, &, vt iam obseruauimus, concilii Hierosolymitani adprobatione confirmetur, tum & inde, quod nullo aut exemplo aut testimonio comprobari queat, quemquam apostolorum aliter hac de re docuisse. Ad Iacobum enim quod attinet, is id tantum agit, vt ostendat, quatenam verae fidei natura sit atque indoles, eamque, quae bonis operibus, ceu fructibus, vim suam non demonstret, nihil minus, quam fidem esse; quod quum & Paulus adferat, atque contendat, nulla inter hosce apostolos est pugna. Sed hac de re vt plura dicamus, huius loci non est. Quae autem apostolorum, eadem & virorum apostolicorum in hocce capite fuit doctrina. Vel vnico CLEMENTIS Romani hoc comprobare iuuabit testimonio, quod vt illustre admodum est, ita nullam prorsus exceptionem admittit.

πάντες ἔν, inquit, ἐδοξάσθησαν καὶ ἐμεγαλύνθησαν, ἔ δι' αὐτῶν, ἢ τῶν ἔργων αὐτῶν, ἢ τῆς δικαιοπραγίας ἧς κατεργάσαντο, ἀλλὰ διὰ τῆς θελήματος αὐτῶν καὶ ἡμεῖς ἔν διὰ θελήματος αὐτῶν ἐν Χριστῷ Ἰησοῦ κληθέντες, ἔ δι' ἑαυτῶν δικαιομεθα, ἔ δι' αὐτῶν τῆς ἡμετέρας σοφίας, ἢ συνέσεως, ἢ εὐσεβείας, ἢ ἔργων ὧν κατεργασάμεθα ἐν ὁπότητι καρδίας· ἀλλὰ διὰ τῆς πίστεως, δι' ἧς πάντας τὰς αἰῶνας ὁ παντοκράτωρ θεὸς ἐδικαίωσεν· ὃ ἔσω δόξα εἰς τὰς αἰῶνας τῶν αἰώνων, ἀμήν.

*Omnes igitur (Abrahami posterii) glorificati & magnificati sunt, non per se ipsos, vel per opera sua, aut iustas actiones, quas patrarunt, sed per voluntatem eius. Sic & nos ex voluntate eius in Christo Iesu vocati, non per nos ipsos iustificamur, neque per sapientiam nostram, intelligentiam, pietatem, vel per opera, quae in puritate cordis*



cordis & sanctimonia operati sumus; sed per fidem, per quam omnipotens Deus omnes ab initio iustificavit Cui sit gloria in saecula saeculorum, amen.\* Similia ex POLYCARPO, IVSTINO martyre, aliisque secundi, tertii & sequentium saeculorum doctoribus adferrem, si apud viros antiquitatis ecclesiasticae peritos, & a partium studio remotos, vllum hac in re superesse posset dubium. Vnicum adhuc ex quarto saeculo audiamus BASILIUM magnum, qui non tantum ipsam hancce doctrinam accurate exponit, sed & sola fide nos iustificari, diserte pronuntiat. Quum enim verba apostoli: qui gloriatur, in domino gloriatur, adduxisset, addit: αὕτη γὰρ ἡ τέλεια καὶ ὁλόκληρος καύχησις ἐν Θεῷ, ὅτε μήτε ἐπὶ δικαιοσύνῃ τις ἐπαίξεται τῇ ἑαυτοῦ, ἀλλ' ἐγὼ μὲν ἐνδεὴ ὄντα ἑαυτὸν δικαιοσύνης ἀληθῆς, πῶς δὲ μόνῃ τῇ εἰς Χριστὸν δεδικαιωμένον. Nam ea demum perfecta & omnimoda gloriatio est in Deo, quando neque propter suam ipsius quis iustitiam extollitur, sed agnoscit, se quidem vera destitui iustitia, verum sola in Christum fide iustificatum esse.\*\*

Iam si ex nostra, de sola fide iustificante, sententia tam horrenda consequantur, prout IAVORSKIVS, eiusque magistri, aliis persuadere cupiunt; ista non minus Paulo, Petro, omnibusque apostolis, vt & primitivae ecclesiae doctoribus praestantissimis, tribuenda erunt. Sed bene est, quod nemo talia ex nostra, quae & scripturae sacrae est doctrina; deriuare potest, nisi qui aut prorsus, quid per fidem intel-

Q

\* epist. I. ad Corinth. §. XXXII. p. m. 54.

\*\* homil. XXII. de humilitate tom. I. operum p. m. 473.

intelligamus, ignorauerit; aut tam omnis rationis expers sit, vt quid dicat, quidue faciat, parum pensi habeat. Tantum enim abest, vt nudam quamdam atque otiosam animi cogitationem hac voce designemus, quae sine mentis quadam mutatione, adeoque & sine bonis operibus esse queat, vt potius eiusmodi *fidem*, quae opera non habeat, per se mortuam esse, cum Iacobo apostolo libere profiteamur, atque contendamus. Veram hancce atque constantem ecclesiae nostrae esse sententiam, verba luculentissima, quibus simul genuina fidei indoles egregie explicatur, ipsius beati LUTHERI, prout eā in formula concordiae, eiusque, *solida declaratione* recitantur, & hinc ab vniuersa nostra adprobantur ecclesia, abunde testantur: *Fides est diuinum quoddam opus in nobis, quod nos immutat, ex Deo regenerat, veterem Adamum mortificat, & ex nobis plane alios homines (in corde, animo & omnibus viribus nostris) facit, & spiritum sanctum nobis confert. Et est fides illa quiddam viuum, efficax, potens; ita vt fieri non possit, quin semper bona operetur. Neque fides quaerit demum, an bona opera sint facienda, sed priusquam de ea re inquiratur, iam multa bona opera effecit, & semper in agendo est occupata. Qui vero non ad hunc modum bene operatur, is homo vera fide caret; & vbi sit fides, vbi bona opera, quasi caecus palpando quaeritat, neque tamen quid fides, aut bona opera sint, nouit: interim tamen multa inepte de fide & bonis operibus garrat & nugatur. Fides iustificans est viuua & solida fiducia in gratiam seu clementiam Dei, adeo certa, vt homo millies mortem oppetere, quam eam fiduciam sibi eripi pateretur. Et haec fiducia atque agnitio diuinæ gratiae & clementiae*  
*laetos,*



laetos, animosos, alacres efficit, cum erga Deum, tum erga omnes creaturas; quam laetitiam & alacritatem spiritus sanctus excitat per fidem. Ita homo sine ulla coactione promptus & alacris redditur, ut omnibus beneficiat, omnibus inferuiat, omnia toleret, idque in bonorem & laudem Dei, pro ea gratia, qua Dominus eum est prosequutus. Itaque impossibile est, bona opera a vera fide separare; quemadmodum calor vrens & lux ab igne separari non potest.\* Quam vellem, ut omnes amici IAVORSKII, aut qui cum eo faciunt, haec verba legerent atque relegerent, & recte expendere, indeque adeo discerent, quid vera fides sit. Hoc enim si intelligerent, perspicerentque, nullam sine bonis operibus veram fidem esse posse; desinerent quoque ineptire, & nugari pariter ac calumniari, ac si cum fide, quae sola iustificat, scelera quaevis atque flagitia, consistere possent; aut ac si talem fidem, cui ista non repugnant, doceremus. Quo magis autem eiusmodi, quam isti nobis tribuunt, doctrinam detestamur execramurque; eo atrocior & grauior est calumnia ista, quam millies iam refutatam & profligatam, per summam tamen impudentiam IAVORSKIVS repetere non dubitavit. Si paria reddere paribus liberet, longe rectius, quae nobis, nulla veritatis habita ratione, obiecit, in eos, quorum ductum sequutus est, retorquere possemus. Hos enim, eum, qui Deum esse ignorat, aut non aduertit, peccatum mortale committere, quidquid etiam agat, aut designet, negare, antea docuimus. Iam IAVORSKII tantisper vtamur verbis: *Pellis est ouina, qua se tegunt, cum de ignorantia Dei iurisque naturalis, qua ipsa principia, lo-*

Q<sup>2</sup>

quum-

quantur etc. Sed lupi sunt rapaces, dum hac doctrinae moralis specie omnibus peccatis portas aperiunt. Quid enim ex hac impia doctrina sequitur? Hoc sequitur: trucidare, furare, adulterare, falsum dic testimonium, fac, quae lubet; ipsi satanae aequalis fias malitia; nihilominus mitte metum; si modo tibi persuasisti, non esse Deum, aut eum peccatis non offendi, saltem si non aduertisti, nullum peccatum commisisti, tum enim ista non sunt peccata, certe non mortalia, quae saluti tuae nocere queant. Ita hi lupi larvati docent. Et isti quidem, de quibus loquimur, reuera talia docent, ex quibus ista non possunt non fluere; quum contra, nostram de fide doctrinam ita comparatam esse, aperte falsum sit, & a nemine mortalium comprobari queat.

Dum autem IAVORSKIVS hancce nostram de fide iustificante doctrinam *impiam* vocavit, calumniae blasphemiam addidit. Impia enim tunc etiam erit ipsius servatoris doctrina, qui non aliam nobis ad salutem viam, quam fidem monstravit; Marc. XVI. 16. Ioan. III. 16. Impia etiam erunt, quae Petrus, Paulus, alique apostoli ex instinctu spiritus sancti docuerunt, aut litteris consignarunt. Quodsi IAVORSKIVS istam de iustificatione per solam fidem sententiam ad ductum sacrarum litterarum recte expendere aut voluisset, aut potuisset; deprehensus facile fuisset, adeo eam impiam non esse, ut iure meritoque non tantum verissima, sed & sanctissima adpellitetur. Per eam enim dum hominibus omnis gloriantur, suisque operibus, ac si iis aliquid promereri possint, sese efferendi eripitur occasio, honor gloriaque Deo, cui &, ceu vnico salutis nostrae auctori, soli debetur,



debetur, redditur. Idque est, quod sapienter, vt omnia, Paulus apostolus docet: *Vbi est ergo gloriatio? Exclusa est. Qua lege? operum? non; sed fidei lege, Rom. III. 27.* Per fidem nimirum omnem gloriationem excludi significat: quum, si operibus iustificarentur, semper existimare miseri mortales possent, quod aliquam gloriandi causam habeant; quod cum honore isto, qui soli Deo tribuendus est, e diametro pugnat. Nihil aptius, vt homines ad veram humilitatem coram Deo perducantur, quam iustificatio per solam fidem; vt nihil contra ad innatam omnibus cordis elationem alendam fouendamque efficacius, quam si operibus, eorumque merito in iustificatione aliquid tribuatur. Hoc quum ignorent, aut non videant, qui contra nostram de iustificatione per solam fidem doctrinam tantos clamores excitant, summam suam in rebus diuinis caecitatem mirum in modum produnt. Praeterea per hanc nostram doctrinam homines ad veram Christi seruatoris agnitionem perducuntur. Quo magis homo agnoscit, quod nulla ratione per sua opera, quaecumque demum sint, sed tantum per meritum Iesu Christi, vera fide adprehensum, gratiam Dei veniamque peccatorum consequatur; eo luculentius intelligit, quis qualisue ille seruator sit, & quam ob causam filius Dei homo factus inter mortales comparuerit; nimirum intelliget, illum eum esse, qui Iesus vocatus est, eo quod suos ab ipsorum peccatis vindicaturus esset; Matth. 1. 21. eum agnum istum Dei esse, qui mundi peccatum tollit, Ioan. 1. 29. illum, qui suo nomine poenitentiam & peccatorum veniam omnibus adnuntiari

tiari iussit, Luc. XXIV. 47. illum, de quo omnes prophetæ testantur, eum esse, per cuius nomen peccatorum veniam consequantur, quicumque in eum credant, actor. X. 43. illum esse, quem Deus ἰλασῆαιον propitiatorium proposuit per fidem in eius sanguine collocandam, ad demonstrationem iustitiæ Dei, Rom. III. 25. intelliget, rem certam esse, & omni adprobatione dignam, Christum Iesum in mundum venisse seruatum peccatores, 1. Tim. I. 15. immo, eum non ob iustitiæ opera, quæ fecerimus nos, sed pro sua misericordia seruasse nos, Tit. III. 5. eaque de re eo minus dubitandum, quod ἰλασµὸς propitiatio sit pro peccatis nostris, vt Ioannes loquitur, nec solum pro nostris, sed etiam totius mundi, 1. epist. II. 2. Haec, inquam, & reliqua omnia eiusdem generis, quibus Christus, vt verus hominum redemptor, nobis repræsentatur, ille demum recte intelliget, qui summa sua ex peccatorum sordibus agnita miseria, in Christo, eiusque sanguine omnem fiduciam collocat, vt hac ratione peccatorum consequatur veniam, atque iustus in diuino iudicio reputetur; quum illis contra, qui in operibus iustitiæ suam quæerunt, seque adeo iustitia Christi, seruatoris non indigere existimant, ista omnia sint obscura, mortua, otiosa, parumque cognita. Eam vero doctrinam, quæ Christum talem exhibet, qualis reuera est, sanctam omnino dicendam esse, nec sine blasphemia impietatis argui posse, nemo, nisi qui omnem rationis vsum amisit, diffitebitur. Accedit denique, quod vitæ sanctitatem, bonorumque operum studium adeo non impediat aut sufflaminet, vt nihil ea ad istud promouendum efficacius cogitari queat.

Bona



Bona opera cum fide insolubili vinculo coniuncta esse, antea docuimus, ea quidem ratione, vt nullo modo a se inuicem separari queant. Qui ergo fidem habet, non potest esse sine operibus, & qui his destituitur, frustra sibi fidem tribuit. Nec alia etiam Deo placere opera possunt, quam quae ex fide vera sunt profecta; siquidem *fieri nequit, vt illi sine fide placeant*, teste apostolo, *Ebr. XI. 6.* Vt enim per fidem vita illa spiritualis, quae ex Deo est, in hominibus, qui *mortui sunt in peccatis & delictis Eph. II. 1.* excitatur, & qui hucusque *filii irae* erant, *Ephes. II. 3.* *filii Dei* fiunt, *Ioan. I. 12.* ita corda etiam simul purgantur, *aëtor. XV. 9.* vt ceu *arbores bonae fructus bonos edere queant*, *Matth. VII. 17.* Itaque in hoc omni studio, secundum monitum Petri apostoli *incumbunt, vt in fide exhibeant*, (aut vt alii vertunt: *acquirant*) *virtutem, in virtute scientiam, in scientia temperantiam, in temperantia patientiam, in patientia pietatem etc. II. epist. I. 5. 6.* Hinc &, quemadmodum spiritus sanctus fidem in nobis per verbum veritatis producit; ita fidei fructus merito censentur, quos Paulus *fructus spiritus* vocat: quales sunt: *charitas, gaudium, pax, clementia, benignitas, bonitas, fides* (prout virtutem quamdam significat) *lenitas, continentia; Galat. V. 22.* Atque ista quum doceamus, & quotidie vrgeamus, non tantum summam bonorum operum hoc ipso adserimus necessitatem; sed rationem etiam, opera, quae vere bona dici, Deoque grata esse queant, edendi, ostendimus. Vnde, quo iure a IAVORSKIO, eiusque magistris, doctrina nostra impia dicatur, omnibus, vt puto, satis superque constabit.

Super-

Superfunt IAVORSKIO adhuc alia quaedam, quae in nos coniiciat, tela, quae paucis repellemus. *Pellem, inquit, ouinam prae se ferunt, dum euangelio, seu lacto de Christo nuntio gloriantur. Sed lupi sunt rapaces, dum nouum quoddam euangelium, non autem vetus illud, a sanctis patribus, generalibus conciliis & tota orthodoxa catholica ecclesia receptum annuntiant.* Euangelicorum iure nobis vindicamus nomen, eo quod veram puramque euangelii doctrinam, quam erroribus grauissimis corruptam, & tantum non sepultam beatus LV THERVS iterum protraxit, profitemur, cuiusque summa est, quod Deus omnibus hominibus, quos admissorum serio poenitet peccatorum, quiue vera & non fucata fide Christi seruatoris meritum adprehendunt, peccata remittere velit. Quod quum ipse hominum seruator docere, omnibusque hominibus adnuntiare iusserit, *Luc. XXIV. 47.* falsum iterum & insignis calumnia est, quod nouum aliquod euangelium habeamus. Sequitur autem & hic IAVORSKIVS magistrorum suorum vestigia, siquidem ex Romanae ecclesiae addictis, iampridem, vt alios nunc taceam, PETRVS CVTSEMIVS idem nobis obiecit, quod *sub specioso euangelii nomine nouam doctrinam amplexi simus.\** Dum autem IAVORSKIVS probare voluit, nos nouum aliquod euangelium adnuntiare, egregie id se fecisse existimat, quando adserit, a nobis neutiquam *vetus illud a sanctis patribus, generalibus conciliis, & tota orthodoxa catholica ecclesia receptum doceri.* Vbi initio statim aut mentis imbecillitatem, aut

---

\* in Saxonia catholica p. 189. refutatus ab HENRICO HOPFNERO in Saxonia euangelica sect. I. part. I. cap. III. p. 26. seqq.



aut causſae ſuae infirmitatem prodit, dum ſcripturae ſacrae nullam prorſus iniicit mentionem. Certe patrum, conciliorum, eccleſiae pluris apud ſe auctoritatem eſſe ſignificat, quam ſcripturae ſacrae; plane ac ſi aut patres, aut concilia, aut eccleſia ſani quid atque recti docere potuerint, quod non ex ſcriptura ſacra deſumſerint; aut ac ſi non patrum, conciliorum, & eccleſiae doctrina ad ſcripturam ſacram, ceu vnicam veritatis normam, exigenda ſit atque diiudicanda. Hanc itaque quum IAVORSKIVS vna cum illis, in quorum caſtris militat, negligent, parumque de ea ſint ſolliciti; mirum non eſt, quod tot errorum irretiantur ambagibus. Patrum, praefertim eorum, qui in quatuor prioribus poſt Chriſtum natum vixerunt ſaeculis, non contemnimus auctoritatem; eodem tamen, quo ſcripturam ſacram, eos habendos loco abnuimus, quum homines fuerint, qui & errare potuerunt, & ſaepius etiam errarunt. Idem de conciliis cenſemus, vtpote in quibus itidem homines obnoxii erroribus ſententiam dixerunt, & ſubinde maiorem conſtituerunt partem, vnde & illorum tum demum admittimus decreta, quando nihil in iis, quod ſcripturae ſacrae repugnat, deprehendimus. Accedit vero, quod patres quatuor priorum, immo etiam ſequentium quorundam adhuc ſaeculorum, ſaltem praecipui in eo, quod caput cauſae eſt, eadem, quae nos, docuerint, vt adeo longe rectius, quam diſſentientes, ad eorum conſenſum prouocemus. Id quod multo magis de conciliis generalibus quinque priorum ſaeculorum, Nicaeno, Conſtantinopolitano primo, Ephesine &



Chalcedonenſi adſerimus, quorum ſymbola & decreta toto pectore amplectimur, quemadmodum & ſymbolum apoſtolicum, Nicaenum, aut potius Nicaeno-Constantinopolitanum, atque Athanaſianum primum in libris eccleſiae noſtrae ſymbolicis occupant locum. Quod autem ſequentium ſaeculorum concilia, praefertim Nicaenum illud ſecundum, non admittimus, id eodem nos iure facere exiſtimamus, quo Graeci concilia quaedam, quae Romanae eccleſiae addiſti pro vniuerſalibus venditant, interque ea ipſum Tridentinum repudiant. Quum euangelium noſtrum, de quo IAVORSKIVS loquitur, reuera idem illud ſit, quod a patribus primitivae eccleſiae receptum, vt & a conciliis vniuerſalibus, ſaltem quinque priorum, immo & ſequentium quorundam ſaeculorum receptum, certe non improbatum eſt, ne quid de ſcriptura ſacra ipſa dicam, illud neutiquam novum, ſed ex ipſius IAVORSKII ſententia vetus iſtud & genuinum eſſe, conſequitur. De eccleſia orthodoxa & catholica vt aliquid addam, neceſſe non eſt, quum eius non aliunde, quam ex ſcriptis patrum & decretis conciliorum cognosci queat doctrina.

Iam ad imagines ſuas redit IAVORSKIVS, ſimulque exemplo ſuo comprobatur, quod viris doctis obſervatum eſt, cum ſuperſtitione plerumque acerbiffimum aliorum, qui non eandem fouent ſententiam, aut commodis noſtris aduerſantur, odium, immo furorem quemdam coniunctum eſſe. *Corporis, inquit, inclinationem, quae ſanctis ſit per imagines repraeſentatis reiiciunt.* Recte id facimus, quum iſta corporis



poris inclinatio cum cultu quodam religioso fit coniuncta, adeoque soli Deo debetur. Quum vero etiam sancti illam corporis inclinationem non videant, imagines autem nec videant, nec intelligant; quem, quaeso, in finem ea suscipitur? Num IAVORSKIVS vitio nobis vertere potest, quod idololatriae addere nolimus stultitiam? Interim, si illa non adesset, per nos quidem hominibus istis insanire liceret. Sed pergat IAVORSKIVS, & quam egregie in arte mentiendi profecerit, demonstrat: *Sed hoc ipsos excitat, & dentes quasi exacuit ipsorum, quod summa cum pietate (quo sensu hic vocem pietas acceperit, nescio) adspiciant apud nos diuinas imagines argento, auro, & pretiosis gemmis decenter & pie ornatas. Hunc sanctum thesaurum sacrilegi deripere cupiunt; (ut variis in regnis iam fecerunt) specie zeli malitiam suam occultant, ad exemplum Iudae (Jschariotae) qui non de pauperibus sollicitus, sed fur erat.* Quam vellem, ut IAVORSKIVS vel vnico, eoque fide digno, & ad rem faciente, quod dixit, exemplo comprobasset. Ad nostrates quod attinet, quum doceamus, non quidem adorandas, tolerandas tamen imagines, si qui fuerunt, qui imagines aut confregerunt, aut ex aedibus sacris exturbarunt eieceruntque, id nobis, qui talia vehementer detestamur, tribui nulla ratione potest. Ex aliorum coetuum hominibus, si qui eiusmodi quid designarunt, multo minus id fieri debet. Et horum quidem licet aut defendere aut excusare facta nolimus; plerumque tamen ex zelo potius quodam nimio & inconsulto, quo & ipse IAVORSKIVS laborat, quam ex cupiditate thesauros



facros, aut pretiosa imaginum ornamenta diripiendi, ea profecta esse, constat. Esto autem, existisse interdum (quod tamen, vti dixi, testimoniis fide dignis probandum est) homines, qui avaritia aut auiditate opum inducti, violentas imaginibus iniecerint manus; eiusmodi hoc est, vt nemo vmquam aut ex nostratibus, aut reformatae ecclesiae doctores, hoc probauerit; vnde grauissimae sunt atrocissimaeque calumniae IAVORSKII, dum ita loquitur, ac si protestantes omnes, aut tota eorum ecclesia, talia facinora calculo suo adprobent. Certe nisi omnem pudorem exuisset metropolita noster, non potuisset ad tantam audaciam atque proteruiam progredi.

Tandem ad finem properans, *sed ne multis, inquit, sim vobis molestus* (vtique diu fatis lectori, veritatis amanti, tot calumniis ac mendaciis molestus fuit) *postremum a Christo propositum signum horum omnis pellibus tectorum luporum referam. Ex fructibus ipsorum pernosceitis eos. Sed quales sunt fructus hodiernorum haereticorum? etc. Cogitatisne, aduersarii, quod ignoremus vitam archi-rabbini vestri, a quo omnes recentiores haereses prouenerunt, Martini Lutheri? Credo omnino, vitam LVTHERI IAVORSKIO haud ignotam fuisse. Quid enim tantum tamque eximium virum lateat? Sed an ab auctoribus fide dignis, & a partium studio remotis eam acceperit, id quidem est, de quo valde dubito. Immo quum illi, ex quorum disciplina prodiit, IOANNEM COCHLAEVM, FLORIMVNDVM RAEMVNDVM, aliosque eiusdem generis mendaciorum architectos, & qui reliquis callidior, non*  
autem



autem melior est, LVDOVICVM MAIMBVRGIVM sequi soleant; ex hisce similibusque eum sua hausisse fontibus, si dicamus, a vero non aberrabimus. Si autem vitam MARTINI LVTHERI non ignoravit, cur non, quid in ea desiderandum sit, exposuit? Hominem fuisse LVTHERVVM nouimus, adeoque & naeuorum, qui in sanctissimos quoque viros cadunt, non expertem; simul tamen donis eximiis virtutibusque praestantissimis ornatum, prorsusque ad opus istud perficiendum aptum, quod Numinis providentia per eum perfici voluit. Idque nec ipsi eius prorsus inficiari audent aduersarii, quorum nonnulli summum eius non laudare nequeunt candorem; quo si & IAVORSKIVS praeditus fuisset, tot commentis & calumniis tum conscientiae, tum famae suae & existimationi labem non adpersisset. Quae autem COCHLAEVS, RAEMVNDVS alique LVTHERO obiiciunt vitia, eorum virum istum beatissimum immunem fuisse, toties tamque luculenter ab iis, qui ex instituto defensionem eius susceperunt, demonstratum est, ut actum agerem, si ea repetere, aut aliquid addere vellem. Quem vero in finem istud nobis obiicit IAVORSKIVS? num ut inde euincat, doctrinam nostram falsam esse, quia praua variisque vitiis commaculata fuit vita LVTHERI? Id si sibi velit, ut velle videtur, vehementer errat. Non auctoritate LVTHERI, sed scripturae sacrae testimonio doctrinam nostram fidemque niti, antea iam professi sumus, iterumque profitemur. Quamdiu itaque secus sentientes non probant, nos docere aliquid, quod scripturae sacrae repugnet, aërem verberant,



berant, nihilque obtinent. Praeterea, si vel maxime vita Lutheri ita comparata non fuisset, prout debuerit; (quod tamen nulla ratione concedimus) num inde statim sequitur, doctrinam quoque eius falsam fuisse? Hoc enim si ita se habeat, gladium nobis porrigit IAVORSKIUS, quo contra Romanam felicissimo successu utamur ecclesiam, cuius tam strenue ille causam agit, immo in cuius gratiam tantum aut zelum, aut omnino furorem contra protestantes animo concepit. Genuinos enim ecclesiae istius filios, quos inter Iesuitarum societati adscriptos primum tenere locum constat, palam & omni conatu id agere, neminem fugit, ut orbi persuadeant, falli atque errare pontificem in doctrina non posse, eiusque adeo decreta, ceu oracula quaedam diuina, de quorum dubitare veritate nefas sit, excipienda esse. Id enim vero quam falsum, quamue absonum sit, licet aliis evidentissimisque doceri rationibus, & ipsa experientia ostendi queat; vnicum tamen hocce, si IAVORSKII ratiocinatione uti vellemus, sufficeret argumentum, quod quorundam pontificum tot flagitiis, tot sceleribus contaminata vita fuerit, mores tam foedi tamque impuri, ut sine horrore, quae scriptores fide digni, immo ipsi ecclesiae Romanae addicti, de illis memoriae prodiderunt, legi nequeant. Si quis hac de re dubitet, eum rudem atque ignarum eorum omnium, quae in ecclesia Romana gesta sunt, esse oportet. Vel vnicum Alexandri VI. pontificis exemplum ut dictis fidem conciliemus, sufficiet, de quo omnes vnanimi consensu tam nefanda & abominanda commemorant,



rant, vt, num homo an potius monstrum hominis fuerit, dubitari posse videatur. Atque haec longe rectius Romanae ecclesiae addictis opponimus, quam illi sua de Lutheri vitii commenta nobis obiiciunt; quum & verissima sint, & cum infallibilitate, quae ab illis pontifici, a nobis autem neutiquam LVThERO tribuitur, consistere nequeant. Ne autem IAVORSKIVS nihil omnino, quo probet, vitam LVThERI sibi non ignotam fuisse, dixisse videatur, ita pergit: *Totus orbis vaferrima ipse facta nouit; quatenam? si viri sunt amici IAVORSKII, doceant, quatenam ista fuerint? Veram euangelii doctrinam LVThERVS luculenter exposuit, eandem omnino intrepide propugnauit, mysterium iniquitatis in ecclesia Romana strenue detexit, errores quosuis fortiter profligauit; a dolis omnibus, fallaciis, fraudibus, quam longissime abfuit. Vnde itaque vaferrima ista facta? quae quum nullibi, quam in IAVORSKII cerebro existent; ea tamen toti orbi nota esse, persuadere aliis voluit. Iam patebit, quid de iis censendum sit, quae porro subiicit: *Et vestram miratur caecitatem, quod talem deceptorem sequamini, latamque ingressi sitis viam, vitae commodorum amore capti.* Et nos IAVORSKII miramur caecitatem, quod aut superstitione ductus, aut aliis rationibus abreptus, non perspiciat, quas insidias illi, a quibus talia hausit, ecclesiae Ruthenicae struant; aut si eas perspexit, multo magis animi peruersitatem, quod perniciem & interitum ecclesiae, cuius se membrum esse profitetur, ceu desertor aliquis atque turpissimus proditor, promouere non dubitet. Calumniam istam, quod vitae com-*

mode



*modorum amore capti latam ingressi simus viam, non moramur, quum, quid ad eam respondendum sit, ex iis, quae antea disputauimus, quilibet perspicere queat.*

Nec obscurum denique iis, qui ea, quae hucusque disseruimus, rite ponderauerint, erit, quo loco haecce eius habenda sit conclusio: *Propter has diabolicas fraudes (nullas in nobis IAVORSKIVS detexit fraudes, multo minus eas diabolicas esse demonstrauit) vos orthodoxae ecclesiae filios rogo etc. Amicitiam cum talibus incundam aut sermones ferendos quoscumque prohibet atque interdicat sanctus Paulus, praesertim iis, qui sacrarum litterarum parum gnari sunt, II. Tim. II. 16. II. Tim. III. 5. Tit. III. 9. 10. II. Thess. III. 14. Haec monita Pauli sequere atque obserua, orthodoxe ecclesiae fili, & euita amicitiam atque sermones cum peruersis, memor dicti, Psalm. XVI. Quod tam grauitur IAVORSKIVS suos admoneat, vt omnia cum nostris fugiant commercia, vitio ei adeo vertere non possumus, quum hominum superstitione excaecatorum, aut intempestiuo zelo flagrantium hunc esse morem, nemo ignoret. Dolemus tantum, quod quum ostendere voluerit, sacrarum litterarum se minime rudem esse, dictorum ab eo adlatorum minus feliciter illi cesserit adplicatio. Paulus equidem βεβήλας κενόφωνίας profanas verborum futilitates euitare iubet, II. Tim. II. 16. Sed quid hoc ad nos? qui scripturae sacrae vnice insistentes vestigiis, toto pectore profanas vocum futilitates detestamur. Idem apostolus Timotheum adhortatur, vt auerfetur eos, qui pietatis speciem habent, sed vim eius abnegant, II. Timoth. III. 5. Quod an non rectius in eos, qui ieiunia crepant, de morti-*



mortificationibus loquuntur, imaginum cultu se effecerunt, quam in nos, qui cum Paulo apostolo, in Christo nihil aliud, quam τὴν πίσιν δι' ἀγάπης ἐνεργουμένην valere, Galat. V. 6. docemus, quadret, omnibus, qui a partium studio remoti sunt, diiudicandum relinquo. Verba Pauli: *stultis autem quaestionibus & genealogiis & litibus pugnisque legalibus supersedeto, sunt enim inutiles atque futes, Tit. III. 9.* nihil ad rem faciunt, nec instituto IAVORSKII inseruiunt. Praecipue equidem, quae sequuntur: *haereticum hominem post unam atque alteram admonitionem declinato, in animo habuisse videtur.* Sed bene est, quod IAVORSKII eique similium hominum nobis neutiquam standum cadendumue sit sententia. Si quibusuis licet a se dissentientes pro lubitu in haereticorum numerum referre, eandem, quam sibi in nos sumunt, iure quoque nobis in illos vindicabimus potestatem. Nec sufficit, errores quosdam alicui adfingere, aut vera dogmata pro erroribus venditare; quod qui faciunt, pessimis haereticis deteriores esse, iure censentur; sed ingenue aliorum sententiae exponendae, & si a nobis dissentiant, rationibus luculentis grauissimisque refutandi sunt; quod si fiat, tum demum, cuinam haereseos inurenda nota sit, patebit. In eo, quod ultimo loco attulit, effato II. Thess. III. 14. Paulus ne quidem de haereticis, aut in doctrina dissentientibus, sed de iis, qui vitam non ita, ut decet, instituebant, & otio indulgebant, agit. Antea dixerat: *audimus quosdam apud vos immodeste viuere, & nihil agere, sed superuacanea agere; iis nos edicimus, eosque per dominum nostrum Iesum Christum hortamur, ut quiete operantes sibi victum quaerant. Vos vero fratres nolite recte agendo fatigari; atque tum subiungit: Quod si quis dictis*



*nostris non obtemperat, eum per epistolam significate, & ab eius commercio abstinete, vt cum pudeat; neue eum pro inimico habete, sed vt fratrem castigate. Cuiusmodi homines quum haud dubie etiam inter amicos IAVORSKII sint, illi, si sibi hoc dictum esse existimauerint, non errabunt. Ceterum non aegre ferent, qui cum IAVORSKIO faciunt, si monitis eius & illud Pauli apostoli addam: Propterea deponentes mendacium, loquimini veritatem vnusquisque cum proximo suo; quoniam sumus inuicem membra; Eph. IV. 25. Hinc & ipsius IAVORSKII porro mihi liceat vti verbis: Hoc monitum Pauli sequere atque obserua, orthodoxe ecclesiae fili, & evita calumnias quasuis & mendacia, memor dicti: odisti omnes, qui operantur iniquitatem, perdes omnes, qui loquuntur mendacium; virum sanguinum & dolosum abominabitur dominus; Psalm. V. 7.*

Atque haec sunt, VIR DOCTISSIME, quae ad ecclesiae nostrae innocentiam vindicandam, vt TVIS aliorumque precibus locum relinquerem, ad IAVORSKII obrectationes respondere volui. Quae vt viris doctis sapientibusque & rerum istarum peritis, quales haud paucos inter Ruthenos esse scio, haud ingrata erunt, ad commoda quippe ecclesiae Ruthenicae promouenda, & pericula, quae ab iis, ex quorum schola IAVORSKIVS prodiit, illi imminet, ab ea auertenda, comparata; ita si amicis IAVORSKII, aut eadem cum illo sentientibus displiceant, non tam mihi, quam IAVORSKIO, zelo suo inconsulto & intempestiuo nec finem nec modum ponenti, irascendi se habere caussas, si sapiunt, facile intelligent. Vale, VIR CLARISSIME, & quod facis, mihi porro faue. Scrib. Ienae Kal. Iun. M DCC XXIX.

S. D. G.